

عَلَى الْهَيْطَةِ سَبِيحِي

BL 181

11868

H56

Herrick, G.F.

Natural theology.

BL181

H56

11868

عَلَامَةُ الْهَيْطَةِ السَّيِّئَةِ

اثر

معلم هرّيك

مصارف امر يقان مسیونر شرکتي طرفندن تسویه اولندرق

معارف عمومیه نظارت جلیله سنک فی ۲۲ نیشان سنه ۱۳۰۱ و فی ۱۹ رجب
سنه ۱۳۰۲ تاریخلی و ۱۹۲۲ نوسرولی رخصتنامه سیله^۲ طبع اولمشدر.

قسطنطنیه

قاره کین بغداد لیان مطبعه سنده طبع اولمشدر

(آرامیان)

۱۸۸۵



اللهك وارلغنى اثبات ایدن برهانلری تفتیش و تفحص
 برله عیانا نشر و اعلان ایتك خدمتی هر عصرده مناسب
 و مفید ایکن بزم عصر مزده بو وجیهه بر درجه دها زیاده
 مناسببت آلور و امیدمزه کوره بالخاصه مثر و مفید
 بولنه جقدر . زیرا کافه اصحاب معلوماتك بالاتفاق اقرار
 ایتدکلی اوزره بزم عصر مزده بر چوق ادملر و خصوصاً
 صاحب درایت اولان و چوق کتاب او قومق سوداسنده
 بولنه رق دها تبحر به سزجه اولان چوق نوهوسلر ملحدلك
 مرضنه و انك مهلك ضلالتنه دوچار اولمشلردر .
 آدملك کلمات الهیه ملهمه یی رد ایتلری کفایت ایتیوب
 اللهك وجودینی بیله قطعیا انکار ایدرلر .
 بز کلمات الهیه ملهمه یی قبول و انلری مفسدلك

مقدمه

اعتراضاتندن محافظه و مدافعه ایدنلردن ایسه کده ینه
 اللهك وار ایدوکنی ثابت ایدن برهانلر یالکیز دلائل نقلیه یه
 منحصر دکدر . کلمات ملهمه انعام بیورلمزدن اول وانلره
 مراجعت ایتکسزین واجب الوجودك وارلغنه اعتقاد
 ایتک ممکندر و بوندن زیاده دیه بیلورز که علمك اقتضاسنجه
 ممکندر وحتی علمك اقتضاسنجه مستقلا لازمدر .

بودخی فراموش ایدلملیدر که اللهك وار ایدوکنه
 اعتقاد ایدن آدم اللهك صفات علیه سینه مثلا موجودیت
 ذاتیه سی و حی القیوم و واجب الوجود و بلا تغیر باقی
 و ازلی ایدوکنه و وحید و قدیر و عالم و حاکم مطلق
 و زماندن مکاندن منزله ایسه ده هر یرده حاضر ناظر
 ایدوکنه و حق و عادل و کریم ایدوکنه اعتقاد ایتکه
 عقلا مجبوردر .

شمدی ایفا ایتک ارزوسنده بولندیغمز خدمت کتب
 ملهمه یه و دلائل نقلیه یه مراجعت ایتکسزین موجودیت
 و دخی صفات الهیه نک برهانلرینی تفتیش و اعلان
 ایتکدن عبارتدر بو امید ایله که کتب مقدسه نک هیچ
 برینی قبول ایتیانلر بیله عقل و علم و حکمت طریقله

مقدمه

اللهك وارلغنى قبول ايتمكه ارشاد اولنه لر • و بونك ايله
برابر اللهك هر صفت كامله يه مالك اولمسيه صاحب عقل
اولان مخلوقاتك كافه سنك عبوديتنه يالكز ذات جليل
الشانى شايان اولديغى اقرار و قبول اولنه •

علم الهى طبيعى ذات وحيد اولان و كافه صفات
كامله ايله موصوف بولن ان اللهك وارلغنى تصديق ايدن
برهانلرى يعنى انساني و انساني احاطه ايدن عالمده
و خصوصاً ذى روح عالمده بولنان دلائل عقليه ي ارايوب
علم طر يقيله اراه ايدر •

علم الهى حق جل و على باره سنده اولان معلوما تمزك
كافه سندن علم طر يقيله يعنى دلائل عقليه و نقليه دن بحث
ايدر • و علم الهى طبيعى كلمات الهاميه دن غيرى يول
ايله تحصيل اولنان معرفت الله دن بحث ايدر •



موادك اصول و تقسىمى

❖ بحث ايديله جك موادك اصول و تقسىمى ❖

باب اول ذات واجب الوجودك وار ايدوكى بنى ادمك

عمومى و اساسى اعتقاد اتندندر.

فصل اول عوام ناس اللهك وار لغنى عموم قبول ايتمش

و ايتمكده در.

فصل ثانى حكماى مشهوره بالاتفاق اللهك وار ايدوكى

تصديق ايدرلر.

باب ثانى اللهك وجودى و صفاتى عادتاً كائناندن

اثبات اولنور.

فصل اول كائناك موجوديتندن بر موجب ودخى

موجب عاقل و وحيد اثبات اولنور.

فصل ثانى كائنانده هر طرفده و خصوصا حيات

حيوانيه ده مشاهده اولنان مرام و مقصد

علامتلى كافه صفات كامله ايله موصوف

ذات وحيد اولان اللهك وار لغنى تصديق

ايدرلر.

فصل ثالث حيات نباتيه ده مشاهده اولنان مرام و

مقصد علامتلى.

موادك اصول و تقسيمى

فصل رابع موجب و اثر قانونى (علت فاعليه) كافى


اوليوب مرام و مقصد قانونى (علت غاييه)
تاكيد ايتك لازم اولديغى.

فصل خامس انسانك طبيعت اخلاقيه سى حق و عدل
و قدس و كرم صفاتيله موصوف اللهك
وارايدوكنى تصديق ايدر.

باب ثالث ازمنه متأخره ده بولنان ملحدلك.

فصل اول ملحدلك متنوع صورتلرى.

فصل ثانى ملحدلك سفاهتى.





باب اول

ذات واجب الوجودك وار ايدوكى بنى ادمك عمومى
و اساسى اعتقاداتندندر .

{ فصل اول }

✽ عوام ناس اللهك وار لغنى قبول ايتمش و ايتمكده در ✽
عوام ناسك الله ذاته اولان معلوماتى و ذملى
صحيح و يا خود مكمل در ديه مير زيرا او معلومات هر وقت
غير مكمل و چوق دفعه دخی غير صحيح در . عوام ناس
الله وحيد حقيقتنى قبول و تصديق ايتمش و ايتمكده در ديو
ادعا ايتيز زيرا بونك عكسى كرچك اولديغى ارباب معارفك
معلوميدر . لكن ادعاهز بودر كه " كافه مخلوقاتك اساسى و
اصلى مادى اولوب قوانين طبيعیه تحتنده بولنور و موجود

باب اول بنی ادمك عمومى اعتقادى

اولان هر نه ايسه خالقك معرفتيله دكل انجق مادهك قوه
 درونيه و تبدلات ذاتيه سى يوليله وجوده كمشدر ، ديوا دعا
 ايدن اصحاب علومك مبدألى بنى ادمك عمومى و اساسى
 اعتقادينه كلياً و قطعياً مخالفدر . بحتمك بو ايلك آدمى
 ايجون بيلمسى لازم اولان خصوص يالكز بودر كه ادملر
 مختلف طائفه و ملتـلرده و زمانلرده بالعموم اللهك وار
 ايدوكنى قبول ايتمش اولدقلىنى تماماً تسليم ايدلم . هر يرده
 و هر زمانده بزم طائيدىغمز صفات كامله ايله موصوف
 اللهك وار ايدوكى عوام ناس طرفندن تصديق اولنمش
 اولسون اولسون سؤالز بودر كه بنى ادم بالعموم هر موجود
 اولانك اصلى و هر قوتك منبعى عقل و درايت صاحبي
 اولان ذاته مى يوقسه درايت و حس و ارادتن منزّه
 اولان طبيعت ايجنده مى ارامشدر .

هندوستانك اسكى دينلىرى تفتيشه آلهلم . موجود
 اولان شيلرك منبعى و اصلى بر ذاته بولنديغنه هند طائفه لرى
 اراسنده اعتقاد قوى و تعليم واضح بولنور و هر نه قدر
 الله و حيد اعتقادينه مخالف بر چوق ذمملر كورنورسه ده
 قديم الايامده هر عابدك عبادت ايتدىكى معبود كندوسى

ایچون ذات قوت و منبع برکت تصور ایدیلور ایدی .
 خلقت و حتی وحدانیت فکری دخی فرسلرک پک قدیم
 دیننده دها واضح صورتده بولنور . خالق الیکائنات هرمن
 و خالق شر دخی اهریمن اسمنده تصور اولنمشدر . فقط
 بولرک ایکیسنک اولنده بر ذات مستقلک موجود اولسی
 تصور ایدیلور ایدی . تثنین فکری التنده دها خالص و دها
 قدیمی اوله رق وحدانیت فکری بولنور ایدی دیمک اولیور .
 قدیمی یونانی شاعرلرک تصور ایتدکاری و صکره ظهور
 ایدوب کسب شهرت ایدن یونانی شاعرلرک دها حکمت
 طریقيله ارائه قیلنمش افادات و تخیلاتنک اساسی مقامنده
 قدر یاخود پخت اسمنده بر اله فرض اولنوب جمله نک خالق
 و پدری دیو تصور ایدرلر ایدی . زفس و دئو و ضئو
 اسملریله موسوم اله جمله الهلرک پادشاهیدر و انک حکومتی
 حکومت مستقله در . و ذعلرنجه کرک زفس کرک سائر اله
 تصور ایتدکاری هر نه ایسه اصلا بر قوه مادیه دکل
 بالعکس اوصاف ذاتیه ایله موصوف بر ذات ایدیلر .
 قدیمی رومالولر دخی بویله تصور ایدوب عبادت
 ایتدکاری جمله الهلرک بیوکی و حاکم مطلق یوو یعنی زفس

باب اول بنی ادمك عمومى اعتقادى

ايدى كه اكا (Optimus - maximus) يعنى اكرم و اكبر
 تعبير ايدرلر ايدى • سائر الهلك جمله سى صانكه انك
 صفتلرينك برر نوع اظهارى اعتبار اولنه ييلور •
 چينلو قونفيسيوس و تاوونك تحريراتنده دخى
 بر اله مستقلا وارلغى اقرار و اعلان اولنور و بوكونكى
 كونده دنيانك كافه ملل و طوائفك احوال و اعتقاداتى
 معلوم ايكن ارباب علومك تفحص و تحريسى نه قدر توسيع
 ايديلور سه هر شيئك سببى و اصلى بر ذات مستقلا در ديو
 تصور عمومى بولنور • بعض دفعه يازيلو برلسانى
 اولميان بدوى طائفه لك بويله بر تصور و فكرى يوقدر
 ديوظن اولندى و حاللرندن بوقرار استنتاج قيلندى ايسه ده
 هر نه زمان بو طائفه لك تصورات حقيقه سى كركى كى
 تحرى اولنه ييلدى ايسه سالف الذكر تصور و فكر انلرده
 دخى بولندى • مشهور فرانسز مؤلف دقاتروفاز
 " نوع بشر " نام كتابنده (انكايزجه سى صحيفه ۴۸۲)
 بويله بيورر " تعليم صره سنده كافه طوائف انسانيه لك
 احوال و اعتقاداتنى تفتيش و تحرى ايتكه مجبور اولدم •
 اعلا سنده ده ادناسنده ده مللك افكارى ارادم ايسه ده

فصل اول السنه انسانیه دن اولان دلائل

هیچ بر طائفه ده بولدم . اول افکاری انجق بو چکن
عصرده و بو کونکی کونده اوروپاده بولنسان یا فرد فرد
بعض آدمک اعتقادلرنده یا خود کو چک فلسفه مذهبلرنده
بولدم؛

فقط بوندن دها زیاده قوتلو برهان و دلیللر واردر که
بنی آدم هر یرده و هر زمان اللهک وارلغنی مقرر اولمشلردر .
طوائف انسانک لسانلری بو اعتقاده مطابق اوله رق
تشکل ایتمشدر . کک زمان قدیمه کک ازمنه متأخره ده
کوک کورله دیکنده، کورلیان بر الهدر، و حرکت ارض
وقوع بولدیغنده، بر اله غضبه کلشدر، طاعون و وبا اولورسه
بر معبودک ضربه سیدر دیمشدر . عموما بنی آدمک
قوللاندقلری تعبیرلرده وقوعه کلان شیلرک کافه سی بر
قوه ذاتیه دن ظهوره کلشدر دیو بر اعتقاد قوی بولنور .
باربارلرک ذملرینه مراجعت ایدلده موجد فکری
و موجب ذاتی فکری بر اولدیغی درکاردر . بویله آدمک
تصورنجه موجود بولنان شیلرک بالتدریج بشقه مادی
شیلردن ایلرو کلش اولدیغی ذمی معناسزدر مثلا اومروس
کی بر شاعرک اثارى او قوندقه بو سالف الذکر افاده لر

باب اول بنی ادمك عمومى اعتقادى

كوزجله تصديق اولنور • مشهور مؤلفر اراسنده بلكه
 اومروس كى هيچ بر ادم حتى شكسپير بيله مستثنى
 طوتيله رق عادى ادملك افكار و تصوراتى اقتضاسنجه و
 عادى ادملك قلبنه سويليان بر محرر بولمى • انك ائارنده
 هر شى شخصدر • طرويا نقلياتنده مشهور بهادرلك اقوال
 و اعمال ذاتيله لرى نه قدر واضحاً تصوير اولمى ايسه
 الهلك اقوال و اعمالى دخی همان اولقدر واضح اوله رق
 تصوير اولمشدر •

متقدمينك بجهلى عندنده ارض و زمان بيله بر
 ذات حساب اولمش ايدى • بنى ادمك ادراك عموميسنده
 كوره موجبلر و موجبلرك موجبلرى بيله قواء معنويه عد
 اولنميوب دائماً ذات صايلشدر • بى محابا ادعا ايدى يلورزكه
 بنى ادمك عن اصل و بالعموم قبول و تصديق ايتدكارى
 اوزره تمام حياتك و حتى موجود و كورينان شيلرك
 كافدسناك موجب اصليسى قانون دكل، قواء خفيه دكل،
 قدر دكل، طبيعت دكل انجق بر ذات، بر ارادت و بر
 عقل صاحبي والحاصل بر الهدر •

فصل ثانی حکمای مشهوره نك اتفاق

{ فصل ثانی }

حکمای مشهوره بالاتفاق اللهك وار ايدوكنى
تصديق ايدرلر.

مین القدیم حکیمانك اکثریتی و حتی حکیمانك کافه سی
موجود بولنان شیلرک موجب اصلیسنى ارامقده ایکن بو
موجبى عقل و ارادت صاحبى اولان ذاته بولوب انده
ارائه ایتشلردر. فرس و هند حکماسنك محرراتنى امعان
ایدوب برر برر مشهورلرینك مبدألرینی و استنتاجلرینی
بیان ایتك علم الهی طبعینك توارینخنى یازمق دیمك
اوله جق ایدی. بودخی دردست بولنان ایشك حددن
زیاده توسیع ایدیله جکنى موجب اولور ایدی. یونان
حکماسنك عالمده منتشر اولان نفوذ و تأثیراتى سائرلرک
جمله سندن درجه سز زیاده اولدیغندن اك مشهور یونانى
حکیمانك بحث و قرارلرینی ذکر و بیان ایتکله اکتفا
ایده جکز.

باب اول بنی ادمك عمومى اعتقادى

جمله نك معلوميدر كه باشليجه اوچ عدد حكمت
 مذهى واردر يعنى (۱) وحدت وجود مذهى
 (Pantheism) كه هندوستانده احداث اولمش و اوراده
 فوق العاده كسب قوت ايتشدرد. بوكا بر طاقم اوروپالور
 دخی بو عصرده واقف و ذاهب اولشردرد (۲) تثنین
 طريق (Dualism) كه اقليم فرسده احداث اولندى و (۳)
 ذات الیه مستقله يعنى (Theism) بو دخی زمان قدیمده
 یونانستانده كسب قوت ایلدى ايسه ده اولو قئدن شمديه
 قدر حكماى مشهوره نك اكثريسى طرفندن تصديق اولندى.
 یونانستانده وقتيله ظهور ايدوب زمان حدوشده كرك
 یونانستانده كرك روما ممالكنده شهرت بولان ايكي طريق
 حكمت يا خود فلسفه يعنى ايتقوروسك احداث ايتديكى
 صفا طريق (تاريخ ميلاددن تقريبا اوچ عصر اول) و
 استوئق طريق (كه همان اول وقتلرده ظهور ايتدى)
 ارباب توارىخ حكمتك دفته شايان و بو رساله نك اوچنجى
 بابنده ينه ذكر اولنه جق ايسه لرده علم الهى طبعى بحثنه يعنى
 ابراد اولنان اعتراضاتك جرحنه كامينجه بر تفصيل
 شايسته تفحص اعتبار اولنه مز.

فصل ثانی سوقراط ، افلاطون و ارسطوطل

ذات الهیة مستقلة طریقنده ذوات مشهوره سوقراط و افلاطون و ارسطوطل ایدی . افلاطون سوقراطک شا کردی و ارسطوطلک استادی ایدی و بونلرک وفاتی تاریخ میلاددن اول اوله رق سوقراطک ۳۹۹ و افلاطونک ۳۴۸ و ارسطوطلک ۳۲۲ سالنه اصابت ایدر. ارسطوطل و افلاطونک شا کردلری وقت مروریه خوابجه لرینک تحریراتلرندن ایکی طریق احداث ایتدیلو بوانه دک اوروپاده بولنان هپ حکمت و فلسفه طریقلری بونلرک بری اوزرینه مؤسسدر . بالذات سوقراطک تحریراتی حالا بولنمبوب انک حکمت مبدألری شا کردی اولان افلاطونک تحریراتنده بولنور .

ارسطوطلک مؤلفاتی علم الهی طبیعی دائره سنده بولنمدیغندن بوراده افلاطونک طریقنی دهها دقتلیجه ذکر و بیان ایتک مناسب و لازمدر .

افلاطونک خاندانی آتیه معتبرانندن اوله رق انک تولدی تاریخ میلاددن ۴۲۹ سنه مقدم اولدی . یکرمنجی یاشندن اعتباراً سکز سنه مدت قدر سوقراطک شا کردی ایدی . انک وفاتنده (تاریخ میلاددن ۳۹۹ سنه اول)

باب اول بنی ادمك عمومى اعتقادى

افلاطون يونانستانك بشقه قطعه لرنده و سائر ياقين بولنان ديارلرده تمکن مشهور ارباب حکمتى زيارت ايدوب حکمت و فلسفه طريق لرنده کمال درجه معلومات کسب ايلدى . قرقجى ياشنده وطنه عودت ايدرك قرق سنه قدرانده اقاميا اسمنده تشکيل ايتش اولديغى مدرسه ده يانه کلان شا کردله تعليم علم ايدر ايدى .

انك بحث و تعليم ايتديكى ماده لر هم چوق هم مهم ايدى . حکمت طبيعیه و عقليه و اخلاقيه ، علم منطق و علم الهى و با خصوص کافه معلوماتمzk مبدألى ايله منوال تحصيلندن (Metaphysic) بحث ايدر ايدى . ليکن کندی شا کردى ارسطوطل قوانین حکمت طبيعیه ايله علم منطقى چوق تزید و توسيع ايتشدرد . شمدى افلاطونك علم الهى و اکا متعلق اوله رق تحرير ايتديكى معلوماتى تفتيش و بيان ايدلم .

(۱) افلاطونك جرح ايتديكى ملحدلىكه دائر .

”قوانین“ عنوانده تأليف ايتديكى کيتابنك

اوننجى بابنده افلاطون بويله بيورر . ”من القديم ملحدلك مرضيله معلول اولان آزو چوق ادملر بولنمش

فصل ثانی افلاطونک جرح ایتدیکی ملحد مبدألری

و بولمقده در، و بونلری اوچه تقسیم ایدر بر جنسی الهک موجودیتنی بالکایه انکار ایدر . ایکنجی جنسی بونی نه اقرار نه انکار ایدر فقط مقدر الهی یی اصلا قبول ایتمز و اوچنجی جنسی وجود و مقدر الهی جسمانی یی اقرار ایدر ایسه ده معاملات اخلاقیه نظر ایدوب مکافات و مجازات ایده جک بر الهک موجود اولمسنی قبول ایتزلر ایدی . بونلرک مبدألرنده حکمت عقلیه یه کوره فرق وارا ایسه ده حکمت اخلاقیه و علم الهی یه نظرا مهم بر فرق یوقدر . بو ملحدلرک جمله سی اتی الذکر مبدألر اوزرینه اتفاق ایدرلر ایدی .

❖ ملحدلرک مبدألری ❖

- (۱) « کائنات جسمانیه نك عناصری از لیدر .
- (ب) بو عناصرك اول امرده بر درلو هیئت و ترتیبه کلمسی بختله یا خود قانونسز و مرامسز تصادفله اولدی .
- (ح) بعده قوانین طبیعیه یا خود طبیعت دیدیکمز شی ترتیب و هیئت مذکوره دن حاصل اولدی .

باب اول بنی ادمك عمومى اعتقادى

(د) درجهٔ ثالثه ده مرام و معرفت عقليه وجوده
كلى.

(ر) وجود اصلى و باقى به مالك هيج برشى يا بر
ذات بولمىوب كائناتك كافه سى من الازل الى الابد تبدل
و تغير ايتكمده در بنا عليه

(س) ماده روحه تقدم ايدر و مادى شيلرده مشاهده
اولنان مرام و مقصد مرام ايدىجى تفهيم ايتز انجق
صكره دن وجوده كلان عقل صاحبي موجود بولدىغى
شيلرى عاقلانه استعمال ايدر.

هر نه قدر بو طريقلرده وحدت وجود و تشين و
عناصر اربعه طريقلرينك اثرلى مختلط بولندى و بو
طريقلرك اربابى بشقه بشقه يولارله كندى ذملىرىنى بيان
ايتديلر ايسه ده ينه ده تفصيلات اوزره انلى اشبو
رساله نك بو برنجى بابنده تفحص ايتك اقتضا ايتمىوب
سالف الذكر خصوصيات اساسيه متفقه لرىنى بيان ايتك
الده اولان ايشمزه كفايت ايدر.

(۲) افلاطونك علم الهيدن بحث ايتدىكى صروده
استعمال ايتدىكى اصوله دائر.

(۱) انك اعتقادات دينيه عامه يه رعايت ايتى

حقنده .

هر نه قدر افلاطون كندى ملتنده مرعى الاجرا
بولنان دين آيين و عادتلىنك كافه سنى با خصوص چوق
الهرك موجود بولمى اعتقادىنى قبول ايتدى ايسه ده ينه
عادات و اعتقادات مزبوره ي استهزا ايتز و ظاهرى
كوزدوب تقيد ايلر ايدى . كنديسندن اول كلمش اولان
شاعرلر و سائر مؤلفرك محرراتنده الهلر حقنده روايت
اولنان حادثلردن مفيد و پاك و تاثيرلو اعتبار ايتدىكى نقلياتى
ذكر و تحسين ايدر ايدى . هر نه قدر كندوسى بر مستقل
الهك موجود اولديغنه اعتقاد ايتدى ايسه ده ينه مستعمل
بر تعبير ديو الهلر كلمه سنى استعمال ايدر ايدى . بو تعبيرى
دخى بعض دفعه الهدن غيرى ” ذوات الهيه “ حقنده
استعمال ايتدىكى انكار اولمىز .

بر شى دها چوق دفته شايندر يعنى افلاطون اك
مهم مسئله لك تفحصنه كيرشمك اوزره ايكن معاونت الهيه ي
استدعا ايدر ايدى . قوانين نام كتابنده ” حكومتك
نظاماتنى تشكيل ايتك ايچون الهك امدادىنى ديليه لم . او

باب اول بنی ادمك عمومى اعتقادى

بزی دیکله سون و عنایت و مرجتیه امداده کلسون که
 انك هدايتیه حکومتى و انك قانونلرینی تشکیل ایدلم “
 دیو بیورمشدر • بشقه بریده دخی “معلومات روحانیه لری
 ناقص بولسانلریله برایشه باشلادقلرنده دائماً اللهه ندا
 ایدرلر • نه قدر زیاده کائناتدن بحث ایتک اوزره ایکن یعنی
 ازلی می یوقسه مخلوقی دیو تفحص ایدر ایکن اول
 امرده بزم بحث ایده جکمز اللهه مقبول و کندومزه مناسب
 اولسی ایچون اللهه دعا ایتمز کر کدر “بیوردی • بشقه
 یرده دخی جلال درونی ایچون دعا ایدر و ماملکی منفعت
 روحانیه سنه متعلق اولسون دیورجا ایدر •

(ب) افلاطونك استعمال ایتدیكى اثبات و دلائل

اصولى حقنده •

افلاطون کائناتده مشاهده اولنان مرام و مقصوددن
 نشأت ایدن اثباتلردن قطع نظرله سالف الذکر ملحدلرک
 مبدألرینی جرح ایتک ایچون دهالینجه ودرین اصول اوزره
 روحك طبیعتنی جسمك طبیعتندن تفریق ایدرک عقول
 انسانیهك وسائل و اصول تفحص کائناتی چوق دقتلیجه
 تحری ایدر ایدی شویله که ملحدلرک مبدألری عقول

فصل ثانی افلاطونک علم الہیٰ طبیعی

انسانیتہنک قوانین استعمالی و قدرتی تجاوز ایدرلر
 یو بیان ایتکله و بالعکس اللہک وجودی و صفاتی تعلیماتی
 نقول انسانیتہنک مطلوبو باتنددر دیرک اثبات ایدر ایدی .
 صکرہ دن مخلوقاتک اعضاسنک تشکیلی و حالرندن
 و مطابقتندن بحث ایدرک مرام و مقصد بولدیغمزدن اشبو
 مرم و مقصدک صاحبی بو مخلوقاتدن اول موجود اولمش
 اولن دیو قیاس و استنتاج ایده جکز . فقط شمدی افلاطونک
 دلایلہ کندی و قوفیت ذاتیہ درونیہ مزدن یاخود
 وجدنمزدن و عقلارمزک اصول حرکتندن سالف الذکر
 ملحدک مبدألرینی جرح ایده جکز .

(۳) افلاطونک سالف الذکر ملحدک علیہنه واجب

الوجودی اثبات ایتدیکی حقندہ

(۱) وجودی باقی برشی یوق انجق هر موجود
 اولان شی دوام اوزره تبدل و تغیر ایدر زعمی علیہنه
 افلاطون بیان ایتدی کہ اول مبدأ موجبہ حکومت
 و قانونلر شریعت و حقوق و وظیفہ ذمت و غیرہم اصلا
 ممکن دکلد . هیچ برشیئک اساسی یوق، علمک اصلی
 یوق، معلومات دخی معلومات دکادر و بناء علیہ مذکور

باب اول بنی ادمک عمومی اعتقادی

مبدئک اصلی یوق؛ معلوم مجهول کی در و عالم ایله جاهلک فرقی
تبدل ایتکده بولندیغندن برینه عالم و دیگرینه چاهل دیدیکمزد
دیدیکمزک اصلی یوقدر • بوندن اشکاردر که اول مبد
محالدر • عالم و معلوم حقیقه واردر • حسن و کل
و صلاح صحیحاً موجوددر • بو نسبتله یونانی لسانده
بولنان ایکی فعلک معنا و استعمالنی ذکر ایتک لازمدر • بی
فعل وجود ایلما ایم • سین • در و دیگر ی γίγνομαι بینه
اولق معنا سندهدر •

افلاطون دائماً الله ایچون و صلاح ایچون خیر
و شرک فرقی ایچون و بومثالو مبادی اخلاقیه ایچوز فعل
وجودی استعمال ایدر ایدی • نصل که بین الناس استعمال
اولنور ایدی • فقط ملحدلر بو فعلی لساندن اخراج ایدرلر
ایدی •

(ب) اللهک وجودی حرکتدن اثبات اولنر •
افلاطون جسمک کندولکنندن بر درلو حرکته
مقتدر اولسنی محال بر تصوردر دهرک انکار ایدر ایدی •
مادی شیلرک بر درلو تپرنیشی بر تپردانی ایمالدر یوقسه
ماده و جسم کندی طبیعتنی تخلف ایدوب جسمن بشقه

فصل ثانی افلاطونک علم الہیٰ طبیعی

اولش اولور . زیرا کندولکندن حرکت ایتک کندویہ
 وقوف اولغہ منوطدر و کندویہ وقوف اولق وقوف ذاتی
 و وجدان صاحبی اولق دیمکدر . فقط جسمک وقوفیت
 ذاتیہ درونیہ سی یاخود وجدانی وار ایسہ جسم دہا
 تحول ایتش اولور . بناء علیہ روح و عقل و وقوفیت
 ذاتیہ درونیہ یعنی وجدان صاحبندن غیری بدأ حرکت
 یعنی کندولکندن حرکت ایتکہ مقتدر اولان یوقدر دیو
 ادما ایتک بر ضرورت منطقیہ دن در و برهانک اقتضاسنجہ
 اصل بدأ حرکت ایدن ذات اللہ دیدیکمز روح مستقلدر .
 (ح) افلاطون روحک موجود اولق یاخود وجودہ
 کلک خصوصندہ جسمہ تقدم ایتدیکنی ادما و تأکید
 ایدر ایدی .

اللہ صکرہ و کوچک اولدق روحی وجودہ
 کتورمدی زیرا بیوکی کوچکک حکومتنہ تسلیم ایتمز ایدی .
 یعنی معلوم و مسلم اولدیغی مثلاًو روح جسم اوزرینہ
 حکومت ایدر . بناء علیہ کندی فضیلتی و اول موجود
 اولسی جہتیلہ اللہ جسمہ تقدم و تسلط ایتک ایچون روحی
 خلق ایلدی ، بو استخراجک مأل و مفہومنجہ ہر نہ قدر

باب اول بنی ادمك عمومى اعتقادى

روح لفظى روح مخلوقى ایچون استعمال اولنور ایسه ده
ینه بشقه یرده روح لفظى محضاً روح مخلوقى حقنده دکل
انجق جمله روحك اصلى اولان الله حقنده استعمال
اولندیغندن بو تقدم و تفوق برهانك قوتى دها زیاده بر
روح مستقلاک موجود بولمسی بابنده جاری اولدیغی درکار
در . و اگر روح جسمه موجودیت جهتیله تقدم ایدر ایسه
روحك اوصافی جسمك اوصافنه تقدم ایدر .

” تفکر و مقدر و عقل و معرفت و شریعت ، پک
و یومشاغنه افر و خفیفه تقدم ایتش اولمیدر یعنی امور
واوصاف روحانیه امور و حرکات جسمانییه تقدم ایدر “
بناء علیه موجود اولان جسم و روح طبیعتلری اقتضاسیجه
بر روح مستقلاک موجودیتنی تفهیم و تصدیق ایدر لر .
و بو اثبات مرام و مقصوددن اولان اثباتله برابر مقایسه
اولندقدن اللهك وارلغی هر طرفدن ایما و تفهیم اولندیغی
واضحاتدندر .

(۴) افلاطونك صفات الهیه ایله آخرت حقنده

بیان و تعلیم ایتدیکنه دائر .

افلاطونك بو خصوصیلرده اولان تحریراتی ملحدلر

فصل ثانی افلاطونک آخرت حقنده تعلیماتی

علیهنه یازدیغی بحثلردن دکل انجق بشقه کتابلرده بو بیوک مسئلهلردن بحث ایتدیکی صروده بیان ایلدیکی تعلیماتدر .
 افلاطون ذات الوهیتی بلاشبه چوق دقتلیجه و تأکیدله تفهیم و تعلیم ایدر ایدی . اللهک ازلدن و واجب الوجود ایدوکنی دخی قبول و تعلیم ایدر ایدی .
 جله یی عالم و کریم و قدیر هم اراده کلیه یه مالک اولسنی تصدیق ایدر ایدی و جله عقل و اخلاق صاحببری انک اراده سیله اولمزلکه مالک اولور دیو " تیموس " کتابنک مخصوص بر بندیله تعلیم ایلدی .

آخرت حقنده و اللهک عدالت صفتی موجبجه انسانلره مکافات و مجازات ویره جکنی " غورجیاس " نام کتابنک صولک بندیله بیان ایدر . بند مزبورک ترجمه سی بودر .
 "الهله اراسنده باقی بر قانون وار در که صالح بر ادم عمرینی استقامت و دیانتله امرار ایتدکن صکره وفات ایتدیکنده مبارکک اظه لرینه کچه جک واوراده کال صفایله وشردن خلاص بوله رق اقامت ایده جکدر . واقعا اللهدن قورقاز و ادملره ظلم ایدرک یشامش اولان ادم عذاب چکمک ایچون طارطاروس اسمنده بر محبسسه کیده جکدر .

باب اول بنی ادمك عمومى اعتقادى

بر زمان مستقل اولان (زفس) الهه مبارك اظهرك و
 طارطاروسك بکجیلری طرفندن شکایت اولمشدر
 که ادملر اولمك اوزره ایکن حکم اولندقلرندن عذابه مستحق
 اولیانلر عذاب محله کوندریلوب مباركلارك اظهلرینه لایق
 اولیانلر دخی اورایه نائل اولمقدهدر . بونک اوزرینه زفس
 کندى اوز اوغلنى انسانلره حکم ایتک ایچون تعیین ایلدى
 و هر ادم ایچون وفات ایتدکدنصکره محاکمه وقوع
 بولسون دیوامر ایتدى .

اوزمان هرکس جانی تنله متلبس اولهرق دکل
 انجق چیلاق بر روح اولهرق چیلاق روح بولسان
 حاکم حضورینه چیقاریلور . اولوم روحك تندن
 آیرلمسندن عبارتدر و روح تندن آیرلدقن صکره اوصاف
 طبیعیه سی و مالک اولدیغی اخلاق ذاتیه سی باقى قالور .
 بناء علیه بر روح انسانى حاکم حضورینه کلدیکنده
 حاکم دخی کیمک روحى پادشاهکمی یوقسه بر فقیرکمی
 بیلیهرك بر روحى ظلم و حقسزاق ارتکاب ایتش اولدیغندن
 لکدر و علتلر و یاره لرله بوزلدیغنى کوردیکنده آنیده انی
 طارطاروس محبسینه کوندرر و اوراده مستحق اولدیغی

فصل ثانی افلاطونک حکمتک خلاصه سی

عذابى چكر . معالجه و درمان قبول ايدن خطاى ايشلمش
اولنر عذابلرندن منفعت استحصال ايله چكه چكاري الم
و اشكنجه واسطه سيله كوتيله كدن پاكانور اما افراط
درجه ده كوتى بولنش اولان ادم چكه چكى عذابدن اصلا
منفعت بولميه جغندن مؤبدا عذاب چكه چكدر .

بو كا نظرا انسانلرك اكثر يسنك قيتلو صايد قلى
شيلردن صرف نظرايدرك و حقيقتى براقيه رق المدين كلديكى
قدر صالحانه يشامغه چالشه جغم و وفات ايتديكمده صالحلركي
وفات ايتكه ارزو ايدرم و بشقه ادملى المدين كلديكى قدر
دعوت ايدرم كه بو اك مهم مجاهده ده اوغراشه لر . چوق
مباحثه دن صكره هيچ دكل ايسه بو ثابت قالمشدر كه ظلم
چكمكدن زياده ظلم ايتكدن احتراز ايمه مز كر كدر و اك مهم
اوله رق بر ادم صالح كورنمك ايچون دكل انجق
صالح اولق ايچون سعى و غيرت ايتسون .

افلاطونك اثارندن و حكماي قديمه سائرهنك باقى
قالان محرراتندن خصوصاً رومالو چچارو و سنيقا كى
حكمانك ذات و صفات الهيه حقنده بيوردقلى تصوراتى
و افكارى ترجمه و درج ايتك سهولتلو ايسه ده كافه سنك

باب اول بنی ادمك عمومى اعتقادى

خلاصه سی افلاطونك سالف الذکر اصولنه و موضوعاته
 مشابه بولندیغندن در دست بولسان ایشك اقتضاسیجه بو
 بحثی اختصار و جمله بیان ایدرك طوغریدن ذات و صفات
 الهیه یی تثبیت و تصدیق ایدن براهین و دلائلک بحثنه
 حکمک لازمدر .



❁ باب ثانی ❁

اللهک وجودی و صفاتی کائناتله اثبات اولنور



{ فصل اول }

کائناتک موجود بولندیغندن بر موجب او دخی
موجب عقلی و وحید اثبات اولنور •
(بو بحث مشهور اسقوچیاو فیلینت اسمنده مؤلفک
بختک خلاصه سیدر) •

❁ مادهنک یاخود عناصرینک ازلی اولدیغی ❁

کائناتک موجود اولسی اللهک وار ایدوکنی اثبات
ایچون بی نهایت و اسعو قوی بر برهاندر زیرا علمک استنتاجی
شویله در که کائناتده اولان موجوداتک کافه سی بر اثر در •

باب ثانی وجود الهیہ کا ثبوت اثباتی

حواس انسانیہ یہ احضار اولیان ہر شیئہ بر بدایتی وار .
 بوندن از وقت مقدم قیالک ازلی اولدیغی اثبات اولنہ من
 ایدی لیکن علم طبقات الارض قیالک نصل ونہ زمان
 ونہ صرہ ایلہ تشکیل اولندیغی بیان ایلدی . آلب طاغری
 ازلی کبی جسامت لرندہ قائم طورورلر ایسہدہ علم طبقات
 الارضک مبدألری اوزرہ قدیم دکل ، اسکی بیلہ اعتبار
 اولندمازلر . بزم بیلدیگمز کرہ ارضک دها وجودہ کلمسندن
 اول اولان وقتلردن بحث ایتک ایچون علمک اقتدار
 واردر . مادہ ایچندہ بر شیئہ ازلی اولدیغی براهین و
 دلائل علمیه موجبہ اثبات اولنماز . مادہ ایچندہ تغیر ایتز بر
 عنصر وار ایدوکی بعضلر طرفندن ادما اولمشدر . فقط
 بو ادما محضاً بر ذعم اولوب علمک شمدیہ قدر اثبات
 ایدہ بیلدیکنک کافہ سنہ مغایرذر . مادہ ایچندہ تغیر ایتز
 ازلی بر عنصر یا خود بر قوتک بولندیغنه دائر برهان و اثبات
 دینیله جک هیچ برشی میدانہ کلمشدر .

علم کیمیا علومک کافہ سنندن زیادہ تحلیلیدر فقط
 موجود اولان شیلرک عناصرینی التمش درت عدد
 عنصردن حالا اکسلده مشدر .

فصل اول مادەنك ازلی اولدیغی

بركره مادهنك جوهرلری یعنی ذرهلری (Atoms) تغیر قبول ایتمز ازلی در فرض ایدهلم . فقط اساسنی تفتیش ایتك ایچون بویله فرض ایدیورز یوقسه حقیقه بویله اولدیغنه اثبات یوقدر . پك اعلا . بو ازلی ذرهلر حسابیه كلز درجه ده كثرت اوزره بولنیور لیكن كائناتك منتظم اولسی و انك قسملرنك بری بری ایله بللو مناسبتلرله متحد قیلنمش اولدیغی واضحاتدندر . كائناتده وحدت وار و بی نهیایه متنوعیت وار در . اگر كائنات حسابیه كلز چوق و تغیردن منزله و ازلی جوهرلردن ایلرو كادی ایسه انك منتظم اولسی و ایچنده مشاهده اولنان مناسبتلر نه دن ایلرو كادی . یوقسه بو ذرهلر برلکده مشاوره و تدبیر ایدرك انی فعله كتوردیلر می ؟ . البته بو فكر محالدر . لیكن تصادفی وجهله یعنی راست كله بو ذرهلر بزم کوردیکمز كائناتی وجوده كتورمك ایچون تشکیل اولندیغنی تصور ایتك سالف الذکر محال دیدیکمز فکردن برقات دهـا زیاده محالدر . استدیكك قدر ازلی ذرهلر آل انلری قوه مادیه ایله متصف قیل . موجود اولان كائناتك اتحاد و انتظامی بونلردن حاصل اولور می ؟

باب ثانی وجود الهینک کائناتله اثباتی

هم ماده همده عقل ازلی در دیو فرض و اعتقاد ایتک
 اصلا مقتضی دکادر . یالکز ماده انتظام و اتحادک مبدائی
 اوله مز . لکن اگر کوردیکمز کائناتک انتظامنی وجوده
 کتورمکه مقتدر اولان بر عقلک تصوری عقول انسانیه یه
 مغایر دکل ایسه بو کائناتک انتظامنی وجوده کتوره ییلان
 عقل کائناتده بولنان موجوداتک عناصرینی دخی خلق ایتکه
 مقتدر در دیو تصور ایتک عقول انسانیه یه مغایر هی در ؟
 نه وجهله موجود اولان شیلر یکیدن وجوده کله ییلدیکنی
 اکلامغه مقتدر اولمز سهق دخی بو تصورده محال برشی یو قدر
 و هیچ دکل ایسه بو قدر ییلورز که کوردیکمز انتظامک
 بی نهایت چوق و ازلی ذره لردن و بو ذره لرده کائن بر قوه
 ماده دن ایلرو کلمش اولدیغنی تصور ایتک محالدر . بودخی
 چوق دفته شایان در که ذره لرك واجب الوجود اولدیغنه
 اینانمقدن ایسه الهک واجب الوجود اولدیغنه اینانمق هم
 سهولتلو هم عاقلاندر . بی نهایت چوق و تصور دن خارج
 درجده ده کوچک شیلری بی نهایت عظیم صفتلرله توصیف
 ایتک اینچون غایت قوتلو سبیلر لازمدر حالبو که بیوک سبیلر
 شویله طورسون هیچ بر سبب بولندیغنی در کاردر .

❁ ماده نه اولديغنى بىلك مشكل در ❁

ماده نه در . ادملر ماده نه اولديغنى اكلامق پك
 قولاي ظن ايدرلر فقط بو ظن بر ظن باطلدر . كوزلرك
 كوردىكى شى ماده دكل انجق رنك در . الك لمس
 ايتدىكى شى ماده دكل انجق مادهنك خاصه لرندن برى
 يعنى سرتلىكدر . قولاغك ايشتدىكى شى ماده دكل انجق
 صوت در . مشهور انك ايرباب علومدن قيلارك ما كسويل
 نام ذات بو مسئله ي بويه جه تحليل ايدر . كائنا تده وقوع
 بولان تبدلات و حر كات ذره لرك خاصه لر ينى اصلا
 تبديل ايده مشدر . ذره لرك موج - و ديتنى يا خود انلرك
 خاصه لر ينى بك بقاسنى اسباب طبيع يده بوله مير . علم
 بولنده تا علمك طور مغه مجبور اوله جغى موقعه قدر
 ايلرو كيدر زه علم حل ايده مديكى بر ذره يى يا خود
 تركيب ايده مديكى بر جسمى تفتيش و مطالعه ايده بيلور .
 اوت علم بر ذره نك وجوده كلمسى اول ذره نك خار جنده
 بولسان بر قوتله اولديغنى و اول ذره نك طبيعى ديدى كمر

باب ثانی وجود الهینک کائناتله اثباتی

هیچ بر قوتله وجوده کلدیکی بولوب تصدیق ایتد کدنصکره
علم طور مغه مجبور در « [*

وجود الهی قبول ایدن ادم تفحص و تحریات
علیه دن قورقاز و چکنمز. ماده حقنده معلوماتمز آز و
محدود در لکن اولان معلوماتمز مادهنک کندولکنندن
موجود اولدیغنه و کندولکنندن وجوده کلدیکنه دلالت
ایدر. علم کیمیانک ذره یا خود عنصر بسیط اعتبار ایتدیکی
شیلرک چوق مرکب اولدیغی بو یاقینلرده وقوع بولان
تحریاتدن تفهیم و هیچ دکل ایسه ایما اولمش اولدیغی
اهل علمک معلومیدر. بونک معناسی بو دکلکی در که
مادهنک هر بر ذره سی اللهک قوت و حکمتنک برهانلریله
طولودر.

❁ موجب و اثر قانونی ❁

موجبیلرک بی نهایت بر سلسله سی قبول ایتک محالدر
و حقیقه هیچ بر کیمسنک بویله قبول ایدوب اعتقاد ایتدیکی

[*] بریتانیا اتحاد علمی رئیسک تاریخ میلادک ۱۸۷۰ سنه سنده

ایراد ایتدیکی نطق رسمیدندر.

فصل اول موجب و اثر قانونی

یوقدر • واجب الوجود اولان اللهك ویاخود واجب الوجود كائناتك وارلغنی قبول و اعتقاد ایده یلورز و بونلراك بریسنی قبول ایدوب اعتقاد ایتمه مجبورز • بر شیئك اثری اعتبار ایدیلهمیه جك بروجوده تصادف ایتدیكمزده موجبلر قانونی وحتی كندی عقلزك تشكیلی قانونی موجبنجه اول موجبی واجب الوجود وازلی اعتبار ایتمه مجبورز • اشته اول موجب اللهدر • و تعبیر صحیحله اثر اعتبار اولنهمیه جق بر موجب ویالكز اول موجب موجب اصلی اعتبار اولنهییلور •

موجوداتك تحریسنده اثردن موجبیه و بولدیهمز موجبی اثر اعتبار ایدرك اول اثردن دخی انك موجبیه تا برشیئك اثری اولیان موجبیه یاخود موجبی اولیان موجبیه وارنجهیه قدر بالتدریج تفتیش و تفحص ایدرز • بوموجب دخی بالاده کوسه تردیکمز کی نه مجرد ماده نه مادهنك ذره لری اولهییلور •

بناء علیه كائناتك موجب اصلیمی عقلدر اوده عقل کل در • الله دیدیکمز اودر •

باب ثانی وجود الهینک کائناتله اثباتی

✽ عقل کلک ازلی اولسی ✽

کړک منطق کړک مشاهده طریقيله ماده دن بسبتون
فرقلو اولان موجب حقیقی و اصلی یعنی عقل کلک و حید
ایدوکنه اعتقاد ایتکه مجبور اولورز . زیرا بوموجبک
صفتلریله ایکی ذاتک موصوف اولسی محالدر . مثلاً کره
ارضی طارت . التی بیک سنه ظرفنده یشامش اولان
اهالیسنی تعداد ایله . بونلرک کافه سنک قوتنک بر بازو ایله
بردن ابراز اولندیغنی تصور ایله و باقی کره ارضی نه قدر
قلداده بیلور . بیک سنه ظرفنده انی یاریم ارشون
مسافه یه حرکت ایتدره من فقط اللهک قوتی هر دقیقه ده
انی بیک میل قدر حرکت ایتدر . و بتون کائناتده کره
ارض بر ذره اعتبار اولنسه جائزدر . تصور ایدیلهمیان
مسافه بی نهایتک حسابسنر و تخیله صیغماز فاصله لرده
صایماز کونشله و آیلر و سیاره لر وارددر . بونلرک کافه سنی
حرکت ایتدرن ، وقتلرینی و بری بری ایله اولان مناسبتلرینی
شاشرتمیه رق تعیین ایدن عقل بر و اجرا ایتدران بازو

فصل اول قانون عمومی و قانون خصوصی

بردر • بوعقل و بوبازو نه قدر تلو در • بوکا قادر اولان الله
وحید و یالکز اللهدر •

❀ قدرت الهیهنک بی نهیاه اولسی ❀

بعض ادملر کائناتده موجود اولان قوت و قدرتک
بی نهیاه اولدیغنی انکار ایتشلر در • فقط بو انکار نهیه
دلیلدر؟ اللهک قدرت و علمک محدود اولسنه می یوقسه
انکار ایدنک کړک قوتنک کړک عقلنک محدود اولسنه می
دلیلدر؟ موجب اصلی کائناتده و حتی کائناتک هر
طرفنده بولنسی ایجاب ایدر فقط بو موجب مادیاتدن
اول و اوستون اولسی لازمکور یوقسه ماده کړک منتظم
اولان ماده کړک انک ذره لری اصلا موجود اوله من ایدی •

❀ کائناتده بولنان قانون عمومی و قانون خصوصی ❀

اللهک وجودی یالکز کائناتک موجود بولنسیله
اثبات اولماز انجق علمک کائناتده بولدیغنی قانون و اصول
شمدییه قدر بولدیغمز دلیلله تقویت ویرر • و بو قانون و
اصول یا عمومی یا خصـوصیدر • و بشقه بر تعبیرله بو

باب ثانی وجود الهینک کائناتله اثباتی

قانون یا مستقندر یا اجرائاتی مطابقات نظامنه تابعدر .
 ذی روح اولیان موجودات بر قانون عمومی یا خود نظام
 مستقل ارائه ایدر . واقعا ذی روح اولان موجودات
 هم قانون خصوصی هم مطابقات قانونک معاملاتنی ارائه
 ایدر . مثلا علم طبقات الارضی یا خود علم معدنیاتی
 او قود یغمزده بر قانون مستقل یا خود بر نظام عمومی
 بلکه بیکارجه و اون بیکارجه سنه لر ظرفنده بالتدریج
 کندی معاملاتنی کماله ایرشدرمک ایچون حرکت ایتیکده
 اولدیغنی مشاهده ایدرز . واقعا یالکز بر حیوانک یا خود
 بر نک اوتک تشکیلنی و وجوده کلسنی و تعیشنی و تعیشنه
 مقتضی اولان شیلر ایله مناسبت نفسیه سنی تفتیش
 ایتدیگمز حالده سالف الذکر اصول مطابقات و قانون
 خصوصینک نصل حرکت ایتدیگنی اشکاره کوره یلورز .

❀ علوم طبیعییه ایله علوم ریاضیهنک میدان

❀ کتوردکاری دلیلار ❀

علم هیئت موجودات جسمیه یی و نهایتسز مسافه یی
 و نامتناهی اعدادی و بونلرک بری برینه اولان مناسبات

فصل اول علوم طبیعیہ و ریاضیہ دلائلی

جلیلہ سنی ارانہ ایدر . علم حیات و علم کیمیا کائنات
منتظمہ نك نہ قدر مدقیقانه بری برینہ تطبیق قیلنمش اولوب
حرکت ابتدیکنی کوسترر . بر یاندن دوربین و دیگر یاندن
خورده بین انسانك کوزینه و تفحصنه معاونت ایدر .
علوم ریاضیه نك قوانین و مناسباتی کائناتده کوزجله
تمثیل اولنور . اجسام سماویه نك مدارلری یا دائره و
قطع ناقص یا قطع زائد و یاخود قطع مکافی شکننده در .
ترکیبات کیمیویه نك کافه سی اعداد معلومه ایله تماما بیان
اولنه یلور . هر تبلور هندسه اوزره تشکل ایدر . بو کونکی
کونده علوم ریاضیه نك استعمال مفیدی علوم طبیعیه نك
تحریراتده ادوات و آلات اتخاذ اولنلرندن ایلر و کاور . شمسی
بومسئلهیه تصادف ایدرز . عجبا عقله مالک اولمیان هر نه
ایسه موازنه و مقایسه و تعداده مقتدر می در؟ اگر کائناتك
اصلی موجب عقلی دکل ایسه بزم عقلزك درك ایده یلدیکی
قانون و نظامك اصلی نه در؟ عقل کل بولنمینجه کائناتده
نظام و قانون و مطابقاتك بولنه جغندن نظامسزلغك
بولنه جغنی بیك قات زیاده محتملدر . بزم عقلزك کائنات
مادیه ده بولوب تفتیش ایده یلدیکی قانون و نظام یالکز الھك

باب ثانی وجود الهیہ کا ثبوت اثباتی

وجود اولیٰ اوزرینہ مبنی اولہ یلور.

❖ علم ہیئتک میدانہ کتوردیکی دلیل ❖

علم ہیئتک میدانہ کتورمش اولدیغی معلوماتہ بر کره
 نظر اولسون • منظومہ شمسیه واسع و انک ایچنده جسملر
 متنوع و انک کافه حرکات و مناسباتی نظام اوزره بولندیغی
 اثبات اولمشدر • سیارهلری و سیارهلرک آیلری جسمات
 و مسافه و ثقل و درجه حرکت خصوصنده بر جسدک
 متنوع اعضاسی کی مناسبات کامله ایله بری برینه تطبیق
 و ترتیب و تنظیم قیلنمشدر • مثلاً کره ارضک کرک شمس
 کرک قرایله اولان مناسبتی بویله تنظیم ایدلنمشدر که اکین
 و بیچیم جذ و مد و سائر خصوصیاتده انسانک ترقب
 انتظارینی الدائم • لکن منظومہ شمسیه کائناتده بولنان
 اون بیکارجه منظومه لردن بری در و بونلرک کافه سی بری
 بری ایله و مرکب اولدقلری جسملرک هر بریسی ایله بویله
 تنظیم قیلنمشدر که بتون کائناتده بولنان نظام و مطابقات بر
 کال اولوب عصر بعصر انلرده کوریلان مقصد و مرام

فصل اول علم هیئت و علم کیمیا

بی مثال حسن و جمال ایله اجرا ایتمکده در . فرض ایدهلم که اجسام سماویه دن بری بردن بره حرکتدن فراغت ایدوب بولندیغی یرده طورسه ، کائناتک هر بر طرفنده و اجسام سماویه نك کافه سی هرج و مرج اوله رق تا دنیالر وجوده کلزدن اول اولان نظام سزلق یا خود بعد مجرد (Chaos) دیدیکمز حال وقوع بولمش اولور .

بویله جه مختصرا ذکر ایتدیکمز نظامات و مطابقاتی بولوب اثبات ایدن علمی تحسین ایدرز . حالبوکه علم هیئتک ارئه ایتمش اولدیغی معلومات مزبوره یه عصر لر جه تحریات و ماهر ارباب علومک مطالعه و تدقیقاتند نصکره مالک اولدق . بویله ایسه کائناتک نظامات و مطابقاتی خلق ایدوب ایشلدان موجب اصلینک علم و عقلی حقنده نه دیه جکز ؟

کیمیا علمنه بر کره نظر ایدلسه علم هیئتک کشف ایتمش اولدیغی اجسام سماویه نك هر بری ایچنده هر بریسنک حاوی اولدیغی موجوداتدن هر بریسنک شکل و ترتیبی و وجوده کلیشنی و اصول تعیشنی و حتی هر بر کوچک معدن و نبات و حیوانک تشکی و تعیشی و تعلقاتی

باب نانی وجود الهینک کائناتله اثباتی

خصوصنده ینه همان اول نظامات و مطابقاتک برکمال
ایشلمکده اولدیغنی کوسستر . اجزانک ترکیبی معلوم بر
قانون اوزره وقوع بولور و بوقانون جاری اولدیغنی حالده
ترکیب غیرممکندر . موجود اولان ذره لک بشقه ذره لر
ایله خصوصی و معلوم علاقه لری اولسه ایدی . موجوداتده
مشاهده ایتدیگمز متنوع و کوزل شکلر بولنمیوب دنیانک
یوزی برچوله بکزه مش اولور ایدی . موجود اولان شیلرک
ترکیباتی قانون اوزره اولسه ایدی نظامسزلق و خرابیت
دنیا یوزنده تحکم ایلر ایدی . فقط مشاهده اولسان حسن
نظام نصل وقوع بولدی ؟ ذکر ایتدیگمز خاصه لرله متصف
ذره لری کیم خلق ایتدی ؟ کندی کندیلرینی می خلق
ایتدیلر ؟ مجرد بر قوت می انلری خلق ایتدی ؟ منطق مو جنبه
بوکا انجق بر جواب ویریله بیلور . بی نهایه بر علم مستقل
صاحبی انلری خلق ایتدی و مقصدله جمله سنی محالرینه
تعیین ایلدی . بویله جه علم طبقات الارض بیکلرجه
سنه لردن برو موجود اولان شیلرک اصلنده حال حاضرده
کائناتده کوریلان نظام و قانونک بولنوب عمل ایلدیکنی
بیان ایدر .

شمدی به قدر کائناتک موجودیتنی دلیل اتخاذ ایدرک
انک موجی اولوب اوده عقل کل بر موجب ایدوکنی
اثبات ایتدک . بو بابک ایکنجی فصلنده منطق اصولنجه
ایلرولیوب موجود اولان شیلرک خاصه لرینی دها تفصیلات
اوزره تفتیش ایدوب هر طرفده مشاهدده قیلنان مقصد و
مرامدن کافه موجوداتک موجب عقلیسی تا اولدن و
حتی از لدن بالتدریج مرور زمانه خلق ایلدیکی موجوداتک
قنغی نتیجه به طوغری موجود اوله جغنی تنظیم و ترتیب
و تقدیر ایتش در دیو استنتاج ایدرک خالق مطلقک صفات
علیه سی خصوصنده دخی کائناتدن معلومات صحیحه نک
استحصالی ممکن اولدیغنی اثبات ایده جکزر .

باب ثانی وجود الهینک کائناتله اثباتی

{ فصل ثانی }

کائناتده هر طرفده و خصوصاً حیات حیوانیهده
مشاهده اولنان مرام و مقصد علامتلی کافه صفات کامله
ایله موصوف ذات وحید اولان اللهک وارلغنی تصدیق
ایدرلر.

بو فصلده پیللی اسمنده مشهور بر انکلیز مؤلفک
ذهابنده حیات حیوانیه دن دلائل مسلمه یی در میان ایده جکیز.
الله جل شانہ دائر معلومات ایدنمک ضمننده انسانک
و سائر مخلوقاتک قوت و مطابقاتنه نظر و تفحص بیانده در.

❖ انسانک جسمینه دائر ❖

استعمال ایده جکیز بحثک اصولنی و کیدیشنی تمثیل
ایتمک ایچون فرض ایده لم که بر یسان یردن پکر ایکن یول

کنارنده بر ساعته راست کورز . بو ساعت اول یرده
 کندولکنندن بولندی می؟ . انک موجود اولسنک سببی
 وارمی؟ . بر طاش کبی ابتدادن برو اوراده بولنش اولسی
 احتمال می؟ . ساعته دقتله باقدیغمزده بر استوانه شکنده
 بر صندوق ایچنده بر زنبورک کورورز او دخی اچملله
 صندوقی چویرر بر نازک زنجیر او زنبورک طولا یخغنه
 صندیغ حرکتی ربط ایدوب بر طاقم دیشلو تکرارلکار
 دخی نظام اوزره عقرب ایله یلقوغانی آیری و معلوم درجه
 سرعتله چویررلر . عقرب ایله یلقوغان دقتلیجه ترتیب و
 تقسیم اولنش بر مدور یوز اوزرنده حرکت ایدر بو یوز
 دخی بللورله قیالو اولور . بو و بونلر کبی شیلره باقهرق
 (ا) بوساعتک بر یاپیجیسی و مخصوص بر مقصدی
 دخی واردر دیو الزام اولق طبیعی اولوب بویله الزام
 اولماق ممکن دکادر .

(ب) کندومز ساعتجی صنعتندن اولیوب بر
 ساعتک یاپلیدیغنی یاخود بر ساعتجی کورمش و نه وجهله
 یاپلیدیغنی بیلمش اولور سهق دخی بو خصوصلر مذکور
 ساعتک یاپیجیسی بولنوب بولندیغنی مسئله سنه تعلق ایتمز

باب ثانی وجود الهیہ کا ثبوت اثباتی

ویا پچی انسان جنسندن اولسون اولسون ینہ مسئلہ
تبدل ایتز .

(ح) مذکور ساعت وقتک مرورینی نقصانسنز
وجهله کوسترمزسه دخی یاپچیسی اولوب اولدیغی
مسئلہسنه طوقنزانک معلوم مقصدی وار بناءعلیه یاپچیسی
وار اولدیغی استنتاج ایتک طبیعی و مقتضیدر .

(د) فرض ایدلم که ساعت ایچنده بولنان بعض
شیلر ساعتک مقصدینه طوغری ایشلیوب ایشلدیکنی
کوردمیز بوخصوص یاپچیسنک وار ایدوکنه خلل
کتورمز چونکه انک معرفتی کامل و یاخود نقصان
اولسی مسئلہسنه شمدی باقیورز انجق یاپچیسی وار و
ساعتک مقصدی واردر دیو قیاسمزه نتیجه ویرمکه مجبورز .

(ر) موجود اولان جسمانی و مادی شیلرک
کافه سنک بر درلوشکلی اولملی وبالطبیع مرامسنز و راست
کاه اولدرق اشته بعض شیلر ساعت دیدیکمز قالبه دوشمش
دینلورسه یالکز دیوانه ادملرک بویله سویلیه بیلدکاری و
یاخود بونی قبول ایده بیلدکاری بدیهی در .

(س) مذکور ساعت نظام روحی یاخود ترتیبات

فصل ثانی

ساعت تشبیهی

اصولی یا خود معدنیاتك قانونی واسطه سیله وجوده کادی
دینلورسه بونلر ساعتك یاپیجیسی یرینه قونیه مز • اصول
وقانون و نظام اسمای فاعل اولیوب دائماً بر یاپیجی یا مراد
صاحبی ایما ایدر • اصول و مرام و قانون عامل اولان
ذاتك ترتیب اوزره و بر نیتله عمل ایتدیکنی کوسسترسه ده
عامل اولان ذاتدن کلیاً تفریق اولنور •

(ص) ساعته باقده اولان ادمه کندی معلوماتك
نقصان اولدیغنی کوسترمکه دخی ساعتك یاپیجیسی وارد
دیو استنتاج ایتدیکنده ، اولان معلوماتك صحیح اولمسنه
خلل کتورمز • هر شیئی بیلدیگمزدن هیچ برشی بیلیر
دیمك محالدر • بر چوجق علم جر اقالده ماهر اولمسه ده
شاشرمقسنرین ایکی یی ایکی یه ضم ایدوب دردی
بوله یلور •

(ط) اگر مذکور ساعت کندی حرکتیله کندوسنه
مشابه بر ساعت دهها حاصل ایتك خاصیتنه مالک اوله رق
یابیش اولسه ایدی (اگر حقیقه بوممکن دکل ایسه ده تخیل
و فرض اولنه میه جق بر شی دکلدر) المزده بولنان ساعتك
یاپیجیسی یوق انجق ساعت ساعتی وجوده کتورر دیه مز

باب ثانی وجود الهینک کائناتله اثباتی

ایدک فقط بویله صنعتلو ساعته تعجب ایتمکه برابر دها زیاده
 کندوسی کی ساعتلر حاصل ایتمکه مقتدر اولان بر ساعتی
 یاپان ادمی مدح ایدر ایدک . چونکه المزده بولنان اثرک مقصدی
 نهایتده صاحب عقل بر موجبی یاخود بر فاعلی طلب ایدر .
 ساعت هر نه قدر هنر کوسترسه کوسترسون عقل صاحبی
 دکدر . حاصل اولان ساعتک پارچه لرینی وجوده کتوران
 ساعت انک یاپیجیسی اعتبار اولنورسه ساعتک مقصدینی
 ایجاد و تخصیص ایدن فاعل ساعتدر دیمک . اشته بوتصور
 محالدر . و اگر ساعت ایچنده بولنان بر معرفتله وجوده
 کلان ساعتلرک صره سی و عددی نهایتسز اولسه بیله ینه
 اول کیفیت دها زیاده ابتداده انک یاپیجیسی بر عقل صاحبی
 فاعل اولدیغنی اثبات ایدر . مرام وار ایسه مرام صاحبی
 وار . عقل ایما ایدن اثر وار ایسه عقل وار .

منتظم اولمیان ماده حقنده بو اثبات میدان بولماز اما
 ترتیب اوزره مرامه طوغری ایشلیان ماده نره ده ایسه انک
 سبب اصلیمی عقل صاحبیدر دیو قبول ایتک ذهنلر مزک
 مطلوباتنددر . معمول وارمی اوپله ایسه فاعل و عامل
 واردر فقط تعریف ایتدیگمز ساعتده هیچ هنر و معرفت و

فصل ثانی انسانک کوزی حقنده

عقلک اثرلری یوق انجق ساعت ساعتی حصوله کتورر
دیمک خالق مستقل و مراد الهی بی هر طرفدن ایما ایدن
مخلوقاتنه نظر ایدوبده بر اللهک موجودیتنه اینسانلرک
اعتراضاتنه مشاهد.

❀ انسانک کوزی حقنده ❀

دوربین چوق معرفتلو بر آلت اولدیغی و انی ایجاد
ایتن ادم خصوصاً مدحه شایان اولدیغی مسلم ایسه ده کوز
هر خصوصاً دهها زیاده معرفتلو بر شی اولوب انی
تشکیل ایدن ذاتک علم و حکمتنی بیان ایدر . کوز دوربین
کبی ضیا پرتولرینک مرور و انعطاف ایتلری قانونی اوزره
تشکیل اولنش ایسه ده درجه سز دهها اعلا و قصور سز و
مرکب بر آلتدر . مثلاً ضیا پرتولرینک انعطاف قانوننه کوره
ضیا صودن کوزه کاورسه هوادن کوزه کچدیکنده طلب
ایتدیکی جامدن زیاده محذب بر جام استر . و بالغک کوزینه
باقیلورسه طبقه زجاجیه سی یاخود خلط بلوری
(Crystalline Humor) قره حیوانلرینک کندن زیاده

باب ثانی وجود الهینک کائناتله اثباتی

مدوردر • بالغی بولندیغی حاله مطابق قیلان کیم ایدی؟ ینه
 انسان کوزینک تعریفنه دونهلم • برشی کورمک ایچون کوزک
 دیدنده کورنان شیئیک اوفاجق اما صحیح بر صورت و
 مشابهنک تشکیل اولمسی لازم کلور • نیچون لازم و قوه
 بصرك بو صورت ایله اولان علاقه سی نه دن عبارت
 اولدیغی تعریف ایتکه مقتدر دکل ایسه کده بو کیفیت
 در دست بولنان مسئله یه طوقمز • هرادم دورینک جاملرینک
 شکالری و ترتیبلرنده معرفت و مرام واردر دیو تسلیم ایدر •
 بعینه اولوجهاله و دها زیاده هنرلو و قصه ورسر طرزله
 تشکیل اولنان کورک زجاجی طبقه لرنده مرام و معرفت
 الهیه مشاهده اولنور • دورینجیلر انجق کوزک کالنه
 باقهرق براق بر طرزله برشی کوسترمک ایچون بشقه
 بشقه جاملر یامغه مقتدر اولدیلر •

برده کوز دوریندن ایکی خصوصده زیاده سیله افضل
 بر آلتدر • آولا کوز بعضا ضیانک بولغنده و بعضا آزلغنده
 کورمک استر • بونک ایچون کوز بیک کیندولکندن
 یویوب کوچولمکه مقتدر اولدق تشکیل اولمشدر و هر نه
 قدر بو کیفیت کوز صاحی اکاه اولقسزین وقوع

فصل ثانی انسانك كوزى حقنده

بولور سه ده ينه بر طاقم غايتله نازك و كامل عضلاتله حاصل
اولور . ثانيا كوز ياقين و اوزاقدن مساوات اوزره اشكاره
كورمك ايچون كندولكندن صاحبنك ارادتي اولمق سزین
دكشور شويله كه برقاق پرماق مسافه و برقاق ميل مسافه ده
اشكاره كوره بيلور . بو خاصه قوشلرده دها قوتلو اولوب
دقته شاياندر . بالقلك اوزاغه باقغه احتياجلري اولديغندن
كوز بېكارينك بيويوب كوچولمك خاصه سي يوقدر . ييلان
بالغي چامور لو يرلرده حركت ايتكه مجبور اولديغندن كوزى
اوزرينه چكه ييله جكي بر مخصوص دريسى واردر
و بويله جه كوزى ضرر چككمكدن حفظ اولنور .

ما كينالرده كندولكندن نظام حفظ ايدوبده
كندى قصورينه چاره بولان نوعى غايتله مدح اولنور
و ايجاد ايدنلك فوق العاده معرفتي بونده بيان اولنور سه
كوز و انك خالق حقنده نه دينله بيلور ؟ بو مخصوص دخی
دقته شاياندر كه بردن كوره بيلديكمز چوق شيلر طاغلر تپه لر
اغاجلر اولر اووه لر طاوار و سوريلر ك صورتى كوزك ديبنده
كوچك پرماغك طرناغى قدر بيوكلا كنده ايسه ده پك براق
بر صورت اولسى هر شيئى اصل هيئتنده تشخيص ايده

باب ثانی وجود الہینک کائناتلہ اثباتی

بیلدیکمزدن استنتاج اولنور • قنغی رسام بویله برشی
یابه بیلور؟ اما کوزک یایجیسنک معرفتی اول نازک عضوک
هر خصوصنده دخی عیان و مستباندیر • چوق محافظه لو
برده محفوظ اولوب انک اطرافنده یدی عددکیک علی الدوام
بکجیلک ایدر • قاش دخی انی تردن حفظ ایدر •

کوزک محافظه سی ایچون دقت بولندیغی مثلاً
راحتی ایچون دخی یاغ ایله قایلانمشدر و کوز قیاغی کوزی
اینجمنمکدن حفظ ایدوب انی سیلر و اویقو اثناسنده انی
قیار و اورتر •

بو امثالسر معرفت تصادفی یاخود راست کله برشی
اولدی؟ کوزی ییقامق ایچون کوز اوستنده برنازک قیو
واردیر • انک صوی کندی خدمتی ایفا ایتدکدن صکره
بردلیکدن بورونه دو کیلور و بعض حیوانلرده باخصوص
قوشلرده بر اوچنجی قیاق واردیر و لازم اولدیغی تقدیرده
بو کوز اوزرینه کاور • بونک واسطه سیله قارتال کونشه
باقه بیلور •

بویله شیلری ترتیب ایدنک معرفت و مرامی اشکار
دکلی؟ •

فصل ثانی انساک کوزی حقنده

بوراده بر سؤال و اعتراض ایراد اولنور . یعنی
 « خالق مطلق هر شیئه قادر اولدیغندن کوزده کوردیکمز
 مرکب و نازک اعضا واسطه سیله قوه بصر و یرمه دن
 ایسه واسطه سز و یرمه که قادر دکل ایدی؟ مرامنی فعله
 کتورمک ایچون واسطه لر قوللانیق مخلوقه عائد اولوب
 ضعف علامتیدر » اشکاردرکه بو اعتراض یالکز کوز
 حقنده دکل بلکه هر مخلوق شی حقنده دخی ایراد اولنه
 بیلور . بوکا جواب اوله رق بونی بیان ایتک کفایت
 ایدرکه اللهک صفتلری یالکز قدرتدن عبارت دکل انجق
 حکمتنی دخی بیان ایتک ایچون انسانلر اراسنده بولنان معرفت
 و هنر مشابهنده افعال اجرا ایدر . یوقسه حکمت الهیه بزم
 حکمت و معرفت دیدیکمز شیلردن کلیا فرقلو برشی اولسه
 ایدی اللهک حکمتنی فهم ایتکه مقتدر اوله ماز ایدک . و برده
 الله تعالی بالذات قوانین طبیعیه نک کافه سنی تخصیص ایدی
 ایسه ده خلق ایتدیکی مخلوقاتک اعضا و مطابقاتنی تخصیص
 ایتدیکنده قوانین مزبوریه مطابق اوله رق انلری خلق
 ایتسی مأمول اوله جق برشیدر . الله کندی تخصیص
 ایتدیکی قانونلری بر طرف ایدوبده صکره مجرد قدرتیله اول

باب ثانی وجود الهینک کائناتله اثباتی

قانونلره مغایر معامله ایدرسه حقیقته معاملات الهیه حقنده
برشی او کر نه میر زیرا معلوم اصول اوزره اجرا اولنماش
اولور .

❀ انسانک قولاغی حقنده ❀

قولاق کوز مثللو مخصوص برایش ایچون معرفت
کامله ایله تشکیل اولنمشدر . کوز خیانک قانونلری اوزرینه
تشکیل اولندیغی مثللو قولاق هوانک دتره مسی قانونلری
اوزرینه تشکیل اولنمشدر . قولاغک خارجی قسمی هوانک
دتره ملرینی طوتمق ایچون ککشجه یاپلشدر . باخصوص
بعض حیوانلرک قولاقلری مثلا آو کوپکارینک کی بویله تشکیل
اولندیغی معلومدر .

قولاغک خارجی قسمندن باش ایچنه طوغری صوتی
نقل ایدن بر بورو وارددر و اول بورونک اوجنده طاویل
کی چکلمش بر دری وارددر . اندن ایچرو صوت درت
عدد کوچک و نازک میککار واسطه سیله بینه واصل اولور .
طاویل کی اولان دری ایسه ایکی طرفده هوا استر بونک
ایچون اغزک ارقه سنده بر کوچک بورو دها بولنور .

فصل ثانی حیوانات و نباتاتک تولداتی

بر خصوص صده قولاق کوزدن زیاده معرفت الهیه یی
 بیان ایدر شوبله که هر نه قدر کورمک ایچون انسان معرفتیه
 کوزه مشابه آلتیر یعنی دور بینلر و خرده بینلر یاپیش ايسه ده
 ایشتمک ایچون انسانک صنعتی و هنریله قولاغه بکزر اصلا
 برشی تشکیل اولنماشدر. قولاق کوز مثللو انک یاپیچیسنک
 مرامنی و فوق العاده هنر و حکمتنی کوستردیکی درکاردر.
 انسان بدنک بشقه اعضاسنک تعریفنه کچمزدن
 اول دها بعض عمومی شیلری بیان ایتک مناسبدر.

❀ حیوانات و نباتاتک تولداتنه دائر ❀

بر بغدادی دانه سی تخم اولوب کندی مثانی حصوله
 کتورمکه قابلیت و اردر اما حاصل ایدن همده حاصل
 اولان شی البته ارادت صاحبی دکادر فقط برقانونه تابعدر
 و اول قانونی وضع ایدن و اول شیلری ایشلدنک مرام و
 مقصد مخصوصی اولدیغی انکار اولنه میوب علم حیات و
 نباتاتده دقتمزی جلب ایدن مطابقات نشانه لرینی منصفانه
 تحری ایدنلرک اقرار عمومیلرندن در.

باب ثانی وجود الهینک کائناتله اثباتی

تخمدن یمورطه لره کچم • مثلاً بر طاق یمور تلامدیغی
یمورطه یه شکل ویرمز زده قالدی که انک خاصه حیاتیه سی
انک مرادینه تابع اوله • طاق یمورطه نک ایچنی ونه وجهله
اندن پیلج حاصل اوله جغنی بیلورمی؟ کندوسی بر کور
و اولو آلت کی یاوریسنی میدانه کتورر • مرام و مقصد
طاق و پیلجی رادانه مخصوصدر •

و اگر حیوانلرک جنسلرندن کچوب انسانه کلورسه ک
بر پدر و یاخود والده کندی چوجغنک جسدینک تشکیلی
اوزرینه بالاراده نه تاثیر ایده بیلور • اک عاقل و اوقومش
ادم صوک درجه جاهل اولاندن زیاده مکمل بر جسم تولید
ایتمکه مقتدرمی اولور؟ انک عقلی بو باده عاجز در • بر
چوجغنک مکمل و خالقنک حکمتنی بیان ایدن جسدینک
اعضاسنی تشکیل ایتمک الله دیدیکمز موجب اصلی و اراده
صاحبنه مخصوصدر •

❖ مخلوقات متنوعیه دن آنان برهانلرک هربری ❖

❖ کندولکنده مکمل برهاندر ❖

اگر ساعت تمثیلی خاطره کتوریلورسه درکار

فصل ثانی هر برهان کندیلکننده مکمل

اوله جقدر که اوراده ذکر ایتدیگمز سکر خصوصده
اعتراض ایراد اولنورسه اوراده جواب ویردیگمز کی
کوز و قولاق و سائر شیلر حقنده دخی جواب ویریله جکدر .
برده دفته شایان در که اللهک یعنی مرام و مقصد صاحبی
بر خالق مستقلک وجودی کائناتدن اثبات اولندیغنده اثبات
و برهانلر مز بر زنجیر کی دکلدر که ذکر ایتدیگمز دلیللردن
بری ضعیف و نقصان چیقدیغنده بتون امکمز بوشه
چیقمش اولسون . انجق هر بر دلیل و برهان و تمثیل
آریجه و بشقه سنه استناد ایتکسزین اللهک وجودینی
اثبات ایدر . الله طانیدیغمز مقصد صاحبی و مرام ایدیچی
بر خالق موجود اولینجه کوز اصلا وجوده کله مز ایدی .
کذلک قولاق حقنده دیه یلورز و غیر هم . بویله جه کائناتی
نه قدر ککشجه ارشدیروب تفتیش ایده جک اولور
ایسه که اللهک موجودیت و حکمتی ایچون اولقدر آیری
و مکمل برهانلر بولش اوله جغز .

❀ تحت تفتیشه کلیان اعضا و احوال ❀

برشی دها چوق دفته شایاندر که انسانک جسدی

باب ثانی وجود الهینک کائناتله اثباتی

وانک اعضاسی حقننده علمک یتشدیکی درجهیه قدر
تفتیش و بولدیغمزی بیان ایتدکن صکره ینه بیان
ایدهمیه جکمز و بلا شبهه برقات دها علم الهی بی اظهار
ایدن دها چوق شیلر بولنور . مثلاً معدده طعماملرک
هضمی ایچون بولنان صونه دن عبارت اولوب و هر درلو
شیئی نصل اریدوب تبدیل ایده بیلدیکنی کیمسه تعریف
ایده مز . علم کیمیا دخی بونی بیان ایده ممشدر . بر خفیف
صویه بکزر اما غایتله قوتلودر و معدده دن کچدکن صکره
طعماملر نه وجهله قانه تبدل ایدر؟ و قادن دخی نه وجهله
ات و کیکلر تشکل ایدر؟ بونی علم کیمیا اراؤه ایده مز
و ارباب علوم بوستره دها واقف اولمدیلر . برده انسانک
جسدنده یکرهی نوع بز یعنی بیضلر بولنوب نه قدر آبری
ایشلر اجرا ایدرلر . بونلری تفصیلات اوزره تفحص ایتک
ممکن اولسه ایدی کوزده کوردیکمز قدر حکمت
کورینه جکی بی اشتباهدر . تفتیش ایده بیلدیکمز اعضا
اک زیاده درونی و بلکه حکمت الهیه بی زیاده اشکاره
کوستران اعضا دکالردر .

❖ انسانک بدنی حقنده ❖

انسانک جسدنده هر بر کیک و سکیرو عضله و عصبه و مفصل و بیض و طامار آیروجه تفحص اولندیغنده جسدک خالقنک حکمتنی بیان ایدر . یالکز بعضلرینی و بونلری ده مختصرجه ذکر ایتدکن صکره تفصیلات ایچون علم حیات بدنییه مراجعت ایتک لازمدر .

(۱) کیکلر . بدنک ارقه کیکی یعنی بل کیکی خالقنک حکمتنی واضحاً بیان ایدر . بو کیکک هم محکم و قوی هم اکیلور صورتده اولمسی لازمدر . همدخی ایلیمکک محافظه سی ایچون بورو نوعندن اولمسی اقتضا ایدر . با خصوص بویون کیککاری نه قدر معرفتلو اولملی که باش ایکی درلو و بری برندن فرقلو اولان حرکتیه مساعد اوله و بتون بل کیککی بری برینه چوق محکمجه باغلنش آیری مهرهلردن عبارتدر . بریلانک بل کیککی خصوصی طرزله تشکیل اولنور . آیری کیکلر یعنی مهرهلر بری بری ایچنده طوب و چقور شکنده برنوع اویناقله اوینار . چونکه ییلان

باب ثانی وجود الهینک کائناتله اثباتی

ایچون محکمک مقتضی اولیوب انجق سهولتله ایکمک
قابلیتی لازمدر .

نفس آلق ایچون کوسک ککشلمسی قابور غه لرك
اشاغی کلمری اوزرینه مبنی در یعنی یوقاری چکن عضلات
بوکیکاری ایلرو چکرلر و بویله جه نفسک ایشلمسی ایچون
یر پیدا اولور . قولده بولسان کیکارک ترتیبی و استعمالنه
اولان مطابقاتی دقته شایاندر . دیرسک ایله الی بری برینه
ربط ایدن ایکی کیك بولنوب بوکیکلردن برینک اویناق
یری دیرسکده و دیگرینکی بیلکده بولندیغندن قولک
درلودر لواحر کترلرینه مساعدی و اردر . و انسان ایچون
النی چوق معرفتله استعمال ایتک لازم اولدیغی و قولنک بو
استعماله مطابق تشکیل ایدلیدی هر ادمک دقتنی جلب
ایدر . دیز کیکی دخی انسانک جسدینی خلق ایدنک
حکمتنده نه درجه نازک و اینجه معرفتله بولندیغنی
کوستر . کوچک چوجقده دها کیك اولیوب انجق
قیقرداق اوله رق دیز مفصلنی محافظه ایله بجاقد بولسان
عضله لرك حرکت ایتلرینه وزده لنمسنه یاردم ایدوب مرور
زمانه بوندن بر محذب کیك پیدا اولور .

(۲) کیکارک باشلرنده بولنان مفصلار بلکه کیکلردن زیاره دفته شایاندر . زیرامعرفت و مقصد بولنرده دها زیاده اعلا و دقتی جذب ایدر صـورتده کورنور . بومفصلار جنس جنس و هر بری یرینه و استعمالنه مطابق اوله رق تشکیل اولندی و بولنرک بر تکی اول یرینه غایت قوتلو باغلرله ربط اولنمشدر . مثلاً بجاغک باشنده بولنان طوپ و چقور صورتلو مفصلده بر باغ طوپک باشندن چقورک دینه کچر و انک قوتی اولقدر چوقدرکه انجق افراط درجه سنه واران بر قوه مجبره بجاغی یرندن قلداده بیلور .

ایاقده بولنان مفصل مرکب و چوق مصنع صورتده اوستنده کی کیکارک باشلری واسطه سیله حفظ اولنور . و سالف الذکر مفصل و اوموزده بولنان مفصل بر جنسدن یعنی طوپ و چقور دیدیکمز جنسدن ایسه ده اکر بجاغک باشنده بولنان مفصل اوموزده اولوب اوموزده کی مفصل بجاغ باشنده اولسه ایدی بر ادم ایاقلری اوزرینه غایت کوچلکله طوروب یورویه بیلور ایدی . قوللرایسه نه قویجه یرلرنده طورورلر نه ده قوللرک اصل استعمالنه مطابق بولنور ایدی .

باب ثانی وجود الهینک کائناتله اثباتی

بو مفصللرده بر معرفت دهها وارد در • معلومدر که
طامارلر و سکیرلر جسدک هر طرفنه منتشر اولور ایکن
مفصللاردن کچملری لازم کاور و طامار و سکیر کی نازک
شیلرک زده لئمسی ایچون کمال دقت اقتضاسی بدیهیدر •
بو طامار و سکیرلرک زده لئمکسزین و لازم اولدیغی درجه
محافظه اولنهرق کیلرک باشلرندن و مفصللاردن کچملری
ایچون کیلرک باشلرنده اوفاجق اولوقلر بولنور و بویله ده
انسانک جاننک حیاتی اولان قان اول تهلیکه لو یرلردن
سلامتله کچر • مفصللرده بر معرفت دهها وار یعنی هر
برسی یاننده بر یاغ بیضی بولنور و بونک واسطه سیله
دوام اوزره و بلکه سکسان سه قدر استعمال اولنان
کیلرک کوزجه حفظ اولنور •

برده کرک کیلر کرک انسان جسدنک بشقه قسملری
مرور زمانله فنا بولوب تازه لئمکده اولدقلری ارباب علومک
معلومیدر • و جسدک کندیسنی بو قدر سهلر تعمیر و احیا
ایمک قوتنه مالک اولسی جسدک خالقنک صاحب حکمت
و عنایت اولسنه واضح بر دلیل دکلر در

(۳) عضلات حقنده • عضلهلر مفصللاره مطابق

عضلات

فصل ثانی

اوله رق تشکیل اولنمشدر . بر حرکت مساعده اولان
مفصللره اول حرکتی پیدا ایدن عضله بولنور . او موزده
بولنان مفصل کی مفصللار ایچون دها چوق و مرکب
عضله لر خلق اولنمشدر . یکی طوغمش چوجق کندی
باشنی بیله قالدیره ماز چونکه بویونک عضلاتی اول قدر
یوک قالدیرمغه کفایت ایده جک قوت دها کسب ایتمشدر .
حرکت ایدن شیر عضلاتدر . کیک و مفصللار اولسه
ایدی عضلاتک حرکتی ایچون تممل اولماز ایدی . عضلات
اولسه و حتی مفصللارک جنسنه مطابق بولنسه ایدی
مفصللارک فائده سی اولماز ایدی .

عضله لر یالکیز بر درلو حرکت مساعدهر بواء علیه
هر عضله نک مقابلی واردر . مثلاً ال قالدیردیغمزده بر عضله
حرکت ایدر و انی بر اقدیغمزده اول عضله چوزیلور
و انک قارشوسنده اولان عضله چکر . بر بیوک بیچغینک
ایکی ادمک الریله ایشلنیلر عضلاتک بو حرکتلرینی تمیل
ایده یلور .

عضله لر بعض دفعه ایشلندکری مفصللاردن اوزاق
بولنور مثلاً ال ایشلدا ان عضله لر قولده در . و بو حالده عضله لر

باب ثانی وجود الهیہ کائناتہ اثباتی

تللر کبی سرت و محکم سکیرلر واسطه سیله حرکت ایدرلر
 ال دخی هم کوزالیکنی محافظه ایدر همده ایشنی کورور .
 عضله لر بری بری اوزرندن و بعضا بری بری ایچندن دخی
 کچرلر . بری بریله صاریلور وینه جسده بولنان عضلات
 درت یوز قرق التی عدد ایسده بری برینه ثقلت ویرمز .
 عضلاتک بعضلری چوق سرعتله حرکت ایدرلر . مثلاً
 موسیقه جینک پرمالری . بعضلری دخی اراده انسانیه نک
 تحت اداره سنده اولیه رق کندولرینه تعین اولنان ایشی
 یورلمق سزین و شاشرمق سزین اجرا ایدرلر مثلاً یورک
 (که مرکب برعضله در) و تنفس ایچون بر دوام حرکت
 ایتکده بولنان عضله لر .

(٤) جسده اعضاسنک ترتیبی حقنده .

بوراده اوچ شی خصوصاً دقته شایاندر و بو
 شیلرک بری برینه مطابق اوله رق ترتیب اولملری جسده
 خالقنک حکمتنی بیان ایدر . جسده اعضاسنک ترتیبی
 استعمال و جمال و سلامته نسبتله تشکیل اولمشدر .
 سالف الذکر عضله لرک مفصلاره مطابق بولملری
 استعماله نسبتله وقوع بولمشدر و عضوک بری دکشدیکنده

فصل ثانی اعضا نك استعمال و جمال و سلامتہ نسبتی

محضا ضرر اولش اولہ جغی بلو در • حواس خامسہ
ظاہرہ نك دردی باشدہ یعنی بینہ متصل و اك فوقانی یردہ
بوانور مثلا قوہ ذائقہ اغزدن نقل ایدوب بشقہ یردہ قونلسہ
نہ قدر غیر مطابق اولور • بر ادم ییہ جکی بر شیئك طادینی
بولق ایچون انی او موزینہ و یاخود ایاغی التئہ قومغہ
مجبور اولسہ ایدی نہ قدر مناسبتر و ازیتلو بر شی
اولور ایدی • کوز قولدہ یاخود دیزدہ اولسہ انك استعمالنہ
نہ قدر مضرتلو اولور ایدی •

اعضا نك سلامتی دخی وجودك ترتیبندہ نہ قدر
کوزلجہ محفوظ اولور • بدن ایچندہ بولنان اعضا بری برینہ
باصمسون و یرلرندن قلدا نمسون دیو چوق باغلرلہ باغلنوب
اینجہ فقط قوتلو دیوارلر واسطہ سیلہ بری برندن آیرلشدر •
اك نازك و الزم اعضا کیکار واسطہ سیلہ حفظ اولنور •
مثلا قارندہ بولنان باغرسقلم بتون جسدك بویینك بش قاتی
اولدیغی حالده خصوصی بر معرفتله باغلنوب حفظ اولنمسه
ایدی کندی کندینہ بوغیلور ایدی •

جسدك ترتیبندہ خالقك جمالہ دخی نہ درجہ رعایت
ایتدیکی اشکاردر • اعضا نك بری برینہ نسبتلو اولہ رق

باب ثانی وجود الہینک کائناتلہ اثباتی

یاہلسی قانک جولاننک و معدنک حرکتنک و بیضنک
سوزمہ ایشلرینک و حرکات سائرہ درونیہ نک اور تلمش
اولملری جسدک جهانی ایچون برر وسیلہ در . انسانک
یوزندہ بولنان اعضایہ نظر اولنور سہ انک خالقنک جہالہ
رعایت ایتسی اشکار در . اعضا یا تک اولہرق یوزک اورتہ سندہ
اولور ، بورون و اغز کی ، یا چفت و مناظرہ لو اولہرق ایکی
طرفدہ بولنور . و ہر وقت بر طرفدہ بولنان عضوک شکلی
اولر طرفدہ کینک شکانک عینی در . مثلاً بر قوشک بر توینک
بر طرفی اولبری کی دکل ایسہ دہ بر قنادی اولبرینک مشابہت
کاملہ سیدر . قرق ایاق دیدکاری بوجکک بر طرفندہ اولان
ایاقلری بری برندن فرقلی ایسہ دہ بر طرفدہ بولنان ایاق انک
قارشو سندہ اولان ایاغک عینی در . اگر ہر وقت مشاہدہ
ایلدی کمزہ مخالف اولہرق بر ادمک بر کوزی بیوک و دیگری
کوچک یا خود بری سیاء و دیگری ماوی یا بری صاغ
یکاغندہ و دیگری آلتنک اورتہ سندہ اولسہ ایدی چہرہ سی
نہ قدر چرکین اولہ جق ایدی . اگر بو حسن حال دیدیکمز
شی یالکز آلمغہ مخصوصدر دنیلور سہ ینہ اشکار در کہ
انسان و سائر مخلوقاتک تشکلی حسن و جمال قانونی اوزرہ

فصل ثانی حیوانلرک لباسی حقنده

اولسه ایدی حسن و جمال دیدیکمز شی نه دیمک اولدیغنی
تصور بیله ایده مز ایدک . عموما دیه بیلورز که انسان جسدینک
اعضاسنک تشکلی و ترتیبی امثالسنز درجه ده جمال کاملی
کوسترر . بو کیفیته واقف اولان قدیمی یونانیلرک معرفتیه
مر مردن یونلمش انسان صورتلری تا بو کونه قدر قائم
اولوب الا آن اصحاب مدنیتک ممدوحیدر .

❖ انساندن غیری مخلوقاتده خالق مستقلک موجودیت ❖
❖ و حکمتنی اثبات ایتک بابنده کائناتده مشاهده ایتدیکمز ❖
❖ مرام و مقصدلرک خلاصه وجهله بیانده در ❖

(۱) حیوانلرک لباسی حقنده .

قوشلرک تویلی واری . بالقلرک پولاری واری در . بشقه
حیوانلرک قیللری و پیاغیلری و تویلی بولنور . و بونلرک هر
برسی کندی بولندیغنی حاله مطابقدر . تویلو حیوانلرک
لباسی قیش مو سمنده ده ا زیاده اولور . پیاغیلو
حیوانلرک کی صیجاق اقالیمده قیله تبدل ایدر و اک صغوق
یرلرده کابلرک قیللری تویه تبدل ایدر . صو ایچنه کیمیان تویلو

باب ثانی وجود الهینک کائناتله اثباتی

حیوانلرک تویلی صرته صیق اولوب قارنده سیرک اولور .
و صو ایچنه کیدنلرک تویلی قارنی اوستنده زیاده صیقدر
قوندوزکی . قوشلرک لباسی انلرک بولندقلری حاله یعنی
هوایه مطابق اوله رق خفیف و غایتله کوزل در . قیش موسمی
شدتلو اولان یرلرده کوردیکمز کوچک قوشلرک تویلی
ایچروده صیق همده سیاهدر (معلوم در که سیاه صیجاق
طوتان رنگ در)

(۲) درت ایاقلو حیوانلرک قوشلر و بالقلر ایله
تطبیق اولنملری حقنده .

قوشلرک خفیف بولنملری ایچون کیکلرینک ایچلری
بوشدر برده هوا آق جکرلرندن بدنلرینک سائر یرلرینه
سرایت ایدوب انلری هواده دهاسهولتله اوچدرور .
قوشلرک یاوریلری یمورطه دن حاصل اولسی و یمورطه لری
برر برر براقلری قوشه آغریق ویرمن . بر قوشک قنادلری
دخی درت ایاقلو حیوانلرک اولک ایاقلرینه و انسانک
قوللرینه بکزر . کیکلرینک عددی و مفصللارینک شکلی بردر .
لکن قنادلر بر نوع حرکت و ایاقلر بشقه نوع حرکت
مطابق اوله رق تشکیل اولمشدر . بر بالغ بدننی اغر

فصل ثانی مقصدك شایان دقت بعض علامتلى

اولوب انك حرکتی ایچون اولان اعضاسی قره ده و هواده اصلا کافی اولماز ایدی اما صو ایچنده حرکت ایتکه تماما مطابق اوله رق تشکیل اولندی . بالغك بدنی ایچنده دخی بر هوا طوبره سی اولوب شویله که انك بولندیغی هو انك از لغنه و دهها چوقلغنه کوره حرکت ایتکه مقتدر اوله و قره حیوانلرینه نظر اولندیغنه بعض مطابقات مخصوصه یی کورورز مثلا کلبلك بورون و قولاقلى و یرتجى حیوانلرك قولاقلىنك ایلرو ایگلملى و قچاق حیوانلرك (مثلا طوشانك) قولاقلىنك کيرو ایگلملى آیریجه کیندو طبیعتلرینه مطابق اولور . کدینك و بایقوشك کوزلى کچه ده ایوجه کورمك ایچون تشکیل اولندی و بو مثلاو تمشیلاری بی نهابه ذکر ایتك سهولتلودر .

(۳) حیوانلرده بولنان و خصوصاً دقته شایان

بعض اعضا و مقصد علامتلى بیانده در .

یاوریلری دیری اوله رق طوغران حیوانلرده اول یاوریلرده تداركات مخصوصه بولنور . دهها طوغنامش یاورینك کندی بولندیغی حاله دکل انجق بولنه جغی حاله مطابق اولان اعضالری واردر . مثلا کوز و آق

باب ثانی وجود الهینک کائناتله اثباتی

جگر که رحمة ایکسینک ده لزومی و استعمالی یوقدر و
یکی طوغمش یاورینک دها دیشی بولنمبوب صکره لازم
اولدیغنده دیشلر حاصل اولور مثلا بر چوجغک اغزنده
وقتیله و ارقه سی صره میدان کله جک ایکی طاقم دیش
واردر. بونوزلو حیوانلر طوغدیغنده بونوزلری یوق
اولسه ایدی امرور ایکن اناسنه موجب اذیت اولور
ایدی.

قوشلر اغاجلرک دالاری کبی کوچک شیلر اوزرینه
قونه رق اویورلر و اکر انلرک ایاقلرینه دقتلیجه باقلورسه
کوریلور که بالطبع بدنلری ایاقلری اوزرینه باصدقجه
ایاقلر قپانورلر و قوش روزکار شدتله اسدیکی حالدیه بیه
سلامتله طورور چونکه قوندیغی داله میخلنمش کبی
قائمدر. بعض قوشلر بالقیرلر و بونلرک اغزلرینه باقلدیغنده
دستره کبی سیوری و کوچک دیشلری بولنور شویله که
قیاق بالغی طوتدیغی کبی قویور مسون. اغاج قاقان قوشی
چوروک اغاجلری دلوب انلرک ایچنده بولنان بوجکاری
یر و فاغه سی بورغو کبی اولدقدن بشقه بر اوزون و
سیوری دیلی واردر. اوت و ذخیره و میوه بیان حیوانلر

فصل ثانی مقصدك شایان دقت بعض علامتلى

ات بیان یرتجی حیوانلر ایله تطبیق اولنورسه دیشلرنده قارنلرنده و پك چوق بشقه خصوصلرده بیوك فرق بولنور .
 فیلك خرتومی چوق دقتہ شایاندر . فیلك بوی و بیوكلی بر اوزون و باشنی قالدیرمغه مقتدر اولان بوینه مساعده ایتمز . بوکا بدل انك خرتومی هر طرفه چویریلوب ییه جکنى و ایچه جکنى آلور همدخی انی بر سلاح کبی قولانور .

استاقوسك قابوغنده تعجب اولنه جق برشی واردر بشقه قابوقلو حیوانلردن مثلاً قابلوباغه یاخود میدیادن فرقلیدر . بونلرك قابوقلى بدنلى ایله برابر بیور . فقط استاقوسك قابوغی چوق مکلف ، طاش کبی سرت هم ایاقلى اوزرنده بولندیغندن اول طرزله بیومکه مقتدر دکدر . بو حیوان بیود کجه قابوغی کندیلکندن چوزیلوب دفع اولنور بعده استاقوس محافظه لویره چکیلوب قرق سکز ساعتده بر قابوق دهاییدا ایدرك حیوان یکیدن کینمش اولور .

قوشلرك دیشلى اولیوب یرتجی اولنلرك غاغه لری قیناقلری کبی سیوری اوله رق یدکلى اتی پارچه پارچه

باب ثانی وجود الهینک کائناتله اثباتی

ایدرلر و ذخیره و سبزه‌یی میانلر کندی قورساقلری ایچنده
یه جکلرینی چیکنرلر • ایاقسز و سورنان بوجکلرک یورومسی
ایچون بدنلرینک اوزانوب چکلرلی مخصوص بر معرفت
و مطابقاتی تفهیم ایدر • اورمچکک آغی اکا بر وسیله درکه
کندی ییه جکی ایچون طوته مدیغی حیوانلری یانسه جلب
ایده و بو آغی کندی قارنده بولنان لعاب کبی بر شیدن
یاپار • انی اوافق دلیکلدن کچوروب اینجه اینجه تلار چکر
و انلردن بر آغ اورر • کذلک ایپک بوجکی کندی
باغرسقلرینه صاریلو و طوغرلدیغنده اون پرمق بوینده
بولنان طوبره دن ایپکی ایکورر •

برر برر هر جنس حیوانی ذکر ایتک ایچون دردست
بولنان ایشک مساعده ایتیه جکی اشکاردر • نه ده قالدی که
انلری تفصیلات اوزره بیان ایدلم • بوجکلرک آیری
جنسلری بیکلرجه در و کوزله کوریله میان حیواناتک
صایسی میلیونلرجه میلیونلر اولوب هربری خالقنک
مرام و معرفت و حکمتی بیان ایتمکده در •

فصل ثانی حیات نباتیه ده مقصد علامتتری

{ فصل ثالث }

❀ حیات نباتیه ده مشاهده اولنان مرام ❀
❀ و مقصد علامتتری ❀

نباتاتک بحشه کیرمک دخی دردست بولنان ایشه
مناسبت آور زیرا انلرده دخی خالق مطلقک مقصد
و حکمتنی پک اشکار اوله رق کوره یلورز • نباتاتک
تخمدن بتلری، چیچکلنوب کوزلاک کوسترملری، میوه لرینک
موسملرینه مطابق اولملری مثلاً اک صغوق اولنلرک
اک صیجاق اقالیمده بتلری خالق مطلقک احتیاجات انسانیه
حقننده اولان عنایت ازلیه سندن ایلرو ککلدیکنی
تأکید ایدر • فقط بو بحثک لایق وجه اوزره مناظره سی
ایچون الده اولان ایش مساعده ایتمز و نتیجه سی علم
حیات حیوانیه نک نتیجه سی مثللو حتی عینی انک کبی
کائناتده مشاهده قلنان مقصد و مطابقاتی یعنی موجب
عقلک هرشیئی معلوم و مفید نتیجه یه طوغری خلق

باب ثانی وجود الهینک کائناتله اثباتی

و ترتیب ایتمش ایدوکنی کوستردیکی ارباب علومک معلومیدر . بوجهله ایله برابر معلم آلکسان افندی بزجیانک تألیف ایتمش اولدیغی ائاردن اتی الذکر جزئی استخراجاتی درج ایدرز .

انسان فکرنک عجیب قابلیتلرندن بری بو درکه آنده تعلیم و تربیه ثمره سی و یاخود اثبات و استدلال نتیجه سی اولیان معلومات و تصورات بولنور . بولردن بریده موجب و اثر علاقه سنک تفهیمیدر یعنی عالمده هیچ بر تبدل کندیلکندن حصوله کله مز انک حصولی ایچون اندن اول کافی بر قوتک یاسبیک لزوم وجودینی تصور ایتکدر . چوجغک کیم ؟ نصل ؟ و نیچون دن عبارت اولان بیک بر سؤالری فکرك درین منبعندن اقان آقندیلردر . بر چوجغک هر کون باغچه ده قائم طوردیغنی کوردیکی بر اغاجی بو کون دویرلمش بولدیغنده درونندن قاینایان سؤال دیلندن اول یوزندن مشاهده اولنور . بونی کیم ایتمش ؟ . اغاج نیچون دویرلمش دیو سؤال ایدر . هر اثر کندندن اول موجود اولان بر قوت یا موجبیه دلالت ایدر . انجق اثرلرده شو فرق وارکه بر طاقی

فصل ثالث نباتاتك تشكلى

فيزيقي ياخود طبعي قوته دلالت ايدر ايكن ديكر طاقى
يعنى كوپرى و بنا دوشنان برقوته دلالت ايدر و عاقل
اولان بر موجبي كوسترلر . چونكه صكره كيلر اوزرنده
هنر و مقصد اثرلى وار در هنر و مقصد ايسه دوشنان
و عاقل بر ذاته مخصوصدر .

❖ نباتاتك تشكلى ❖

نباتاته تورهمرينك طرزي طرفندن باقلدقده چيچكلولر
و چيچكسزلر ناميله ايكي بيوك طاقه منقسم اولوب اولكيلر
يعنى چيچكلولر تخم يتشدرهرك جنسلريني تخم واسطه سيله
دوام ايتدرر . صكره كيلر يعنى چيچكسزلر غيرى يولارله
توره يوب نباتاتك دون طاقندن صاييلور .

آرپه، بغدادى، مصر داريسى، باقله، نخود و بادام
كبي بعض تخملرى بر مدت صوده ايصلتدقدن صكره
تفتيش ايدىجك اولور ايسهك كورورزكه باقله نخود و
بادام اورته سندن قولايجه ايكي يه شق اولنه ييلور . آرپه
بغداى و مصر داريسى ايسه اوليله اوليوب بر پارچه
قالور . نباتاته بو يوزدن باقلدقده تخمى بك پارهلى اولنلره

باب ثانی وجود الهینک کائناتله اثباتی

ذات الفلقه (Monocotyledon) و ایکی پارچه دن عبارت اولنلره ذات الفلقتهین (Dicotyledon) تسمیه اولنور .
مذکور ایکی طاقدن اولان نباتات آتیده کی خصوصاتله یکدیگر لرندن تفریق اولنور لر .

اولا آریه بغدادی و قامش کبی نباتلرده کوردیکمز اوزره ذات الفلقه نباتاتده پیراقلرک طامارلری علی السویه موازی اولوب فاصولیا طوت کراز و شفتالو کبی فدانلرده ایسه اکثریا کورندیکی اوزره پیراق طامارلری مشبک در .

ثانیا مصر داریسی و خرما اغاجنده اچیق کورندیکی اوزره یکپارهلر نباتلرده تخمک بیومسی بدنک دروننددر . دیگر بر طاق فدانلرده ایسه بیومه طیش طرفدن یعنی بدنک اطرافنه یکی یکی طباقه لر ضمیمه حادث اولمقده در . بو طاق نباتک بدنلری اکنه قات اولندیغنده خرما اغاجنک بدنی انقطاعندن بسبتون فرقلو اوله رق برچوق هم مرکز حلقه لر دن عبارت بر سطح کورورز .
ثالثا مذکور ایکی طاقی تفریق ایدن برخصوص دخی کوکاریدر . علی السویه مشاهده اولندیغی اوزره

ذات الفلقتين نباتلرده درینه قالین بر كوك اينوب انك
يانلرندن هر طرفه طوغرى افقى اوله رق بشقه كوكلر
طاغملقده در • ذات الفلقه اولنلرده ايسه ديكر كوكلردن
فرقلى و درينه اينان مر كزى بر كوك بولنمىوب بدنك
قاعده سنده مصر داريسنده كورديكمز كى صالقم كوكلر
بولنوب بولر طوپراغى چپ چوره قوجاقلر •

كلام تخمه • نه در تخم • مناسب حال و كيفيتلرده
اناسى كى مكمل بر نبات اوله يله جك مكتوم بر كوچك
فدان در • چوجقلق حالنده بر نباتدر • هر تخم اوچ
قسمدن عبارتدر • يعنى كوكك بدايتى (عرقى) (Radicle)
كوزى (Plumule) فلقه (Cotyledon) • بر از اول بيان
اولنديغى اوزره فلقه بعض تخملرده بر و بشقه لرنده ايكي
اولسيله ذات الفلقه و ذات الفلقتين تعبيراتى بوندن نشأت
ايتشدر • كوكك بدايتى و كوز بعض تخملرده آريجه
اولوب تخمك طيش طرفنده قولايجه فرق اولنور • نحوذك
بورنى ديديكمز بو در • بىغداى و آريپده اولديغى كى
بعض تخملرده اوراق و خارجى زارك آلتنده كيرلنمش
اوله رق تخم رطوبته مظهر اوله رق شيشديكنده ميدانه

باب ثانی وجود الهینک کائناتله اثباتی

کلور . بادام و امثالارنده اولدیغی کبی نیچه لرنده تخمک
ایکی فلقه سی مایینده محفوظ اولوب انلر نمناک طوپراقده
اچلدقلرنده بونلر دخی او زمان کورنور . لیکن شوراسی
دقته شایاندر که تخم طوپراغه هر قنغی موقعده دوشسه
کوکک بدایتی و کوز شاشماز صورتده کندی طوغری
جهتلرینی بولورلر . بری دائماً اشاغی میل ایدوب طوپراغی
بولور و انک ایچنده اوزانور کیدر اول بری ایسه دائماً
یوقاری میل ایدوب هوایی بولور و انک ایچنده اوزانور
کیدر . قیرلنغجک آرینک و قوندوزک ابقای وجودلری
ایچون مالک بولندقلری حواس طبیعییه تخملرده مشاهده
اولنان مذکور طبیعتدن دهها عجیب می در؟

❀ نباتاتک تعیشی ❀

تخمک اویانمسی یاخود فلیرنمسی ایچون هیسیندن
زیاده ایکی واسطه یعنی حرارت ورطوبت لازمدر . تخمک
اویانمسنه لازم کلان درجه حرارتی بیلک ایچون اجرا
اولنان مختلف تجربه لردن اکلاشلش اولدیغنه کوره درجه
حرارت فارنهایت میزان الحراره سیله ۴۱ دن اشاغی و

فصل ثالث

نباتاتك تعیشی

۱۱۰ دن یوقاری اولدیغی حالدده هر نوع تخم اویانه بیلور .
 دیمکدر که تخمك اویانمسی پك صغوقده و پك صیجاقدده
 ممکن اولیوب انجق مذکور ایکی حد مابینده اوله بیلور .
 بو کیفیت ایچون رطوبتك دخی وجودی شرط مطلق اولوب
 بواسطه لرك (حرارت و رطوبتك) تأثیری تحتنده تخمك
 ایلک حرکتك نه وجهله میدانله کلدیکنه جزئیجه عطف
 نظر ایدلم .

اویانمق بیومکه باشلامق دیمکدر و بیومك دیدیکمز
 حیواناتده نه طریق یاخود قاعده ایله اولور ایسه نباتاتده
 دخی همان اول قاعده ایله یعنی غذا آلق طریقله اولور .
 نبات کندی ییه جکینك بر قسمی کوکی واسطه سیله
 طوپراقدن ودها بیوک بر پایی پیراقلری واسطه سیله هوادن
 آلور . حالبو که آرپه و بغدادی مثللو طوپراغه اکیلان
 تخمده دهانه کوک و نه پیراق بولندیغندن بویله بر تخم
 ایلک دفعه اویانمغه باشلار ایکن حالیه کندی آزیغنی بونلر
 واسطه سیله آله من اول سبیدن بر از کوک سوروب بر ازده
 پیراغی اوزایوب بر یوزینه یاخود هوایه چیقجیه دک
 غداسی غیری بر یول ایله تدارك اولنمق لازمدر و بویله ده

باب ثانی وجود الہینک کائناتلہ اثباتی

اولشدر • فلکہ دیدیکمز اول قالین و اوزلو اولان و بادام
و فستیقده کورندیکی اوزره نیچہلرندہ یاغلو و طاتلو
اولان مادہ یکی اویانہ جق اولان کوزک ایلک ازیغیدر •
هنوز طوغمش چوجغک یانی باشندہ کندینہ مناسب بر
یہ جک تدارک اولمش اولدیغی مثلاًو تخم دیدیکمز نباتی
چوجقلرک دخی یانلرندہ ایلک یہ جکاری قونمش اولوب
بونلر دہ انی تغدی ایلہ یورلر • بورادہ بالطبع شو سوال
وارد اولور کہ بو آزیق کوچک فدانک یعنی تخمک دائماً
یاندہ بولمش ایکن تخم طوپراغہ قونمازدن اول نیچون بر
حرکت کوسترمیور ؟ نیچون اندن اول کوزی اویانمیور ؟
چونکہ آزیق فلکہ دہ موجود و حاضر ایسہ دہ تازہ فدانک
حالہ مطابق کلمی ایچون آولجہ بعض تبدلہ اوغرامسی
لازم کلور • فلکہ دیدیکمز بو قالین پارچہلردہ اولان مادہ
چوقجہ قاتی یاغ و نشاستہ دن عبارت در و بناء علیہ صودہ
اریمز مواددن اولملریلہ نازک کوزہ نفقہ اولغہ اویغون کلز •
بونلر شکر کبی صودہ قولای اریان نسنہلردن اولسہ ایدی
تخم طوپراغہ قونیله رق یردن کندینہ صو چکدیکندہ مطلب
حاصل اولوب نباتک ایلک احتیاجنہ درحال خدمت ایدر

ایدی . لیکن هر شیئی ایو ترتیب ایلمش اولان مرتب عالم
 بو باده دخی لازم اولانی کوزله تهیه ایلمشدر . شویله که
 بویاغ و نشاسته دن بشقه بر ماده تخمده جزئی بر مقدار
 اوله رق بولنوب نباتک ایلاک غداسی او اولور .
 تخمک طوپراقدن آلدیغی غذا هوادن آلدیغنه
 نسبتله آز در . بر پارچه اوطونی مرکب بولندیغی عناصره
 آیره جق بالفرض یاقه جق اولور ایسه ک کورورز که اوطونک
 بیوک پایى بخار حالنه تحول ایدوب میدانده بخار اولمیان
 جزئی بر قسم طوپراق یعنی کول قالور . یوز درهم قدر
 صاغلام وقوری اوطون یاندیغنده میدانده انجق اوچ درهم
 قدر کولی قالور یعنی یوزده طقسان یدیی چشید چشید
 بخار لر حالنده اوچوب کیدر . بوندن اکلاشلور که نباتک
 طوغریدن طوغریه طوپراقدن آلدیغی ماده پک جزئی بر
 قسم در . کول دیدیکمز بر چشید و ساده بر سنه اولیوب
 بش اون نوع معدن طوزلرندن عبارتدر و بونلردن اک
 چوق بولنانلری پوتاسه و سودا و کیرج و فوسفور و
 مغنثیا طوزلری اولوب بر چوق ده سیلیقا دینیلان چاقق
 توزی وار در . نباتات کولارینک نه شیلردن عبارت

باب ثانی وجود الهینک کائناتله اثباتی

اولدیغنی ارأشدر مقده منفعت چوقدر چونكه بو یول ایله
 اول چشید فدانلرك كلشمسده مناسب طوپراق قنغیسی
 اولدیغنی اوكرنمكه فرصتمز اولور . بو کیفیت ییه جکی
 نه دن عبارت اولدیغنی بيلمك استدیكمز بر حیوانك قارننی
 آچوب معده سنده بولناك نه ایدوكنی اكلامغه بکزر .
 بغدادی و آریه كولنك اجزای هر کبه سنی و بونلردن هر بر
 جزئك تام اولچیسى نه اولدیغنی بولور ایسه ك انلرك كلشمی
 ایچون مناسب اولان طوپراقی دخی اوكرنمش اولورز .
 كوله موجود مذکور بش التی نوع ماده دن هر برینك
 مقداری بر دكل ایسه ده همان همان هر طوپراقده
 بولنور . لیکن بونلر طوپراقه نره دن كلشدر . طوپراق
 نه در ؟ اصلی نه ؟ طوپراق یر یوزینی قاپلایان درلو
 درلو قیالرك اوفاندیسى اولوب بر طرفدن یغمورلر و نهرلر
 انلری طوپلایوب انکین یرلره و دكزلره کوتورمکده دیگر
 طرفدن ده یازك صیجاغی قیشك صغوغی و روزکاری و
 مولد الخوضه دیلان غاز و بوز نهرلری و یاغان یغمورلر و اقان
 صولرکی طبیعی قوتلر الك سرت قیالری بیله دائما اوفادوب
 آشندر مقله یکی یکی طوپراق یا مقده در . اگر مذکور

فصل ثالث صوو و طوپراغك بعض خاصه لری

قوتلر بیکارجه سنه لردن برو ایشلیه رك یکی یکی طوپراق
یاقده اولسه لر ایدی قره نك هپ قطعه لری چوقدن
طوپراقسز قالش اولور ایدی . چونكه ارقه سی کلدجه
حاضر بولنانی چابك توکنور ایدی . حساب اولنش درکه
آمریقاده واقع میسیسیپی نه ری مکسیکو کورفزینه هر کون
التی یوز قرق میلیون قیه طوپراق کوتورور . دیدیکمزك
خلاصه سی شو درکه نباتاته اقتضا ایدن معدنلر و طوزلر
قیارده ذاتا موجود اولوب طبیعتك مختلف قوتلری انلری
طاغیده رق توزه طوپراغه تحویل ایدر .

❀ صوو و طوپراغك بعض خاصه لری ❀

اگر بشقه برو واسطه اولسه ایدی فدائلر ایچون
طوپراق فائده سز اولور ایدی . اشبو واسطه ایسه صودر .
طوپراقده حیات نباتیه خدمت ایده جك اولان قسملر
کوکارده کی مسامات یعنی اینجه دلیکار واسطه سیله نشو
اولوب یوقاری یه فدائك بدننه یوللانلری ایچون مواد
مذکور هك آولا صو معرفتیه اریمی لازم کلور . صویك
اریدیجی خاصیتی دفته شایاندر . صو عادی طوز و شکر

باب ثانی و جود الهینک کائناتله اثباتی

کبی نسنه لری بالسهوله حل ایتدکن بشقه
 الک سرت قیالری بیله یواش یواش اریدر . جام بیله
 صویک اریدیچی تأثرندن قورتیله مز . واقعا بر شیشه ده
 صو سنده لرله قالدقن صکره شیشه دن بللی بر قسم حل
 ایش اولدیغی درک اولنماز فقط اوشیشه یی دوکوب اینجه
 توز ایت و انپیکدن کچمش صوده یاخود تمیز یغهور
 صوینده بر قاج کون طور دردقن و آراده بر چالقه دقن
 صکره کورورسین که جامک خیلی قسمی ایش اولور
 چونکه هم صوبه طادی چیقار همده شیشه یه قودیغک
 جام توزینی قورودوب طارتارسه ک اولکی طارتیسندن
 خیلجه اکسملش بولورسین . بوندن بالطبع استدلال
 اولنور که قیالر بر کره اینجه طوپراق حالنه کلدکه انلرده
 صویک اریده میه جکی صانکی هیچ بر جزء بولنماز .
 کوکارک خدمتی هم حیات نباتیه یه مقتضی اولان
 غذایی طوپراقدن آلق و هم یوقاریدن تبخر طریقیه
 اکسلانک یرینی طوادر مق اوزره اشاغیدن رطوبت
 چکمک اولدیغندن و طوپراغه طوقنان قسملری نه قدر
 چوق اولورسه مذکور خدمتلینده اولقدر مناسب

فصل ثالث صو و طوپراغك بعض خاصه لری

كاه جكنندن يوقاريكي دالار كبی قالنلشمسندن ايسه بويده
وتلارينك كثرتنده ازدياد بولسي دها لازمدر و انلری همان
بو حالده بولورز .

طوپراغك فدانلره بشقه مهم خدمت لری دخی
واردر كه بونلردن برايكي بلايجه سنی ذكر ایدلم .
(۱) طوپراق قوه جاذبه مسامیه (Capillary Attraction)
دینیلان خاصه یه مالک اولسیله نباتات قسمنه لزومی بدیهی
اولان رطوبته مخزن اولمشدر . اوجی صویه بامش
سونیکرك یاخود شکرک یوقاریده اولان قسمنه صویك
چیقیمی ولامبالرده کی یاغ فیتلک اوجنه طوغری چكیمی
بوقوتله در . طوپراغك اوفاجق دانه لری اراسنده اینجه
دلیکار یاخود ارالقلر بولنمغله درینده اولان رطوبتی اوست
طرفه چکر . یاز وقتنده هفته لرله و بلاکده آیلرله یغمور
یاغمدیغی ایامده ایو تیمار یاخود ذرع ایدلمش بر تارلایك
طوپراغنی قازه جق اولور ايسه ك كورورسین كه یر یوزندن
انجق براز درینده رطوبت واردر . اوراسنی قوری
طوپراقله اولیكی كبی دوزله وتموزك یاقیچی كونشی اون
اون بش کون دها حکمنی اجرا ایتدکن صکره اول یرك

باب ثانی وجود الہینک کائناتہ اثباتی

طوپراغنی ینہ قالدروب باقلی و یرینہ اولکی درینلکده
 اولکی کی رطوبت بولورسین • اول محلات طوپراغنی
 هوایہ هیچ بر رطوبت و یرمدیمی • و یردی هم چوق و یردی •
 تارلانک هر بر مربع ایاق سطحی اوزرندن کونده بلکده یاریم
 قیه دن زیاده صوب بخار اوله رق برقاج هفته ظرفنده اول
 قازدیغک محدود مسافه نک سطحندن اقل بش اون قیه صو
 اوچدی کیتدی و ینده طوپراق قورومدی چونکه
 طوپراق طشرده کی حرارت سبیلہ کندی سطحندن نه قدر
 ضایع ایتدی ایسه دریندن قوه جاذبه مسامیه واسطه سیله
 انک یرینہ اولقدر رطوبت کلدی • بو کیفیت بعینه لامبانک
 قیلنده هر کون مشاهده ایلدیکمز حاله بکزر • لامبا یا ناماش
 حالده طورور ایکن قیل تا اوست اوجنده ک یاغله
 طولودر و یاغله باشلا دیغنده اوجنده کی یاغ تو کتمکده
 ایسه ده قیل ینہ اولکی کبی دائما طولو اولور چونکه
 اوجده اولان یاغ یانوب تو کندیکنده الت طرفده کی
 یاغ قوه جاذبه مسامیه ایله اول بوشالان یره و براز دها
 اشاغیده اولان یاغ دخی ایکنجی بوشالان یره چیقار
 و بولاجه علو قیلک اوجنده دوام ایتد کجه یعنی قیلک

فصل ثالث ص و ط و پراغك بعض خاصه لری

اوجی بوشالدقجه لامباده کی یاغك سطحندن قتیلك
اوجندهك سیاله برقرار حرکته اولور . طوپراق تماما
بویله اولوب یوزنده تبخر طریقله رطوبت اکسید کجه
اشاغیه کی رطوبت انك یرینه کلور .

(ب) طوپراغك چوق مفید خاصه لرندن بری ده
ینه مساماتلو اولسنگ اقتضاسندن بولنه رق تعفی دفع
ایتمی یاخود هوایی تمیزلمی خاصیتیدر . تجربه ایله
تصدیق اولنمشدر که یازك صبحاق وقتنده چورومکه
باشلامش اولان کوچوچك بر حیوان لشی اوزرینه بر
پرماق قالینلغنده کومور توزی قونلمش ایسه تعفی
طیشاردن حس اولنماشدر چونکه کومور توزنده
مسامات چوق بولنمی حسیله کنديسنده غازلری بو
مساماته یاخود اینجه اراقلره چکمك خاصیتی اوله رق
لشدن حاصل اولان مضر غاز اول اراقلره کیردیکی مثلاً
طشرده کی هواده موجود اولان مولدالموضه دخی
کیروب کندي طبیعت کیمیویه سی یعنی راست کلدیکی هر
شی ایله چارچابك برلشمك خاصه سی اقتضاسندن اوله رق
اول تعفنلو غازلر ایله کیمیوی اختلاطه کیروب مضر تسر

باب ثانی وجود الہینک کائناتلہ اثباتی

اولان یکی ترکیبیلر یامش در . عینی خاصیت و خدمت بللی بر صورتده طوپراقده دخی وارد در . فنا قوقولو شیلر اوزرینه طوپراق آتیلہرق تعفنی میدانن قالدرلدیغی چوقلرہ معلوم کیفیتلردن در . لاغہ مناسبتلری اولیان محللردہ طوپراقلہ ترتیب اولنان ایاق یوللری بواساسہ مبنیدر .

❖ نباتاتک فصیلہلری و اصول ابقالری ❖

طوپراغک مذکور خاصیتک نباتاتہ دخی علاقہسی وارد در . انسانلرہ مضر اولانی آلوب اندن فدائلرہ خیرلو اولانی ترتیب ایتکدہ در . برطرفدن مضرتلو تعفنی میدانن دفع ایدرک و دیگر طرفدن ده انلردن یکی ترکیبیلر یاپہرق نباتاتہ مناسب غذا تدارک ایتککله ایکی ایشی بردن کورمش اولیور .

نباتات عالمی غایت واسع اولوب باشلیجه یوز التمش فصیلہلرینک سادہ برندہ یعنی ثعلب اوتنک عائد بولندیغی فصیلہ ثعلبیہ ۱۹۴ جنس و ۳۰۰ نوع حساب اولنیور . بونلر دنیانک هر طرفندہ بولنوب ترتیبیلرینک نازکلیکی حوش رائحدلری و رنگارینک پارلاقلیغی جهتیلہ مشهور

فصل ثالث نباتاتك حيوانلرله مناسباتی

اولدقدن بشقه نیچهلری دخی خصوصاً منطقهٔ حارّه ده بولنلر آری، سینک، اوروجک، کوکرجین، غوغوق قوشی و سقا قوشی کی حیواناته مشابه شکلر ابراز ایلدکاری ایچون هم تحف همده پک کوزل اوله رق او باغچه لرده چوق مقبول طوتلور. ثعلب دیکمز بونلرک بعض نوعلرینک کوکندن حاصل اولان نشاسته کی بسلیچی بر ماده در. اصل بختزه دونه لم.

❁ نباتاتك بعض حیوانلر ایله اولان مناسبات ❁

❁ مخصوصه لری ❁

مذکور واسع صنفه عائد اولان نباتاتلردن چوقلری علامت ذکوریت و انثویت حوی چیچکاری آیری آیری کوکلرده بولندیغی سیدن بونلرک مثر قیلنسی یاخود تخم ویره بیلسی کله بکار سایه سنده اوله رق اجراسنی تأمین ایچون اولنان ترتیب و تدارکات دفته شایندر. و بوبابده کوزمزه ایلشان بیوک شی حیوانک طبیعت و ترتیبیه چیچکک ترتیبی اراسنده اولان مطابقاتدر. (۱) کله بک کندی طبیعت و ترتیبی اقتضاسندن اوله رق بشقه درلو

باب ثانی وجود الهینک کائناتله اثباتی

آزیق ییه میوب انجق مائی بر ماده ایله بسلنه یلور و بوماده
 چیچکده حاضر و اماده در . (۲) شربت چیچکک پیراغنده
 یاخود سطحنده اولیوب درینده خونیسنک تا دیننده در .
 کله بکده ده اول طاتلو قیوسنک تا آلت نقطه سنه دک
 یتشه ییلان بر طولومبا یعنی عجیب بر خرتوم تدارک
 اولنمش اولغله انک واسطه سیله چکوب قدیمیلرک کندی
 الهلرینه اصلسز ایچورد کلری نکتارک حقیقیسنی ایچر
 وانک قوتیله اوچار کیدر . (۳) اهل علم نباتاتک کشفنجه
 چیچکک دیننده کی شربتی چیچکده یاخود فدانک حیاته
 طوغریدن طوغریه بر لزومی اولیوب انجق کله بکلری
 ککندینه جلب ایتک ایچون قونمش در . علمه و
 اصولارینه حدود اولیان مرتب عالم مذکور طاقدن اولان
 نباتاتی تخم یتشه درمک جهتیله بشقه لردن فرقو ترتیب
 ایلش ایسه یعنی تخم حصوله کتوران ایکی نوع چیچکاری
 بری برندن ایراقده بولندرر ایسه ده بو فرق قارشولق
 اوزره دخی انلره زیاده برشی ویردکن یعنی کله بکلری
 جلب ایتک ایچون انلرک قدح لرینی شربتله طولدر دقن
 بشقه مطلبک حصولنی تأمین ایتک ایچون یلدیگمزه کوره

فصل ثالث نباتاتک حیوانرله مناسباتی

لازم اولان سائر واسطه لر و چاره لری دخی اکسیک
ایتمشدر .

(۴) از جمله چیچکله غایت کوزل و پارلاق
رنکار و خوش رائحه لر بخش اولنش اولوب رنکار
کوندوز کله بکارینه و رائخالر ایسه کیجه کله بکارینه
یاکمز صورتده رهبر اولورلر . دهاسی وار (۵) کله بکاری
جلب ایتمکدن مقصد دقیق توزینی (ذره) (Pollen) بر
چیچکدن آلوب دیگر چیچکه کوتورمک اولدیغندن کرک
مذکور توزه و کرک انی ایچنده حفظ ایلان طرفه بو مقصده
اوبغون بر طبیعت ویرلشدر . یعنی دقیق توزینک (ذره)
ظرفی اويله ترتیب اولنشدر که توزک وقتی کله کده خارجدن
ظرفه پک جزئی بر تأثیر اولدیغنده ظرف چاتلا یوب ایچنده کی
توز صاحیلور . و دیگر طرفدن کله بک دخی کندی سوق
طبیعیسی اقتضاسندن اوله رق آزیق ارامق اوزره خرتومنی
چیچکک قدحنه صالدیغی صروده دقیق ظرفنک اوزرنده کی
کوزه کورنمز درجه ده اوفاق قیلاره طوقمنسیله توفنکک
تکنه طوقمنش کبی ظرف آئیده چاتلا یوب ایچنده کی توزک
بر قسمی کله بکک خرتومنه بولاشور و کندیسی چیچکدن

باب ثانی وجود الهینک کائناتله اثباتی

چیچکه طولاشدیغی هنکامده حامل اولدیغی توز او بر
 چیچکلرده کی علامت انشویته تصادف ایتیکله انی مثر قیله رق
 بویله جه مطلب حاصل اولمش اولور . بوندن ماعدا بو
 طاقم نباتلرک دقیق توزنده دخی مذکور مقصده الویرشلو
 خاصه واردر . شویله که توز ایله برابر برده یاشغان سیاله
 میدانه کلوب بونک معرفتیه توزهر نریه طوقنورسه اورایه
 یاشور . اول سیاله ده اچیق هوایه مظهر اولدقجه
 قاتلاشمق یاخود پکشمک طبیعتی دخی بولندیغندن کله بک
 چیچکک اوزرنده زیاده جه اکنورسه سیاله زیاده جه پکشوب
 بولاشمش اولان توزک قولایجه دوکلممسنی تأمین ایتمش
 اولور . بوکا ایسه یعنی کله بکی چیچکک یاننده زیاده جه
 اکندر مکه واسطه ینه چیچک کندیسیدر چونکه شربت
 چیچکک دینه ایله برص ورته قونلشدر که کله بک انی
 قولایجه وسرعتله چکه مدیکندن سوزوب توکتمسی ایچون
 اوزونجه برمدت اوراده اکتمسی اقتضا ایدر . علمای طبعیون
 مشاهرندن اولان داروینک بومسئله خصوصنده سویلدیکی
 سوزلر دقته شایاندر . مومی الیه نباتلرک کله بکلر واسطه سیله
 مثر قلندیغنه شویله دیور ” چیچکک الت طرفی کله بکلری

فصل ثالث نباتاتك حيوانرله مناسباتی

جلب ایتك ایچون اوزانوب بر شربت قابی اولمشدر . و
یاشغان (سیال) مادهك پكیشوب قورویه بیلسنه فرصت
ویرلسی ایچون شربت چیچكك دینه انجق یواش یواش
چكیله بیله جك بر صورتده قونمش اولوب بویله اولدیغنی
ظن ایتمزك سببی ده کوسه تره جکز “ بر اهل علم الهی بو
مسئله حقنده بر رأی سویلش اولسه ایدی داروینك اول
سوزلرده استعمال ایلدیکندن دها آچیق و دها قوتلو بر
لسان قوللانه میه جق ایدی .

بو بابده یعنی کله بکك طبیعت و ترتیبیله چیچكك
ترتیبی بیننده کی مطابقات حقنده ذکر ایده جکمز بر بشقه
خصوص دخی مذکور طاقدن اولان نباتاتك ایچنده
شربت بولنان چیچك بورولرینك اوزونلغیله انلردن رزقنی
طوپلایان کله بکلرک خرتوملری اوزونلغی اراسنده اولان
علاقه یاخود مطابقاتدر . بو بابده مشاهده اولنان کیفیت
شودر که چیچكلرک مختلف نوعلرنده شربت بورولرینك
اوزونلغی مختلف اولدیغی مثالو اول سمترلده بولنان درلو
درلو کله بکلرک خرتوملری دخی اوزونلو قصه لو اولوب
هر بر چیچكك بيوککنه اویدرلش کله بکلر بولدیغی

باب ثانی وجود الهینک کائناتله اثباتی

اکلاشیلور • مذکور نباتلردن مدغسقر اطه سنده بولنان بر
 نوعنک شربت بوروسی فوق العاده صورتده اوزون
 اولوب ایچنده کی شربت بشقه سمترلده بولنان هیچ برکله بک
 خرتومی یتشه میه جکی درجه ده درینده اولمغله اگر انلری
 مثر قیلمق اوزره اول سمترلده خرتومی دخی عینی درجه ده
 اوزون اولان کله بکله اولمازسه اول فدانک ایلک ظهورنده
 جنسی یکمسی لازم کلور ایدی • بوراده حالیه شو سوال
 میدانه کلور که مطابقاتک اصلی نه در؟ بو کانه معنا و نه
 ایضاح ویریه جکدر؟ چیچک بوروسی یواش یواش
 اوزادیغی ایچون کله بک خرتومی دخی اکا اویمق اوزره
 یواش یواش اوزامشدر دینلورسه بو کافی بر جواب
 اولورمی؟ بویه اولمشدر فرض ایدلم • کندی خرتومنی
 بسلندیکی چیچک اوزونلغنه اویدرمق خاصه سی یاخود
 قابیلیتی کله بکه نره دندر؟ یاخود عکسنی دوشننلم؟ اگر
 اول کله بک خرتومی بالتدریج اوزامغه باشلامش فرض
 اولنورسه چیچک کندی بوروسنی اکا نیجه اویدرمشدر؟
 چیچکده بو قابلیت وار ایسه نره دندر؟ کیم اکا بو
 خاصه بی ویرمشدر؟ و یاخود نیچون مغایری دوشنلمسون

فصل ثالث نباتاتك حيوانلرله مناسباتى

يعنى كرك چىچىكك بوروسى و كرك كله بىك خرتومى برى
بالتدرىج اوزاندىغى حالده دىكرى عىنى درجه ايله نىچون
قصالمسون؟

اقدامچه ذكر اولنان خصوصاتك جمله سنى برلكده
آلهرق يعنى چىچىكده كله بىك طبيعتنه اويغون بر شربت
تدارك ايداش و بو شربتك درينه قونلمش اولدىغى، كله بىك
و پروانه لرى جلب ايتك ايچون بو طاقم چىچىكاره پىك
پارلاق رنكار و خوش رائىحه لر و يرلمش اولدىغى، دقيق
توزينه (ذرا رد) ياشىغان برخاصه ظرفنه دىنى لازم كادىكى
آنده اول توزى صاچغه مناسب بر ترتيب اعطا اولنش
اولدىغى و چىچىكك شربت بوروسنك اوزونلغى ايله اول
سمتلرده بولنسان كله بكار خرتوملرينك اوزونلغى بىننده بر
موازنه بولندىغى كوردىكهمزده بونك جمله سىننده بر بشقه
مقصد اول نباتك ابقاى جنسنىك تأمىنى ايدوكنى دوشنمىك
ايدىلورمى ايز؟ قوشلرى و حيوانلرى فلان نقطه يه جلب
ايتك ايچون انسانك ياپدىغى فخرده و طوزاقلرده معنا
واردى اندن بىك قات زياده هنر و معرفتله تنظيم اولنش اولان
مذكور اصولده بر معنا و مقصد يوق مى در؟

باب ثانی وجود الهینک کائناتله اثباتی

نباتاتک ابقای جنسی ماده سنی بر اقرزدن اول میوه سی
طرفندن بزه پک خوش و مقبول اولان بر اغاج حقنده
دخی بر قاچ سوز علاوه ایدلم . دیدیکمز اغاج انجیر اغاجی
اولوب ترکیانک چوق ستملرینک هوای اقلیمی بونک
کشمسنه مساعد اولدیغندن انی بیلان آز کیمسه بولنور .
هله میوه سنی هر کس ده ایو طانور . انجیر اغاجی ایکی
درلودر . بری میوه ویرن دیکری ده اوزرنده انجیر کی
شیلر کوسترر ایسه ده بونلر انجیق قابوقدن عبارت ایچی
بوش نسنه لر اولوب آز وقت ظرفنده جله سی دخی اغاجک
دیننه دوکملکه واقعا فائده سز کی کورنور فقط او بر
نوع انجیرک ثمره ویرمی ایچون بونلرک پک بیواک خدمتی
اولدیغی اکلاشلشدر . انجیر یتشدرانلرک بیاننه کوره
انجیرک بابا نسمیه اولنان اغاجندن، قابوقدن عبارت دیدیکمز
میوه یی کتوروب اصل میوه ویرن اغاجه اصدقلری یاخود
بر یول ایله ربط ایلدکاری تقدیرده اول اغاج ده چوق
میوه کتورر . عجبا بو تأثیرنه دن در؟ الی التمش سنه دن
برو انجیر تربیه سنه مشغول اولمش بر کویلیدن بونک سببی
سؤال اولننه بویله ایتمز ایسه ک اغاج انجیرلرینی دوکر

انجیر اغاجی

فصل ثالث

یاخود چوق میوه ویرمز جوابندن بشقه بر شی ایشدلمز
 لکن مسئلهیه واقف اولق ایچون قیالو قیویه بو بر انختار
 کوسترر. چونکه انجیر اغاجی علامت ذ کوریت و علامت
 انشویتی بولنان چیچکلی آری آری اغاجلر اوزرنده بیویان
 نباتاتدن در. انجیر دیدیکمز حقیقت حالدیه بر چیچک در و
 بشقه چیچکلردن فرقی انجق طیشی ایچنه دونمش بر
 چیچک اولمسیدر. یعنی طوت و چیلک کی میوه لک
 عینا ترسی اوله رق بونک چیچکلی ایچ طرفده در. اصل
 میوه اولان انجیرک ایچ سطحنده علامت انشویتی چیچکلر
 بولنوب بابا دینلان انجیرک ایچنده ده دقیق توزینی (ذرا ره)
 حاصل ایدن علامت ذ کوریتی چیچکلر وارد در. مذکور
 فائده سز کی کورنان، ایچی بوش خام انجیرلری اصل میوه
 ویرن انجیر اغاجنه اصمق یاخود ربط ایتک غیری بر شی
 اولیوب انجق ابقای جنسی ایچون تقربلری شرط مطلق
 اولان ایکی نوع چیچکلرک یان بیان کتورلمسیدر. ایکسی
 بر اغاجه کتورلدکن و یاخود اغاجلر بری برینه یاقین
 بولندرلدکن صکره ایشک باقیسنی سینکلر و اوزلر
 کورور. یوزدن باقلدقده بزه فائده سز کورنان چوق شیر

باب ثانی وجود الهینک کائناتله اثباتی

وار در که مقصد و خدمتی ایوا کلاشلدیغنده بسببتون
بشقه بر هیئت آلور • بویله حاللر بزی عجله حکم ایتکدن
ایسه تفتیش و تحرییه قلاغوزله سه لر کر کدر •

❖ سالف الذکر تفحصاتدن صفات الهیه حقنده ❖

❖ نتیجه اوله رق ایدینه بیلدیگمز ❖

❖ معلوماته دائر ❖

(۱) ذاتیت الهیه حقنده

مخلوقاتدن هر قنغیسنی تفتیش ایدرسه ک احوال
و اعضا و مطابقاتنده مرام و مقصد و عقلک اثرلرینی
بولورز • بوندن کلور که صاحب مرام و مقصد موجوددر •
فقط صاحب مرام یالکز ذات اوله بیلور • بناء علیه مخلوقاتی
وجوده کتوران یالکز قوت و نظام یاخود قانون طبیعی
اولیوب بر ذات مستقل اولسی لازم کلور • کائناتده بولنان
بیکارجه و میلیونلرجه مخلوقات بر خالق مطلقک ذاتینی
حسابسز دلیللرله اثبات و تصدیق ایدر • بو خصوصه
دائر اشبو ایکنجی بابک برنجی فصلنده مقدار کافی
تفصیلات ویرلشدر •

فصل ثالث وحدانیت الهیه حقنده

(۲) وحدانیت الهیه حقنده .

کرهٔ ارضی وجوده کتوران ذات کونشی و سیاره لر
ایله یلدزلی دخی وجوده کتورمش اولمیدر . چونکه بونلرک
کافه سنک تابع اولدقلری قانون بردر و انلرک حرکتلرینی
تعین و حفظ ایدن قوت همان بر ذات طرفدن صدور ایتمش
اولدیغنی علم منطق اقتضاسنجه استنتاجه مجبورز . کونشی
خلق و حفظ ایدن بر ذات و کرهٔ ارضی خلق و حفظ
ایدن دیگر بر ذاتر دیو فرض ایدهلم . بوتقدیرده کونش
ایله کرهٔ ارضک بری بری ایله اولان معلوم نسبتلری
نرهدن ایلرو کلور ؟ کائناتده بولنان جسملرک بری بری ایله
اولان نسبتلری اولدرجه چوق و مرکب اولقله برابر
جسملرک حفظ اولنملری و انلرده جاری اولان قانونه مطابق
بولنملری اولدرجه واضح در که کائناتک ترتیبی و ابقاسی
و حرکتلری ایچنده بر مرام و حکمت و یالکز بر مرام و
حکمت صاحبک موجود بولنسنی تسلیم و تصدیقه
مجبورز . ضیایی یرادان کوزی دخی یراتمش اولمیدر .
زیرا کوز ضیایه مطابق اوله رق یرادلش اولدیغنی بدیهیدر .
قولاغک خالق و هوانک خالق بر در . الحاصل کائناتده

باب ثانی وجود الهینک کائناتله اثباتی

کورنان حسابسز مطابقات و مناسبات خالق و حیدک وجودینی ایما و اثبات ایدرلر . زیرا بو قدر مطابقات بر قاج خالقک آیری آیری مراملرندن نشأت ایتسی ممکنسز اولوب بویله تصور ایتمز دخی محالدر .

(۳) اللهک ماده دن بسبتون فرقلو و ازلدن موجود

هم ده واجب الوجود اولسی حقنده .

بو صفتلر علم الهی طبعی ایله اشکاره تفهیم اولنور . انجق ماده دن فرقلو اولان ، بر صاحب مقصد اوله بیلور دیو حکمتک بر قضیه اساسیه سی اولق اوزره عموما قبول اولنق کر کدر بو ده قابل اعتراض دکدر . ماده دیدیکمز شیئی و صاحب مقصد دیدیکمز ذاتی بشقه بشقه جنسدن و عن اصل آیری و فرقلو دیو قبول ایتدیکمز حالده حکمت طریقیله ایکی ادیم آلق ممکن دکدر . بنا علیه خالق مستقل کافه مادیاتدن اول موجود اولدیغنی یعنی ازلی ایدوکنی تفکر ایتمز مقتضیدر . و بو ذات بشقه سنک قدرت و معرفتیله وجوده کلدی دیسه کاشته اول ذات خالق مستقل یعنی اللهدر دیمش اولورز . کندی کندیسنی بر اتدی دیمک محال اولدیغنی واضحاتدندر . برده مادامکه

فصل ثالث اللهك قادر و عالم و حاضر اولسی

اللهك بروقت موجود بولمديغنى تصور ايتك محالدر . اللهك موجود اولسی خالق سزدر يا خود وجودينك اصلى كنديسى در ديمز منطقجه لازم كلور . يعنى واجب الوجوددر .
(۴) اللهك جمله يه قادر عالم و هر یرده حاضر اولسی حقنده .

علم الهى طبيعى اللهك قدرتك اول قدر اثرلرينى و بزم تعريفنه مقتدر اولديغمز و حتى تخيل ايدە بيلديكمزدن اول قدر زياده اثرلرينى كوستر كه بو قدرت نهايت سزدر ديو اقرار ايتكه كندى فكر لر مزك طبيعى ميل و حر كتندن مجبور اولورز . خالقك قدرتى بالطبع مخلوقك مقايسه و موازنه سنه صيغماز . نصل كه بشقه هر بر خصوصده عقل انسانى صفات الهيدى تماميله درك ايتكه مقتدر اوليوب انجق كندى حدودى داخلنده جزئيا تحصيل معلوماته مقتدر در . بو جمله ايله برابر عقل انسانينك كافه تفحص و تحرياتندن صكره نهايتنى بولوب تصور بيله ايدە مديكى هر نه ايسه انى نهايت سز ديو تصديق ايتكه مجبور در . و حتى زمان و مكان حقنده تصور ايتمز بويله در . شويله كه زمانى ابديته و مكانى كائناتك بولماز و تخيل اينلر بى نهايه

باب ثانی وجود الهینک کائناتله اثباتی

ابعادینه تحدید ایتک اصول حرکت فکریه مزدندر .
 قدرت الهیه حقنده اقراره مجبور اولدیغیمزی علم و
 حکمت الهیه حقنده دخی اقرار و تصدیقه مجبورز .
 مرادینی اجرا ایتک باینده الهک هریرده حاضر و ناظر
 اولسی خصوصنده برنهایت مشاهده و تصور بیه
 ایدهمدیکمزدن علم و حکمت و تدبیر الهینک بی نیایه
 ایدوکنی تصدیق ایدرز . فراموش ایدلملیدرکه بونوع
 اصول استنتاجه منحصر اولماز بیانه چالشدیغیمز قضیهنک
 حد ذاتنده محدود اولوبده بر نوع نقصانی بولندیغندن دکل
 انجق و محضا عقول انسانیهنک بویه بر قضیه بی درک و فهم
 ایتکه عاجز اولسنندن نشأت ایدر . زیرا مخلوقک خالق
 تمامیه بیلسی یاخود محدودک غیر محدودی اولچلمسی نصل
 ممکن اوله یلور .

(۵) الهک کریم اولسی علم الهی طبعی ایله تصدیق

اولنور .

بو مبدأ علیه چوق اعتراض ظهور ایدر . دنیاده
 بولنان آغریلر و ظلم و جفالر ذکر اولنوب انسانلرک خالق
 اولان حاکم مطلق کندی مخلوقاتنک خیرخواهی دکدر

فصل ثالث اللهك كريم اولمسی

ديهرك معترضلر قالقوب هر زمان ميدان اوقومقده درلر .
اما بو اعتراض منصفانه ايراد ايدلمديكي سهولتله بيان
اولنه بيلور .

(ا) عموما مخلوقاتك اعضالرينه و بولندقلري حاللره
اولان مطابقاتلرينه دقتليجه باقلدقده بو اعضا و مطابقاتي
تشكيل و ترتيب ايدنك مراحي خيلو و مرحتلو اولديغي
دركار در . دنيماده نه قدر اغري و جفا بولنورسه اكا
نسبتله مسرت و محظوظيت وصفه كمز درجه ده در . اكثريا
حيوانلرك چكدكاري بر اغري يه بدل بيك صفالري وار .
كنجملرك مسرتي صفادر . اختيارلرك مسرتي راحتدر .

(ب) كائناتك خالق مخصوصا و لزومي يوق ايكن
ذي روح اولان مخلوقاتنك حسلرينه صفا ويرمشدر .
مثلا وجودلرمزي بسلمهك ايچون طعاملرك لذتلو اولملرينه
لزوم يوق ايدى . ايشتديكمز صدارك اكثريا موجب صفا
اولملرينه لزوم يوق ايدى انجق اللهك صفامزي مراد
ايتديكني تصديق ايدر . كنج حيوانلرك كافه حركاتي
موجب صفادر . كورديكمز رنگلر بزه فرح ويرر . قوه
لامسه و قوه شامه دخی اكثريا باعث صفادر .

باب ثانی وجود الهینک کائناتله اثباتی

(ح) بو خصوصده یعنی اللهک یولکنک کائناتدن اثبات اولنمی خصوصنده تصادف ایتدیگمز مشکلات بوندن یعنی زهرلو و یر تیجی حیوانلرک موجود اولسندن نشأت ایدر. فقط بو بابده اتی الذکر خصوصات دقته شایاندر.

(۱) بو حیوانلرک کندولرینه مخصوص صفالری وار در.

(۲) زهرلو حیوانلردن کلان مضرات آز در و بونک ایله برابر انلردن قورقوب صاقتمق لزومی آیو بر شیدر چونکه دقت و اویانقلغی دعوت ایدر.

(۳) زهرلو حیوانلرک اکثریسی معمور یرلردن اوزاق و چوللرده بولنور.

(۴) بر یر تیجی حیوانک پنجه سی واسطه سیله اولمک بر حیوان ایچون بر بلا دکدر. اول وجهله اولمک بشقه طرزله اولمکدن دهاراحتدر.

(۵) بعض حیوانلر بشقه لر واسطه سیله تلف

اولمازسه بولنان حیوانلر حددن زیاده چوق اولور ایدی.

(۶) وقوع بولان اغریلر و اولوم بیله کرک انسان

فصل ثالث اللهك كرىم اولمى

ايچون كرك حيوان ايچون بلا ولعنتدر ديو حكيم ايدهمير .
شمدي يه قدر كائناتده بزم ايچون مستور و حتى اسرار
نوعندن قالمش جوق شيلر واردركه وقتيله منكشـف
اوله جغى مأمولدر .

(۷) انسانك دوچار اولديغى المـر بلكه كـندى
قباحتلرنددر .

(تنبيه) فراموش ايدلمليـدر كه بوبابده علم الهى
طبيعى صفات الهييه دائر معلومات كافيه يـ اظهار
ايتيـوب انسانك منكشـفات ملهميه هر حالده محتاج
اولديغنى تصديق ايدر .

باب ثانی وجود الهیہ کائناتہ اثباتی

{ فصل رابع }

موجب و اثر قانونی (علت فاعلیه) کافی اولیوب
 مرام و مقصد قانونی (علت غائیہ) تأکید
 ایتک لازم اولدیغی
 فرانسه لو ژانه نک کائناتده بولنان مقصد و مرام
 حقنده دقته شایان بحثک خلاصه سیدر .

❖ عملیات انسانیہ و عملیات طبیعیہ ❖

کافه عملیات انسانیہ ده بر مرام و مقصدک بولنسی
 تجربه ایله اثبات اولنور ، کائناتده مشاهده اولنان عملیات
 طبیعیہ مشغولیت انسانیہ دن ایکی خصوصده فرقلو
 اولدیغی کورنیور یعنی اولاً صنایع انسانیہ وقوفه
 مربوطدر . ثانیاً انسانک هنری کندی اثرلرندن خارجدر .
 واقعاً کائناتده مشاهده قیلنن صنایع یالکز
 کائنات جهتندن باقیلورسه وقوفله مختلط کورنیور .
 برده اثرلری انک داخلندهدر . فقط بو ایکنجی فرق

فصل رابع عملیات انسانی و عملیات طبیعی

یعنی مشهود اولان هنرك كندی اثرلری ایچنیده بولنسی
عملیات انسانییه نسبة برنوع فائیت کوسترر شویله که
بو هنر طبیعیده دها مکمل اصول اجرا ودها واسع صنعت
ودها درین بر مقصدك موجود اولسی واضحدر .

❀ کائناتی بر ما کینهیه تشبیه ایتك تصویرى ❀

کائناتی کندی ترکیبی و ایشلمسی خصوصنده عقل
و معرفت و مقصد کوستران جسم و مرکب بر ما کینه
اعتبار ایده یلورز . لیکن بویله اعتبار ایتك جزئی و غیر
کافی بر تصور اولدیغی مسلدرد . و بوندن ایلرو چکوب
کائناته جملهیه معلوم اولدیغی اوزره منتظم جسملرله و
اکثریا ذی روح جسملرله مملو بولنسان بر منظومه دیو
اعتبار ایتدیکمز حالده مشاهده ایده چکمز مقصد و مرام
نشانه لرینی دها اکسیك دکل بالعکس دها زیاده و مکمل
کوره چکمز . بر ما کینهیی هر درلو مرام و مقصددن تجرید
ایت . انك کراسته سنی آیری آیری بر محله کیتور . الی الابد
صالانوب صار قدلسه بیله منتظم بر هیئته کیره مز . برده
منتظم یا خود عضوی بر جسم فرضا ذی روح بر جسدك

باب ثانی وجود الهینک کائناتله اثباتی

هپ عناصرینی بر محله کتوروب بکلیه جک اولسه ق شول
 مکمل و ذی روح جسم بالتمام تشکل ایندنجیه قدر بکلیه جک
 اولور ایسه ک نه قدر بکله ملیر ؟ بلو دکلی درکه مرام
 و مقصد اولقسزین بو نتیجه نك وجوده کلسی شول
 ما کینه نك مرام و مقصد اولقسزین وجوده کلسندن بیک
 قات دهها زیاده مشکل و حتی ممکنسز و محالدر . عملیات
 انسانیده کراسته دیدیکمز شیلر و اثار مکمله نك شروطی
 کندولکلرندن تشکل ایتمز . منتظم و ذی روح بر وجودک
 کراسته (عناصر) و شروطی کندولکلرندن یعنی عقل و
 مرام تصور ایدلدیکنده تشکل ایتملری دهاسه ولتومی در ؟
 بالعکس جسم نه قدر مرکب و منتظم اولسه و خصوصاً
 ذی روح بر عضوی جسم اولسه اولدن برو مقصد و
 مرامک تسلیم اولنمسی قاعده منطقیه اوزره الزمدر .

❖ ماده نك کندولکلندن عاجز اولسی ❖

بر ادم دیه جک که منتظم و عضوی بر جسمک عناصری
 و وجوده کلسی ایچون لازم اوله جق قدر وقت اولسه
 اول جسمک هیئت مکمله یه کلسی ضروریدر . پک اعلا .

فصل رابع ماده نك كند يلكندن عاجز اولسي

بواصولي قبول ايدهلم و بواكامل برچوق ايپك قوزاسندن
چيقارلمش ايپك تللري برميدانه كتوروب برمدت بلكه يهلم .
البته وقتيله بوتلاردن كوزل جانفس و صكره استديكمز
البسه چيقار! حيف كه ادملر عادتاً صبر سز اولوب راغب
بولندقلري ظريف البسه نك كندوليكندن وجوده كلمسي
بكميورلر! بيهوده يره بر طاقم تجار و اهل صنعته كليتلو
اقچه ويررلر!

اگر عوام ناسك بوبابده اولان حركتي و بياغي ادملك
بويله امور عاديّه حقنده اولان افكارى بوش دكل، عاقلانه
ايسه سالف الذكّر اصولي قبول ايدن اهل حكمت
ادعاسنده بولنانلره حق و يره ميه جكمز، بالعكس ادعالريني
محال عد ايتكه مجبور اوله جغمز بديهيدير . زيرا بو خصوص
چوق دفته شايان دركه علم و حكمت اسمنه شايسته اولان
هيچ بر طريق بزي عقول انسانيه مغاير اولان بر مبدأ
طوتمغه اجبار ايتز . كائناتي مقصد و مرآمدن تجريد ايتك
استيان هر نه و هر كيم ايسه علم و حكمت اصليه و صحيحه
بو كا اصلا يوز ويرمز .

باب ثانی وجود الہینک کائناتہ اثباتی

❖ کائناتہ وقوع بولان ہیئت عجیبہ و خارق العادہ ❖
❖ وسقطلرہ مبنی اولان اعتراضاتک جوابی ❖

بعض معترضلر نباتات و حیوانات اراسندہ وقوع بولان
سقطلرہ و غیر منتظم یاخود ہیئت عجیبہ صاحبی اولنلرہ
باقہرق کائناتہ مشاہدہ ایتدیکمز مرام و مقصد نشانہلری
اوزرینہ مبنی اولان مبدأمر و تعلیممز اثبات اولنہمز دیو
ادعا ایدرلر . بوکا جوابمز بودر کہ بویله خارق العادہ و غیر
منتظم ہیئتہ بولنان کرک نباتات کرک حیوانات مقصد
و مرام مبدأنی تصدیق ایدر . یعنی بو واقعہلر لایقیلہ تفتیش
اولندقدہ اکثر یا جاری اولان قانونی تصدیق ایدر . زیرا اگر
کائناتہ جاری اولان قانون مقصد و مرام اوزرینہ مبنی
اولسہ ایدی نباتات و حیواناتک معلوم و منتظم ہیئتی
بولنمیوب صورت و ہیئت عجیبہ وسقط طوغملر هر طرفہ
بولنور ایدی . ہیئت عجیبہ و خارق العادہ نہ دیمکدر؟ بو
دیمک دکلکی کہ عادی و منتظم و همان هر زمان مشاہدہ اولنان
هیئت و صورت معلومہ وار در؟ و بجلہنک معلومیدر کہ
بو ہیئت و صورت عجیبہ دیدیکمز غایت نادر اولوب

فصل رابع هیئت عجیبه و خارق العاده

بیکنده بر شویله طورسون بلکه میلیونده بر بولنمز . و بو هیئت عجیبه و سقطلق کوستران نبات یاخود حیوانلر ینده معلوم یا غیر معلوم بر سببه مبنی یعنی مقصد و مرامه مقاومت ایدن بر موجب طبیعیه مبنی اوله رق و قوع بولور . موجب ایله مقصد یعنی بر شیئک یا بر ذی روحک موجب ایله انک موجود بولنمنسک مقصد و مرامی اراسنده البته بر علاقه و مناسبت وار در . و بو مناسبت حقنده جزئی معلوماتمز وار ایسه ده معلومات کافیه مز یوقدر . انجق کائناتده جاری اولان موجبلرک هر بر مخلوقاتک فائده سی ایچون توقیف ایدیه جکلمری تصور اولنماز . مثلا بر ادم دوشر و باجانی قیریلور بو قیریلان باجانی دخی جاهل بر ادمک الیه یاکاش یرلشدریلور . بعده اول ادمک بر باجانی دیکرندن قیصه اولدیغندن اقسایه رق یورومکه مجبور اولور . بو ادمک اقسامسک سببی معلومدر . و نوع انسانک هر بر فردینک ایکی باجانی بری برینه مساوی اولسون و بویله جه انک متانتی و جمالی محفوظ بولنسون دیو معلوم اولان و اکثریا جاری بولنان مقصد قانونی سالف الذکر ادمک اقسامسیله ابطال اولنورمی ؟ برده

باب ثانی وجود الهینک کائناتله اثباتی

فرض ایدهلم که دهها طوغمامش چوجق کندی اناسنک
 رحنده ایکن بر قضایه اوغرایوب صکره سقط اوله رق
 دنیایه کلور . بو کیفیت موجب قانوننه تابعدر فقط نوع
 انسانک مکمل اوله رق تولد ایتلری باینده مقصد قانونی
 ابطال ایده مز . بر قانون دیگر بر قانونک معاملات عادیه سیله
 یالکز بردفعه تخلف ایتسه همان هر وقت مشاهده ایتدیکمز
 مقصد و نظام مختل اولماز . ارسطوطالک قولنجه
 «خارق العاده (τέρατα) طبیعتیه مخالف دکل انجق عادتاً
 وقوع بولانه مخالفدر» و دارستک قولنجه «حقیقه هیئت
 عجیبه (Monsters) خلقتده بولنمز . فن عجایب مخلوقاتک
 (Teratology) تحری ایتش اولدیغی جنس لرك کافه سنی
 کور مشم و بونلرده قانون طبیعی اوزره بیومه یالکز عادی
 اولیان بر صورت کوره بیلورم بودخی اکثریا طبیعی بیومه
 عارضی بر سببله منتج اولان بر توقیفدن حاصل اولور و بو
 یکی حالده ذی روحک بیومسی قطع اولنماز انجق دهها
 یشامه یی مساعده ایتدیکی درجه یه وارورسه قطع اولنور»

فصل رابع موده متعلق اعتراضاتك جوابی

❀ اولوم وقوع بولسی اوزرینه مبنی اولان ❀

❀ اعتراضاتك جوابی ❀

بعضلرك اعتراضی اوزره حیاتك محافظه سی ایچون
و منتظم جسملرك نظام اوزره موجود بولنملری ایچون بو قدر
احتیاط و دقت وار ایکن شو ذکر ایتدیگمز هیئت عجیبه
یا خود سقطلق قطعیا ممکنسر قیلنملی ایدی . بوکا جوابا
بزده صورارز که نه درجه یه قدر بو مبدأ اوزرینه دوام
ایده جکسکز؟ هر نه که یشارسه دائماً وابدایشاملی می؟
موجود اولان هیئت منتظمه هر نه ایسه همان اول
هیئته الی الابد دوام ایدوبده اصلاً محو اولسونمی؟
نه سندله بونی طلب ایده بیلورز؟ نه بیلورز که علمی بی نهیایه
اولان بر ذاتك تدبیر و مقصدنجه بعض منتظم موجودات
فنا بولوب بشقه لره میدان ویرملری خیرلو اولیه جقدر .
مشاهده اولنان وقوعاتك کافه سنی بیان ایتکه قالقشانلرك
قنغیسی دهها سهولته بو وقعاتی بیان ایده بیلور؟ یالکز
مجرد موجبلری (علت فاعلیه) بیلان می یوقسه بونلر ایله
برابر هر بر موجودك اولدن و بلکه از لدن بر مقصد

باب ثانی وجود الهینک کائناتله اثباتی

و مرامه تابع اولدیغنی تصدیق ایدن ادم می؟ اشکار
دکلیدر که بالعموم موجببری (علت فاعلیه) قبول ایدوبده
هر زمان عملیات 'نسانیه'ده مشاهده ایدیلان و تسلیم اولنان
مقصد و مرامی (علت غائیة) بولوب تصدیق ایدن ادم
کائناتی و اسرار و احوال و مناسباتنی تحریده دها زیاده
عقلانه و موفقیتله چالشه جقدر .

❖ مرام و مقصد قانونی قبول اولتمسزین حل ❖

❖ ایدیلهمیه جک مسئله انسان مسئله سی ❖

بر کره تسلیم ایدلم که غیر عضوی (Inorganic)
یعنی ذی روح اولیان کائناتده حتی ذی روح اولان
جسملک ادناسنده موجب عامل یاخود علت فاعلیه
کافیدر . و مقصد قانونی لزومسزدر . ینه حل ایتک ایچون
بزه حواله اولنان مسئله دها طور یور زیرا مشکلات
ذی روح اولان مخلوقاتک اعلا سنده بولنور . بشقه مخلوقات
حقنده نه دیر سهک دیدلم . انسان صاحب عقل بر مخلوق
اولوب اعلا اولسون ادنا اولسون بر مقصده طوغری
دائما چالشمدهدر . ای کائناتده مقصدک من الازل بولنمسنی

انکار ایدنلر بیورکز بو مسئلہ یی حل ایدکز . کائناتده یعنی کائناتک وجوده کلمسندہ مقصد و مرام یوق دیورسکز فقط بو کائناتده دقتیزی جلب ایدن بر ذی روح بردن برہ میدانہ کلور بر ذی روح کہ یالکز صاحب عقل اولیوب بتون مدت عمرینی بر مرام و بر مقصد فعلہ کتورمک ایچون نیت، تدبیر، مشاورہ و معرفت استعمال ایتکده در . بو کیفیت نہ دن حاصل اولدی ؟ بو انسان دیدیکمز ذی روحک اشبو قابلیت کندی ترکیب مخصوصندن نشأت ایدر دیو جواب ویریلور . عجائب ! بتون کائناتی تفتیش و تحری ایتدک . هیچ بر یرده مقصد و مرامک اثرینی مشاہدہ ایدہ مدک ! یالکز موجب ایله اثر موجب ایله اثر بری برینی علی الدوام و بی نہایہ تعاقب ایتکده در . و بو تعاقب اثناسندہ بردن برہ خبرمز اولیہ رق بر وجود میدانہ کلوب دقتیزی فوق العادہ جذب و جلب ایدر . بر وجود کہ شمدی یہ قدر بولدیغمزک کافہ سنہ مخالف اولہ رق یالکز مقصد و تدبیرلہ ایش کوروب عمر کچورر . لکن عقل و معرفتک بتون ہیئت و تشکلی یالکز بویله مقصد و تدبیرلرلہ چالشمق ایچون وجودہ کلدیکی بدیدر .

باب ثانی وجود الهینک کائناتله اثباتی

❖ اصول عملیات انسانیه ❖

بو ذات (انسان) بر چوق جنس کراسته طو پلار . بر قاچ
صنعت صاحب لرندن ایشجی طوتار . اهلیتلو بر معمار
چاغرور . و نندن صکره بر خانه انشا ایتکه باشلار . یا خود
اهل ذراعت اولوب یری تیمار ایدر . تخم اکر . تخمک بر قاچ
مثلنی وقتیله دوشیرمک امیدنده بولنور و بو دوشیره جکی
محصولی بشقه معلوم بر نتیجه یه طوغری قولالانق مرامی
واردر . بو ذات معدنیاتی ، نباتاتی و حیواناتی و حتی
بولوتلرده چاققدده اولان شمشکی مقصد مخصوص ایچون
مثلا بر محلدن دیگر محله یوجلیق ایتک ، اوزاق محللره خبر
کوندرمک و اهل بیتک تعیشنی کورمک ایچون استعمال
ایدر . حالبوکه بوایشلرک کافه سنده دیگر بر مرامی واریعنی
صاحب ثروت اولق و صاحب ثروت اولمقدن مراد ذوق
وصفا سورمک یا خود نفوذ و تأثیر پیدا ایتکدر . و بلکه
کندی مقصد و مراملری یالکز کندوسنه منحصر اولیوب
بالعکس خیر خواه بر ادم اولسه بشقه لرک خیرینی ارامق
ایچون بو ذکر ایتدیگمز تدارکاتک کافه سنی کورمش اولور .

❖ منكر فكر محالى ❖

ای منکر و معترض . مسئله یی حل ایده یلدیگزمی ؟
 کائناتده مقصد اصلی و بدایتدن نهایته قدر عامل بر مرام
 یوق ایسه انسانک اوصاف ذاتیه سی و اصول عملیاتی نه دن
 حاصل اولور ؟ معجزه نوعندن بر شی قبول ایتزسین .
 اهل کتابی تحقیر ایدرسین . فقط معجزه نك معجزه سنی
 تردد ایتکسزین قبول ایتش اولورسین . سزك فكر كز
 اوزره یالكز اللهك موجود ایدوکنی دکل انسانك موجود
 اولدیغنی دخی انكار ایتلی سین زیرا طوتدیغکز مبدأ اوزره
 بویه بر وجودك بولنمی محالدر .

❖ اصول تفكر مرام و مقصد قانونی منتج اولسی ❖

تفكر کیفیتی هر نه وجهله تعریف اولنورسه اولسون
 ترتیب اوزره وقوع بولان شیدر . منتظم در . تفكرده
 مبدأ وار . قضیه وار . مقدمه لر ، قیاس و نتیجه بولنور .
 تفكر ایدن ذاتك تجربه سی و کسب ایتش اولدیغنی معلومات

باب ثانی وجود الهینک کائناتله اثباتی

اوزرینه مبنی اولان مقایسه و مستقبله طوغری نظر ایتک وار در . بویله اولماز ایسه تفکر دیدیکمز شی یالکز بر خیال و رؤیا و زائل اولور بخار در . و حتی تفکر مجنونک تخیلاتدن فرقلو اولماش اولور .

مقصد و مرام اولدیغی حالده انسانک عملیات ممدوحه و مشهوره سی اصلا وجوده کلز ایدی . کائناتده بالعموم و بلا استثنا مقصد و مرام بولمادیغی حالده موجودات ایچنده یالکز انسانک مقصد و مرام ایله ایش کورمک قابلیت ممکنسر اولور ایدی . بو تقدیرده اومروس شاعرک موجود اولسنه حاجت یوق . یالکز حروفاتی بریره کتوروب قارشدره رق هواده آتلسه ایدی اومروسک مشهور اثرلری میدانله کلور ایدی !

❖ مقصد و مرام قانونی انکار ایتنهک نتیجه لری ❖

بو بحثک خلاصه سی اوله رق یالکز موجب و اثر قانونی قبول ایدوبده مقصد و مرام قانونک کائناتده جاری اولدیغی انکار ایتکدن بو نتیجه ایلرو کلور . (۱) مقایسه و تشبیهات ایله استنتاج قانونلرینی برطرف ایتک و بشقه

فصل رابع مسئله نك جهت اهميتى

ادمرك صاحب عقل اولوب اولدقلىنه شبهه ويرمك
 ديمكدر . (۲) كافه قوانيں عليه نقض و فسخ اولنمش
 اولور . چونكه كائناتده مشاهده اولنان موجودات
 و وقوعاتك در ايت انسانيه ايله اصلا بر رابطه يا مناسبتى
 قبول اولنماش اولور . (۳) منكر اولنلر كندى سوزلريله
 طوتيلورلر . چونكه بشقه هر بيرده مقصد و مرام قبول
 اولنمقدنصكره هر ادم بلا استثنا عقول و در ايت انسانيه ده
 مرام و مقصد قبول و تصديق ايتكه مجبوردر . بناء عليه
 معترض و منكرلرك اعتراضلىنه كوره مقصد و مرام
 قانونى بالعموم جارى دكل ايسه ده موجود اولوب بر
 درجه يه قدر جارى اولديغى اثبات و تصديق اولنمشدر .

❖ مسئله نك جهت اهميتى ❖

دقته شايان بر كيفيت دها وار يعنى مقصد و مرام
 قانونى تفتيش و تصديق ايتك اهميتى صاحب عقل اولان
 موجوداته يعنى جنس انسانه و انك وجوده كلوب كره
 ارض اوزرنده يشامسييله انك عاقبتنه متعلق اولديغندندر .
 و ارباب معارفك دقتنى جلب ايدن بودر . و بو كيفيتك

باب ثانی وجود الهیہ کا ثبوت اثباتی

سبب ارادی غمزدہ سبب انسانک فضیلتندہ بولنور . ذی روح اولیان موجوداتک موجود اولوب اولدقلری کندولرک نہ سنہ طوقنور ؟ بر طاشک موجود اولوب اولماسی کندوسنہ نہ وظیفہ ؟ بر قیا بللوری شکانک زاویہلری الی اولسون سکر اولسون کندوسنہ نہ وظیفہ ؟ یلدر و سیارہلرک منتظم بولنوب معلوم و قتلر ، مسافہلر ، حرکتلر و مناسبتلر موجبہ ترتیب اولندقلری اول جسملرک جوہرلرینہ یا خود نفسلرینہ نہ وظیفہ ؟

شمدی انسانہ کلام . خیر ایله شرک فرقنی بیلوب بیللمسی ، حقیقتی ضلالتدن تفریق ایدوب ایدہ ممسی ، کندینک موجود اولسنک سببی و مقصدی و کندی عاقبتی حقندہ خبردار اولوب اولماسی بیہودہ میدر ؟ بحث انساندن اولدیغی کی انک قیمت و اہمیتی آنیدہ تبدل ایدوب درجہ سز دہا زیادہ اعلا و حتی دائمی اولور .

❖ موجود اولانک مقصدی زہدہ ارانملی ❖

ذی روح اولیان موجوداتک کندی کندیلری ایچون مقصد و نتیجہ اولماز سہیلہ صاحب عقل اولان موجوداتہ

فصل رابع هر موجودك مقابلی بولندیغی

وسيلهٔ تعلم اولق اوزره موجود بولندقلری ممکن دکلری؟
 ذی روح اولیان موجوداتک مرام و نتیجه سی انسانی
 بولنوب انسانک وجوده کلری و اولومه مبتلا اولیان
 روحه مالک اولسنک مرام و مقصدینی کندیسنندن اعلا
 یعنی کندیسنی وجوده کتوران ذاتده ارامق جائز دکلیدر؟
 بویله جه علم الهی طبعی علم الهی الهامینک کشف
 ایتدیکنی ایما ایدر. وبالاده کوردیکمز کی علم و حکمت
 اصلا بونی انکار ایده مز.

❖ موجود اولان هر شیئك مقابلی وار در ❖

اورو محکاک بولندقلری یرده سینکار دخی بولنور.
 قیرلانغجاک بولندقلری یرده بوجکار بولنور. اوت پیان
 حیوانلر بولندقلری یرده یینه جک اوت بولنور. هر نوع
 معلوماتی تحصیل ایتکه قابلیتی اولان انسان بولندیغی
 یرده تحصیل ایده بیله جکی معلومات بی نهایت و متنوعه
 بولنور. واکر بو کره ارضده چوق واسع اقالیمده
 ذی روح بولنمزه مستقبلمده وجوده کله جک ذی روحلرک
 حفظ و تعینلری ایچون اول اقالیم واسع مخزنلرکی بولندقلری

باب ثانی وجود الهینک کائناتله اثباتی

ممکن دکلی؟ بیوک حیوانلر دیری و حسلو قسملرینه متانت ویرمک ایچون و اولو کبی حسسز کیکاره محتاج اولدقلری مثلاً کره ارضک بویله جه ذی روح اولنلرینک محافظه سی ایچون اولو کورنان مادهیه محتاج اولدیغی ممکندر . کچمش عصرلرده کونشک ضیاسی اولوقت موجود اولان و شمدی زمینک دروننده معدن کموری هیئتنده اولان نباتاتی بسلایدی . یانار طاغلردن نباتاتک تعیشی ایچون لازم اولان بر نوع غاز یعنی حامض فحم غازی (Carbonic acid) بر دوام چیقار . هوا الکتریقله طولو اولدیغنده نباتات ایچون لازم اولدیغنده دیگر بر اثر یعنی نشادر غازلری (Nitrate of ammonia) ظهور ایدر . و بویله جه عوام ناسه و بلکه ارباب علومه شمدییه قدر معلوم اولمیان مطابقات هر طرفده بزی احاطه ایتکده در . فرض کابی (Nebular hypothesis) یعنی هر موجود اولان شیئک هیئت اصلیه سی غایت خفیف بر بولوت کبی بولندیغی ذمعی قبول ایدنلر وار ایسه ده فراموش اولناملیدر که بو بولوت دیدیکمز شیدن هر نه که حاصل اولدی ایسه ینه قانون اوزره و دهها منتظم بر

فصل رابع ایکی مهم سؤال

نتیجہ یہ طوغری بالتدریج تبدل و حرکت ایدرک حاصل اولمشدر . یعنی بو ذمعی قبول ایدنلر دخی مقصد و مرام قانونی بر طرف ایتیش اولمازلر . و بو رسالہ نك باب ثانيسنك فصل اولندہ کائناتك وجودہ کلمسی موجب عاقل اولمیدرق وقوع بولدی ديمك محال اولوب محضاً حیاقتدر دیو بیان اولمشدر .

❖ ایکی مهم سؤال ❖

ایکی سؤال دها قالور . برنجی سؤال خلقت نہ ديمكدر ؟ خلقت مادہ نك بالتدریج تبدیلیہ متنوع شکل و ہیئتہ کلمسی ديمك دكلدر . برده اللهك وجودندن کویا حاصل اولوب تبدل ایدرک و آیری آیری جسملر اولدرق نہایت فرد فرد وجودہ کلمسی ديمك دكلدر . بو ذعم وحدت وجود طریقہ مخصوص اولوب البتہ کایا رد اولنور . و دخی خلق ایتك کائناتی ازلی مادہ دن یاخود مادہ جوهر فردلرندن تشکیل ایتك ديمك دكلدر . بو دخی کافی سببلرله رد اولندیغی بالادہ کوسترلمشدر .

خلق ایتك کائناتی یوقدن وار ایتك ديمكدر دنیلور

باب ثانی وجود الهیہ کا ثبوت اثباتی

و ہو صحیح اعتبار اولنورسہ ده یوقدن وار ایتک تعبیری
ایضاح ایتک لازمدر زیرا یوق دیدیکمز لاشی ینہ برشی
و ماده (Substance) حکمنده طوتلما مالیدر و دخی
شو یوق دیدیکمز هر موجود اولان شیئک عکسی
(Negation of being) دیو طوتلی دکادر . بالترجیح
الله کائناتی خلق ایلدی دیدیکمز ده هر موجود اولسی
ممکن اولنک فکری و رسم اصلیمی من الازل عقل کامل
و حکمت مستقله نك نزدنده حاضر اولسی لازم کلور .
شویله که کائناتی خلق ایتک فکری و رسم اصلیمی عند
الله حاضر بولسانک هیئت ذاتیه ظاهره یه کلسی یا انک
وجوده کلسی و یا خود خلق اولنسی دیمکدر .

ایکنجی سؤال . خالق نه مقصدله کائناتی یراتدی
و خصوصاً اک اعلا اولان مخلوقی یعنی انسانی نه مقصدله
و نه نتیجه یه خلق ایلدی ؟ بوکا جوابا بعضنر کندوسی
ایچون خلق ایتدی دیرلر . او یله ایسه یا کندی جلالی
ایچون یا کندی صفاسی ایچون خلق ایتدی دیمک اولور .
بوکا کوره کائنات خلق اولنمازدن اول اللهک جلالی
یا خود صفاسی غیر مکمل بولنسی ایجاب ایدر و بواوله مز .

فصل رابع خلقتك مقصدي ازدياد صلاح

بعضلر الله عالمی انسان ایچون خلق ایتدی دیرلر . دیمکدر که بی نهایت و کامل اولان ذاتک اعمالک نتیجه سی محدود و غیر کامل مخلوقده بولنور . بو دخی قبوله شایان اولمدیغی بیدیدر . بشقه لر الله کائناتی مخلوقاتک سعادتک تزیادی ایچون خلق ایتدی دیرلر . بونی اولقدر قطعیا رد ایتمز لازم کلز . فقط بو دخی کافی اولمدیغی کوریلیور . زیرا مخلوقک راحت و سعادت حاللرندن اعلا و افضل برشی وار در او دخی صلاح و معرفت اللهدر . صلاح و اخلاق کامله و اوصاف مقدسه ايله موصوف اولان و الله تعالی بی یلوب اکا عبادت ایدن ذواتک تزیاد ایدوب الی الابد موجود اولمری کائناتک خلق اولمنسه کافی سیدر .

❁ الله متعالک تحت حکمنده صلاحک ❁

❁ ازدياد بولسی ❁

بعضلرک قولنجه عالمده مسرتدن زیاده الم وار وخیردن زیاده شر وار و ککیتد کجه شر خیره غلبه ایتمکده در . فقط بویله اولمدیغی منصفانه دوشمنوب

باب ثانی وجود الهینک کائناتله اثباتی

تفتیش ایدنلرک معلومیدر . بوندن ایکی بیک سنه مقدم عالم
 طوایف و حشیه نك هجومی هنکامنده می معهور و ابادان
 ایدی . حالا اقامتگاه خانه دن زیاده حبسخانه می وار؟
 اولردن زیاده تیمارخانه و خسته خانه می وار؟ آشجیلردن
 زیاده حکیملرمی وار؟ سائرلرک ایولکنی طلب ایدنلردن
 و انواع خیرات تأسیس ایلیانلردن زیاده قاتللرمی وار؟
 اگر شمدی به قدر خیر شتره غالب کلسه ایدی عالم بوانه دک
 باقی قالماز ایدی . انجق بالتدریج هلاک و خرابه یوز طوتوب
 زائل اولور ایدی . لکن مشاهده ایتدیکمز نه در؟ کائنات
 یالکز باقی قالمش دکدر زیرا علمک اثبات ایتدیکی شیلردن
 درکه کائناتده هر زمان و هر یرده و بلا استشنا نظام
 نظامسز اغه غلبه چالمقده در . نقصانندن مکمله و ساده اولاندن
 دها زیاده مرکب اولانه طوغری بردوام ترقی آلمقده در .
 فقط برشی نه قدر مختلط و مرکب ایسه اولقدر دها زیاده
 محافظه سی مشکدر و بوندن اشکار درکه کائناتده
 ایشلمکده اولان خیر و برکت یالکز حفظ و صیانت ایدر
 قوته مالک دکل بلکه تنظیم و احداث ایدر قوته دخی
 مالکدر .

بری دیر که کائناتده بولنان مسرتدن ایسه الم چو قدر
چونکه ایش-کذارلق المله در . فقط ایش-کذارلغك المله
اولدیغنی انکار ایدرز . حرکت ایتك ، چالشمق ، ایش
کورمك موجب مسرتدر و حتی ارثا مالک اولمقدن ایسه
چالشمقله برشی اله پچورمك موجب مسرتدر . اخلاق
مدوحه و کریمده ترقی ایتك اصل سعادتدر و اک اعلا
نتیجه لره طوغری وقوع بولان ممانعته غلبه چالمقله بیله اک
اعلا سعادت و مسرت بولنور . اخلاق مدوحه نك کماله
واصل اولسی و مخلوق اولان صاحب عقلك کندی
خالقنی بیلسی اللهك خلق ایتمش اولدیغنی کافه مخلوقاتك
نتیجه اصلیه سیدر .

حکمت و علم الهی طبعی الله حقنده معلومات
کافیه و مکمله ویرمش دیو ادعا اولنمز . حکمت و علم الهی
طبعی واسطه سیله اللهك هر شیئی خلق ایلدیکنی بیلورز
خلقتك مقصد و نتیجه سی خیرك محافظه سی و تزايدی ایچون
اولدیغنی اکلاشیلور . خالق مطلقك مقصد و مرامنجه
وجوده کتوردیکی کائناتده خیر شره و صلاح هر نوع
کوتیلکه غلبه چالمسنه انتظارده ایز و بو حقیقتلری قبول

باب ثانی وجود الهینک کائناتله اثباتی

و تصدیق ایتک یالکز ایمانک مقتضیاتندن دکل انجق
 علم صحیحک و حکمت عالیهنک مقتضیاتندندر • بولندیغمز
 عالمده آخرت حقنده خبرمز آز اولسون چوق اولسون
 ینه شتری رد ایدوب خیره امثال ایتک، ریا و کذبندن اجتنابله
 صلاح و مرجت و مرؤت و محبتہ تابع اولمق و کسر
 نفسله بنی ادمک خیری ایچون و الله ایچون یشامق علم
 و حکمتک تعلیم و طلب ایلدیکی حقیقتک اعلا سیدر •



فصل خامس روح انسانیدن اولان دلیل

{ فصل خامس }

❖ عقل و روح انسانیده الهك وجودی و صفاتی ❖

❖ حقنده ایما اولنان معلوماته دائر ❖

جسد انسانك اعضاسنی و سائر مخلوقاتك اعضا ریه
مطابقاتنی تفحص ایتدیكهمزده بر خالق و حافظ مستقلك
موجود اولسی حقنده دلائل كافیهیه تصادف ایتدك.
حالبو كه هر نه قدر روح انسانی مخلوقاتك جمله سندن
زیاده اقناع ایده جك صورتده الهك وارلغنی تصدیق
ایدرسه ده ینه شمعی تفحصه آله جغمز روح اولدیغندن
انی میدانه كتوروب قوتلرینی حل ایتك جسدك اعضاسنی
تفتیش ایتك قدر سهولتلو اولیوب عوام ناسك ذهنلرینی
قولایجه الزام ایده جك و دلیللرینی کوز اوکنه قویه جق
بر شی دكلدره مادی شیلر درحال بزه تأثیر ایدره روحانی
شیلر ایسه کوزك کورمدیکی و قولاغك ایشتمدیکی شیلر
اولدقدن بشقه انلری تفتیش ایدنلر دخی آزدیره

باب ثانی وجود الهیہ کا ثبات اثباتی

و بنا علیہ بویہ شیلرک تفحصندن استحصال اولیان دلیلار
 لایقیلہ موازنہ اولمدقلری ایچون بو نوع دلیلارہ عوام
 ناس طرفندن کرکی کبی اہمیت ویرلرہ فقط ارباب حکمت
 عقلیہ عندندہ انسانک روحی جسدندن نہ قدر قیملو و
 فضیلتلو ایسہ انک خالق حقندہ اولقدر زیادہ قیملو معلومات
 و دلیلار حصولہ کتوررہ و بورادہ دقتہ شایان برخصوص
 دہا وار در اودہ اللہ حقندہ روح انسانیدن ایدندیکمز
 معلومات اللہک موجود ایدوکنی تصدیق ایتمککہ برابر
 بالخاصہ انک صفات الہیہ سی حقندہ زیادہ و الزم معلومات
 ویرمسیدرہ جسدمن بر خالق ایما ایتدیکی کبی روح
 دخی بالذات مخلوق اولدیغندن بر خالق ایما ایدرہ فی الحقیقہ
 اللہ حقندہ کائناتدہ بولنسان دلیلاری محضاً روحی یعنی
 تفتیش و تفحصہ مقتدر اولان عقل و ادراکز واسطہ سیلہ
 تشخیص و تصدیق ایدہ یلوررہ دلائلی ارایوب بولان و بو
 دلیلاری بری بریلہ مقایسہ و موازنہ ایدن بزم عقلزدرہ شویلہ کہ
 مخلوق اولان عقلزک ادراکات جزئیہ سی واسطہ سیلہ
 اللہک بی نہایہ علم و حکمتنہ دائر معلومات کافیہ و مکملہ
 دکل ایسہ دہ معلومات صحیحہ یی ایدینہ یلوررہ

کندی اقربا و احبابمزه و حیواناتمزه بیه
کندولرمزده حس ایتدیگمز مرحمت و شفقتدن بزی و
انلری خلق ایدن اللهک کریم و رحیم و شفقتلو و هر نوع
ایولکک منبعی اولدیغنی استنتاج ایدوب تصدیق ایدرز.
صفات الهیه حقنده دهها خصوصی دلیلار بولوب عیانا
بیانی ضمننده بو فصلی ایکی به تقسیم ایدرز.

❖ قسم اول ❖

ضمیر انسانینک تشککندن و معامله سندن اللهک صفت
عدالتی حقنده یقینا کسب معلومات ایدرز.
(۱) ضمیر انسانینک صلاحیت و اوصاف ذاتیه سنی
بیان ایتک لازمدر. ضمیر خیر ایله شرک ازلی و ابدی فرقنی
اظهار ایدوب کندی صاحبنی شریدن صاقندرهرق خیره
طوغری تشویق ایدر. ضمیر انسانک دروننده حاکم و
مرشد در. بر طویوش دکل. بر حس دکل یالکز بر قوت
ده دکلدر. بلکه انک ایله شریعت الهیه نک علاقه
مخصوصه سی بولندیغندن عدالت الهیه حقنده انک شهادتی
واضح و چوق دفته شایاندر. انسان خلق اولندیغنده

باب ثانی وجود الہینک کائناتلہ اثباتی

انک اوزرینہ حکم و نظارت ایتک صلاحیتی بالخاصہ
 ضمیرینہ احسان اولندی . و انسان حال برائتده دوام
 ایتسه ایدی و ضمیر انسانینک قوت و نفوذی صلاحیت
 اصلیه سیله مساوی اولسیدی مستقلا بنی ادم اوزرینہ
 الہک و کیلی کبی حکومت سورر ایدی . انک صلاحیتی
 بویله جه اعلا و مفید اوله جق ایدی . لیکن حیفا که هر
 کسک تجربه و مشاهدہ سنه کوره انسان ضمیرینک قوت
 و حکومتی بویله دکدر . و بونک سببی بولقده مشکل
 دکدر . زیرا بنی ادم کندی شهوتلرینہ اسیر اوله رق
 ارادتلی دخی ضمیرلرینک صلاحیت حقیقیه سنه مطیع
 اولمقدن عدول برله غیر مقبول هوا و هوسلرینی فعله
 کتورمکه قوشارلر . بوکابنا ضمیر کناھے دوشمش عاصی
 ادملر اوزرینہ کرکی کبی حکومت سورمکه مقتدر اولیوب
 صلاحیت اصلیه ذاتیه سنی ضایع ایدر . انسانک طبیعت
 اخلاقیه سی مرکب اولوب عقلک دائره سی ، احساسک
 دائره سی ، ارادتک صلاحیتی ایله ضمیرک صلاحیتی واردر .
 عقلک دائره سی حقیقتی ارایوب صحیحی غیر صحیحدن
 تفریق ایتکدن عبارتدر . ضمیرک صلاحیتی خیری شردن

ضمير انسانی

فصل خامس

تفریقہ احساسی یا تحسین یا تقبیح ایدوب قوہ انتخابیہ و اجرائیہ اولان قدرت یعنی ارادتمز اوزرینه انک احکام حقیقیہ سی مکملدره و انسان حال معصومیت و برائتہ قالمش اولسه ایدی ضمیر ایله ارادتک علاقہ سی مکمل و مفید اولور ایدی . لکن تواریخ انسانیه نك كافه سنك شهادتہ کوره قدرت دائما حقانیت و صلاحیت عادلہ اوزرینه بالفعل غالب کلکده دره . بنی ادم قدرته و احساس ذاتیه لرینه تابع اولمق ایچون خلق اولمندی . انجق کندی دروننده بولنان حکمداره مطیع اولمق ایچون خلق اولندی . و انسانک خطا و تقصیراتنک اغراغی بوندن عبارتدرکه خالقنک کندیسی حقنده اولان مقصد کریمنه مغایر اوله رق کندی ضمیرنک صلاحیتنی طانیوب رد ایدره . و کندی احساس غیر مقبوله سیله دومنسر قالمش اولان ارادتک هدایتہ کوره قوہ روحانیہ لرینی صرف ایدره . اکثریا انسانلر ضمیرک مطلوباتنه کوره حرکت ایتک کرکدر دیو تصدیق ایدرلر و بویله حرکت ایتدجکه ضمیرک حقوقنی ابطال ایدوب مخالفت ایدرلر . هم ادم کندی ضمیرینه کوره حرکت ایتدجکه سلامت درونیه مالک اولور .

باب ثانی وجود الهینک کائناتله اثباتی

و ضمیرینه مخالف اوله رق حرکت ایتدجکه اضطراب
درونی به مبتلا اولور . فتنه و فساد و غلبه عصیان
واسطه سیله حق حکومت کندیسنه مسلم اولان بر حکمدارک
امری بر محمله جاری اولیوبده بر بشقه سنک اوراده حکومت
سورمسی انک حق سر یحیی اسقاط ایتمز . عصیان بر زمان
و بر یرده غلبه ایتدی ایسه ده حکومت سورمک حق ینه
انکدر . بویله جه ضمیر انسانینک حکومت سورمکه اقتداری
قالماز سده ینه روح انسانی اوزرینه حکومت ایتک
صلاحیتی باقیدر .

(۲) ضمیر انسانینک صفات الهیه و باخصوص

عدالت الهیه حقنده و یردیکی معلومات بیاننده در .
ضمیر انسانی طوغریدن و اشکاره الهیک حق و عادل
ایدوکنی تصدیق ایدوب صفات مزبوریه دائر شهادت
ایدر . چونکه ضمیر انسانک دروننده حق قانونی اعلان
و تنفیذ ایدوب انی اجرا ایتدرمکه چالشور . بنا علیه
ضمیرک خالق حق و عادل بر ذات اولمسی ایجاب ایدر .
اگر انسانک خالق عادل اولسه ایدی انسانه خیر ایله شرک
فرقنی کوستران بر قوه روحانیه و یررمی ایدی . باخصوص

ضمیر انسانی

فصل خامس

اگر انسانك اوصاف اخلاقیه سی کنساهده میال اوله رق
یرادلدیغی صحیح اولسه ایدی هیچ ممکن اوله بیلورمی
ایدی که هر ادمك دروننده کندی حرکت ذاتیه سی و ظالم
خالق علیه نه حکم ایدن بر قوت بولنسون . بویله بر
تصورده بولنق محالدر . انسان خیر ایله شری فرق
ایدرسه و یالکز خیری اجرا ایدوبده شردن احتراز ایتدجکه
سلامت درونیه یه مالک اوله بیلورسه بو خصوص انکار
وجرح اولنماز بر دلیلدر که انسانك خالق مستقلا عادل
و حق اولوب شردن استکرا هله خیری طلب ایدن اللهدر .
و هر نه قدر انسانلرك ضمیرلری کورلنور یا خود انلرك
فتوالرینه دقت اولنماز ايسه ده و هر نه قدر ضمیر انسانینك
شمدیکی قدرتی صلاحیت اصلیه سیله مساوی دکل ايسه ده
ینه بو خصوصده عدالت الهیه حقنده و یردیکی شهادته
اصلا خلل کلدیکی درکاردر .

عدالت الهیه ضمیر انسانینك شهادتی واسطه سیله
اثبات اولندقدده اوزون برسلسله براهین اوزرینه مبنی اوله رق
اثبات اولنماز انجق رأى العین بر شهادتله اثبات اولنور .
فقط بویله اثبات اولنمسی اثباتك صحت و قوتنه خلل

باب ثانی وجود الهینک کائناتله اثباتی

کتور میوب بالعکس اکا ده‌ها زیاده قدرت و تأثیرات و یردیک‌ی جله‌نک معلوم‌یدر .

حق و عدالت الهیه‌نک ضمیر انسانی شهادتیه‌له
اکیدا تفهیم و تصدیق اولدیغی کافه توارخ انسانیه
واسطه‌سیله بر تفصیل بیان اولمشدر و بلا شبهه موجب
شکرانیت برشیدر که انسانک روحنده کندی خالقنک حق
و صدق و عدلی اثبات ایدن شهادت حقیقیه بولنور .
زیرا خیر ایشلیان ادمک ضمیر استراحتی خالق و حاکم
مطلق عنده کندیمی مقبول اولدیغی تصدیق ایدر
و شر ایشلیان ادمک ندامتی خالق و حاکم مطلق کندیمی
علیه‌نه غضبه کلمش اولدیغنه شهادت ایدر . بودخی علم الهی
طبیعی‌نک تعلیماتندن اولدیغی مثل او عوام ناسک تصدیق
ایتدیکی قضایای مسلمه‌دندر . بوده یالکز تربیه و مدنیت
خصوصنده تقدم ایش اولان ملت‌لر اراسنده دکل انجق
یبانی، جاهل و تربیه‌سز طائفه‌لر اراسنده دخی مسلم و مؤثر
بر حقیقتدر .

(۳) اعتراضات

سالف‌الذکر افادات و ایضاحاته اعتراض اولنور که

فصل خامس اعتراضاتك جوابی

ضمیر انسانی الله و حید حقنده و تغیر ایتز عدالت الهیه حقنده
شهادت ویرمن چونکه بر ادم بر شیئی ایو صایار و دیکری
همان اول شیئی کوتی اعتبار ایدر . و بر ملت بشقه ملتک
قبول ایتدیکی مبادی اخلاقیه یی قبول ایتز . بوکا بروجه
اتی جواب ویررز .

(۱) بر حاکم مطلق وار و اول حاکم عدالت اوزره
انسانلره مجازات و مکافات ویرر دیو کافه بنی ادم طرفندن
بالاتفاق قبول اولنور . و همان شمدی اثبات ایتدیگمز
شی بودر .

(ب) انسانلرک ضمیرلرینک ویردکاری فتوالر حقیقه
دکل انجق صورت ظاهره جه بری برینه مغایر در زیرا
(ح) عقول انسانیه حل اولنه جق مسائل مختلف
طرزله فهم ایدرلر .

مثلا بوندن اون بش سنه مقدم فرانسزلره و آلمانلره
طانشلسه ایدی جمله سی بردن سببسز یا خود جزئی برسببله
محاربه آجق حقسزلق در دیو تسلیم ایدرلر ایدی .
حالبوکه فرانسهنک اعلان حرب ایتسی سببسز اولوب
اولدیغی اوزرینه اختلاف بولندی . و بوراده ایکی نوع

باب ثانی وجود الهینک کائناتله اثباتی

حکیمک موجود اولدیغی اشکار در . سببسز محاربه ایتک
 حقسز در دیو ویریلان حکم ضمیرک تحت ادارهسنده بر
 حکم در و فلان وقتده فلان ملتک اعلان حربی کافی
 سببه مبنی اولوب اولدیغی ضمیرک تحت ادارهسنده
 اولیوب بالخاصه عقل انسانینک تحت ادارهسنده در .
 (د) احساس انسانیه ادملرک عقلارینی قرارتدیغی
 کبی ضمیرک حکمی دخی ستر اولنوب مطلوباتنک اجرایی
 اهمال اولنور .

(ر) چوق دفعه ادملر حقسز بیلدکاری شیلری
 حق در حق در دیو چاغره رق عنادله اجرا ایدرلر .
 (س) بر طریقله سلوک ایتکه آلمش اولان ادم اول
 طریقک طوغری اولدیغنه سهولتله اقناع اولتماز . عادت
 اوزره استدیگمز شیئی ارتق استممک مشکادر . و قدیمدن
 برو بر طرفه میل ایدن ارادتدی دیگر طرفه چویرمک معجزه
 کبی برشی در .

(ص) حاکمزی کندی طرفزه میل ایتدروب علیهمزه
 دکل انجق لهمزه حکم ویردرمک طبیعت انسانیه نک عادت
 ارزولدیغی شیلردندر .

فصل خامس احساس خیریه و قبیحه

بنا علیه ضمیر انسانینک معامله سندن عدالت الهیه بی
اثبات ایدن برهانلره یعنی سالف الذکر برهانلرمزه
معتزضلرک تعرضندن خلل کلمیه-وب ینه محکم و مکمل
طورورلر ۱۰

❀ قسم ثانی ❀

طبیعت انسانیه ایله قوانین کائناتک صلاحه مطابق بولغلی
(۱) احساس خیریه نک موجب مسرت و احساس
قبیحه نک موجب حزن و ندامت اولملری حقنده .

شهوات نفسانیه یه اسیر طوتیلان ادم تیز کچر بر فانی
صفایه نائل اولورسه ده باقی بر عذاب درونیه مبتلا
اولدیغی معلومدر . تیز قزوب غضبه میدان ویرن ادمک
قلبی جنک میدانی اولور . بویله بر ادمک یوزینه غضبناک
اولدیغی حالده باقلورسه نه قدر راحتسزلغه و اضطرابه
اوغرا دیغی بللودر . طمعکار ادمک قلبی دارلاشمش
و تضییق ایدلمش اولوب هوا آلیان متعفن بر مخزن کبی در .
حسد و قسقا نجلق اویقوی کیدروب انسانه اشکنجه جیلرک
ویردکاری کبی تحمل ایدلمز اضطراب دائمی یه باعث در .

باب ثانی وجود الهیہ کا ثباتی اثباتی

بالانجی ادم قورقاق بر ادمدر • و بونلرک عکسی اوله رق
هم جنسلرینه خیرخواه اولان و سائرلرک ایولکی ایچون
چالشان ادمک استراحت درونیه سی مکملدر • کندی
شهو تلینه غالب اولان ادمک یوزی بیلہ منور اولور و بو
خصوص الہک کریم اولسی و اخرتہ صلاحہ مکافات
و کوتیلکہ مجازات ویرہ چکنہ شہادت قویہ اعتبار
اولنہ جغی واضحاتندر •

ارتکاب کناہ ایدنک صکرہ دن دوچار اولدیغی
ندامتہ یاخود خیرات اجرا ایدنک صکرہ دن حس ایتدیکی
مسرتہ بوبخشدہ نظر اولنماز انجق نتیجہ یہ باقیہ رق احساس
خیریدہ بالطبع متعلق اولان مسرت و احساس قبیحہ یہ
مربوط بولنسان الم درونیدن بحث اولنور • مثلاً بر ادم
بیچارہ یتیمک یانہ واروب انلرہ مقتضی اولان طعام و
البسہ یی ویرمک انلرک ممنونیتنی کوردیکندہ کندی کندیسنی
بالکایہ اونودوب یالکز معاونت ایتدیکی کیمسہ لک حالی
دوشنورسہ دہ کندیسی اک اعلا و باقی مسرتہ نائل اولور •
بالعکس بر ادم دیکرندن انتقام آلمق قصدیلہ اسایش اوزرہ
بولنسان بر خانہ یہ کیرہرک بغض ایتدیکی ادمک قاننی

فصل خامس احساس خیریه و قبیحه

دو کدیکنده و انک خانه سی خلقنک دهشت و حیرتنه موجب اولدیغنده کندی طبیعت روحانیه سینه مخالف اوله رق بر صفای شیطانیه نائل اولدی ایسه ده ینه عقربك صوقه سندن حاصل اولان اغریدن زیاده کسکین بر درونی اله دوچار اولور .

برده احساس خیریه کندی مرامنه واصل اولماز سده ینه صفای ذاتیه ضایع اولماز . حالبوکه احساس قبیحه کندی مرامنه واصل اولدیغنده جان غایتله راحتسز و مضطرب اولور . مثلاً حسد صاحبی حسد ایتدیکی ادمک بر خوردار اولسنی چکه مز . حسد کندی صاحبنک درونی یقار و ذاتا هلاک ایدیجی بر شی در . انسانی بویه خلق ایدن ذات جلیلک صفاتی حقنده نه استنتاج ایتک لازمدر ؟

اللهک عدالت اوزره خیری تحسین و شری تقبیح ایتسی دخی تابع اولدیغمز عادتلرک قوتندن اثبات اولنور . صالح ادم کیتدکجه صلاحده قوتلنور . و حقسن ادم کیتدکجه حقسنلرده قاتلاشور . صالح ادمه هر شی معاونت ایدر و حقسن ادمه کندی کوتی و قویلمش اولان

باب ثانی وجود الہینک کائناتہ اثباتی

سودا لرندن زیاده قوتلو و شجاعتلو دشمنی یوقدر • انسانک
اشبو طبیعت روحانیہ سی بیوک بر اثباتدرکہ انک خالق
عدالت صاحبی اولوب شردن استکراہ ایدرک خیر
اولانی تحسین و صالح اولانہ مکافات ایدر •

(۲) کائنات و طبیعتک قوانین عمومیه سی معاملات
مذمومہ انسانیه دکل انجق معاملات ممدوحہ انسانیه
مطابق اولہرق تشکیل اولمشدر •

انسان خبری شردن فرق ایتمک قدرتنہ مالک اولدیغی
کبی بو قدرتک استعمالی ایچون فرصت دائمہ سی واردر •
انسانک احوال و مطابقتی انی خیری انتخاب و شری رد
ایلمکک علی الدوام تشویق ایدر • اللہ هیچ بر قدرت و قابلیت
و مطابقتی آنک استعمالی ایچون فرصت اولقسزین
یراتمامشدر • و کائناتک قانونلری و انسانک بولندیغی حاللر
اللہک اندن اعمال خیریه طلب ایتدیکنی اثبات ایدر •

(۱) ذی روح اولیان مخلوقات طرفندن انسان
اوزرینہ کلان تأثیرات خیرلو اولوب انی خیر ایشلمکک
دعوت ایدر • موصلمک تبدلاتی کون ایله کچمکک بری
برینی متعاقبا علی التوالی کلملری ، ضیا ، روزگار ، یغمور ،

فصل خامس معاشرت انسانیہ

زمینک محصورلاتی و عالم نباتاتک جمالی، کافہ سی بر لیکده
انسانک وجودینک محنتہ آلت اولہرق ایشلر • انک عقلنی
اویانق صاقلایوب تحصیل معلومات مفیدہ یہ انی تشویق
ایدر و تحصیل ممکن اولان معلومات مختلفہ نک باعث منافع
انسانیہ اولدیغی انکار اولنماز • یر یوزئده یشامق منافقرہ
دکل انجق صالحلرہ موجب بر کتدر •

(ب) انساندن غیری ذیروح اولان مخلوقاتک
خلق اولندقلری، مقصدہ واصل اولملری، انسانی کندی
خالقنک کندیسی حقندہ اولان مقصدینی ارایوب انی فعلہ
کتورمکککہ برر وسیلہ دیوانک اوزرینہ تاثیرلرینی
کتورمکککہ در • زیرا انکار اولنماز بر شی درکہ منافق
ادملدن ماعداد ذیروحلرک جملہ سی نہ مقصد ایچون
خلق اولندیلر ایسہ کندیلرک مرام و مقصدی بولنمیهرق
انجق کندی اوزرلرینہ ایشلککده اولان قانونہ بلا ارادت
مطیع اولہرق انی اجرا ایتککده درلر • و بو خصوص
انسانہ بر اورنک و خیرہ طوغری بر تشویق اولمق کرک
ایدوی درکار در •

(ح) معاشرت انسانیہ عمومیهنک تشکلی معاملات

باب ثانی وجود الهیہ کائناتہ اثباتی

و اخلاق ممدوحہ بہ صحابت ایدر و معاملات مذمومہ بہ
 تقبیح ایدر . عوام ناسک شہادت و حکمی صالحی مدح
 و کوتی بی رد ایدر . هر یرده بویله در . غیر صالح ادم بیله
 غیر صالحی تحسین ایتیوب صالح اولانی مدح ایدر .
 بدویته بیله اخلاق قبیحه صحابت بولیوب تقبیح اولنور و
 خالق و حاکم مطلقک شہادتتری بدویلرک ضمیرلرنده یازیلو
 بولنور . حکومتلر ادملرک افراط درجه سنه وارمش
 اولان کوتیلکنه حدود ویرر . و بر کوتی ادم کندی
 اوغلنک کندینه مشابہ اولسنی استمز . بنأ علیہ کائناتک
 بو و بو مثللو قانونلرینی وضع و تخصیص ایدن ذات
 کندیسسی نه قدر خیری تحسین و شردن استکراه ایتدیکی
 درکار در . کوتی ادمک اعمال و احوالی کندی قابلیتنه
 مغایر در . انک ایچون بتون دنیا اخلاقجه بر جنک
 میدانیدر . بر دیوانه ادم کندیسندن بشقه ادملرک جملہ سی
 دیوانه اولدیغنی ظن ایتدیکی مثللو کائناتک قانونلری شر
 ایشلیان کیمسه به نظامسزلق کورنور و لیکن صالحه
 کائنات نظاملو و کندی حیات حاضرہ سی دخی بر بیوک
 نعمت و برکت اولوب کندی خالق عدالت و قدسیت

فصل خامس

نتیجه

و مرحمت صفتلریله موصوف الله متعال اولدیغنی طایفه رقی
دها کلمات ملهمه یه مراجعت ایتزدن بیه کندیسنه و احب
اولان خدمت و عبودیتنه کندی ضمیر و وجدانیله تشویق
اولندیغنی اقرار و تصدیق ایتکه مجبور در .



باب ثالث از منته متأخره ده بولنان ملحدك

❖ باب ثالث ❖

از منته متأخره ده بولنان ملحدك

❖ فصل اول ❖

بو ملحدك متنوع صور تلى .

❖ بر اعتراض خصوصى ❖

بو بحثه كبرنجه بر اعتراضه تصادف اولنور . يعنى
 بو بابك سرلوحه سنه باقلديغى كى " بزم عصر مزده
 ارباب معارفك جمله سنك نظر دقتنى جلب ايدن حكمت
 و علمك ملحدك ياد اولغى جائز دكادر " ديو بر اعتراض
 ايراد اولنور . " چونكه ارباب علوم اهل كتاب اولنورك
 بعض تعليماتنى رد ايتديلر ايسه بيله بو خصوص انلرك
 ملحد اولدقلى نه دليل اوله ماز " ديو معترض ادعا ايدر
 و دى " كلمات مله ده و براهين نقليه ده بولنان بعض

فصل اول بر اعتراض خصوصی

ادعای و افاده‌لر ارباب علوم طرفندن جرح اولندیغی
 حالده او قومش و علم تحصیل ایتش ادملر دلائل نقلیه‌یه
 دکل انجق براهین عقلیه‌یه رعایت ایتلیدر، « دیه‌رک
 شمدی‌یه قدر اثبات ایتدیگمز مبدألری قبول ایتکسزین
 بو اوچنجی بابده آچه جغمز بحثه اولدن مقاومت ایتک
 استرلر • بوکا جوابز بودرکه الان دقتزی جلب ایدن
 و بشقه‌لرک دقتنی دخی دعوت ایتدیگمز بر مسئله واردرکه
 انک حلّی هر حالده الزمدر • بومسئله دخی دلائل نقلیه‌نک
 قبول اولنوب اولنمیه‌جغی دکل انجق الیهک وجودی
 و صفاتی کائناتدن اثباتی ممکن اولدیغی مسئله‌سیدر • بزم
 عصر مزده بیله بوحقیقتی انکار ایلان و هیچ دکل ایسه
 انک اثبات اولنه بیله جکنه شبهه ایدنلر واردر بز دخی بو
 رساله‌نک برنجی وایکنجی بابلرنده بوحقیقتی تصدیق ایدن
 وانی انکار ایتک و انک صحتی حقنده متردد اولمق عقله
 مغایر اولدیغنی اثبات ایدن برهانلری میدان قودق واتی
 الذکر افاده‌لرله غیر مؤمنک منکر اولمسی لازم کادیکی
 اشکار اولور • الیهک موجود اولدیغنی قبول ایدرز دیانلرک
 برچوغنی منکر اولان ارباب علوم طرفندن اثنای مباحثه‌ده

باب ثالث از منہ متأخرہ دہ بولنان ملحدک

تضییق اولند قجہ اوصاف ذاتیہ ایلہ متصف و کائناتدن
بستون فرقلو و کائناتی و کافہ موجوداتی کندی
ارادہ سیلہ خلق ایدن الہی قبول ایتد کارینی و هیچ دکل
ایسہ بونک حقندہ شبہہ ایتد کارینی اقرار ایدرلر . اگر
بو ملحدک (Atheism) دکل ایسہ ذات اولان الہک
موجودیتنی قبول ایتک (Theism) دیمک دکلدر . بو
دیدیکمز ارباب علومک انکار و شبہہ لری رسالہ مزده
شمدی یہ قدر اثبات ایتدیکمزہ مغایردر و بویلہ لره ملحد
عنواننی ویرمک منطقہ مغایر اعتبار اولنما ملیدر .

❖ ملحدلرک و دهر یلرک جنسلری ❖

کندی عصر مزده موجودیت ذاتیہ الہیہ نی قبول
ایتمیانلر (Antitheists) اکثریا ایکی جنسدن یعنی
برنجی جنسی (Pantheists) وحدت وجود مسلکارندن
برینہ تصاحب ایدوب سالک اولنلردن عبارتدر و ایکنجی
جنسی (Materialists) دهر یون یاخود طبیعیوندن
معدوددر . بونلرک برنجی جنسی الہک کائناتلہ بر اولدیغنی

فصل اول ملحدانك متنوع صورتلری

ادما ایدر . اللهك موجود اولوب متحرك اولدیغنه اینانورلر
 وبشقه برشیئك موجود اولدیغنه دخی اینانورلر . وایکنجی
 جنسی کائناتك موجود اولوب منبع حرکت اولدیغنه
 اینانمقله برابر بشقه برشیئك موجود اولدیغنه اینانورلر .
 دقتیزی جالب ایدن عجیب بر واقعه در که بو بری برینه کایا
 ضد و مغایر اولان ذملر چوق دفعه بری بری ایله مختلط
 بولنور . شویله که وحدت وجوده ذاهب اولنلر اراسنده
 طبیعیون یا خود دهریون و طبیعیون اراسنده وحدت وجوده
 قائل ادملر دخی بولنور . (Materialistic pantheists)
 (Pantheistic materialists) وحدت وجودك اصل
 منشئی هندوستان ایسه ده ینه حال حاضرده اوروپاده
 بر چوق وحدت وجود مسلکئی قبول ایدنلر بولنور .
 و بوفلسفه نك پك چوق صورتلری و شعبه لری وار ایسه ده
 بودیارده چوق اعتبار بولمامشدر و هیچ بر طرفده
 کواکشمش اولدیغندن انك تفتیش و تفحصنه و جرح و
 تزیغنه وقت صرف ایتك لزومی کورنمز .

جبری دینلان فلسفه (Pessimism) استر مسالك

طبیعیه دن استر مذاهب وحدت وجوددن اعتبار اولنسون

باب ثالث از منه متأخره ده بولنان ملحدك

اولقدر موجب مأيوسیت بر فلسفه در که انك چوق
انتشارندن پك او قدر قور فلماز .

لاادریه فلسفه سی یعنی (Agnosticism) طوغریدن
طوغریه مذهب طبیعی (Materialism) دکل ایسه ده
طبیعیون بالعموم بو فلسفه دن قوت آلوب بوکا دخی
تقویت ویررلر . بو فلسفه نك مبدأرنجه بلکه الله وار فقط
وار ایسه ده انی بیلک انسانجه ممکن دکلدر . انکاتره ده
بوندن ایکی یوز سنه مقدم چوق مظهر رغبت اولان فلسفه
یعنی الهیون افکارینه (Deism) ذاهب اولنلر فی الحقیقه
طبیعیوندن ایدیئر . بونلر صکره دن ده تفصیلات اوزره
ذکر اولنه جقلر .

بودیاری استیلا ایدن فلسفه باطله طبیعیون مسلککیدر .
بو فلسفه نك چوق صورتلری وار . و بلا شبهه اك
زیاده مخاطره لو صورت اودر که رسما اللهك وار ایدوکنی
کویا اقرار ایله برابر بو اقراره متعلق هر نه وار ایسه
وظیفه ایدنمیهرك انسانك منافع مادیه سنك ترقیسنه
چالشور . مثلا دهریون و اشتراکیون و عدمیون
(Secularists , Socialists , Nihilists) دینلان معلوم

فصل اول ملحدك بر فلسفه جدیده اولدیغی

و اوروپانك بعض محالارنده هر كسك دقتنی جلب ایدنلر
طبیعیوندن اولدقلرینه شبهه یوقدر.

طبیعیوندن هر بریسی هر قنغی مسلككنده بولنورسه
بولنسون مادهنك ازلی و ابدی اولدیغنی ادعا ایله برابر
ادملرك منافع ماده لرینی هر شیدن زیاده مهم عد ایدر.
صفای صلاحه ترجیح ایدر و كائناتدن فرقلو و اوصاف
ذاتیه ایله متصف اولان اللهك وارلغنی انكار ایدر یاخود
اهمیتسزجه بر اقرارده بولنورسدهده "بزه مجهولدر" و "دنیا
ایله علاقه سی یوقدر" دیو ادعا ایدر.

شمدی بحثه کیردیكمز مسئلهنك مدخلنده طبیعیونك
بالعموم ایراد ایتدكاری بر ادعایه تصادف ایدرز. یعنی
انلرك قبول و تعلیم ایتدكاری فلسفه بو اون طقوزنجی
عصرده علوم طبیعیهنك تر قیسیله میدانه گلش بر فلسفه دن
عبارت اولدیغنی ادعاسنده بولنیورلر. بو ادعانك کایا و
قطعیا بی اساس اولدیغنی تصدیق ایچون براهین کافیهی
ایراد ایده جکز. طبیعیونك مسالکی غایت قدیمدر.

تاریخ میلاددن اوچ یوز سنه زیاده مقدم چینده
طبیعیون مسلكی ظهور ایدوب چوق طلبه قزانمشدر.

باب ثالث از منته متاخره ده بولنان ملحدك

بو تعلیمات باطله یه مقاومت ایتمک چین حکمای مشهوره سندن
منکچو نام مؤلفك الك مهم خدمتی ایدی . بو طبیعیوندن
یانکچون نام بر مؤلفك انکازجه یه ترجمه اولمش بر
کتابندن اتی الذ کر فقره لری بورایه درج ایدرز .

” ادملك مختلف بولندقلری خصـوصـ عمرلریدر .

متحد بولندقلری خصـوصـ اولومدر . دها حیاته ده ایکن
ادملك اراسنده ذکاوت و حیاقت ، شرف و شرفسزلك
فرقلرینی کورورز . وفات ایتدکلرندن صکره زوال و فنایه
یوز طوتمش بو قدر چوروکلك کورورز . انسانك نصیب
عمومیسی بودر . حالـبو که ذکاوت و حیاقت ، شرف و
شرفسزلك بزم المزدن کلدیکی مثللو شول چوروکلك و
زوال بولمه و محو اولمه بزم مرادمره منوط دکادر . بر
ادمك نه عمری نه اولومی کنندی النده در . ذکاوتی
کنندی النده دکل حیاقتی دخی النده دکل . نه کنندی
شرفی نه کنندی شرفسزلكی کنندی النده در . ذکی و
احق اولنلر ، شرفلو و شرفسزلر جمله سی تولد و وفات
ایدر . بعضلر اون یاشنده بعضلر دخی یوز یاشنده وفات
ایدر . صالح و عالم وفات ایدر منافق و احمق دخی وفات

فصل اول چينلو طبيعيو نك تعليمى

ايدرلر . ياوو و شون (بونلر اعزه مقامنده محترم ايكي ذات
 قديم ايدى) حياتده ايكن ادملك اك صالحى ايديلر وفات
 ايتدكن صكره بر آوج چوروك كيگ درلر . و كليه و چو
 (ايكي ظالم) ادملك اك كوتيلرى ايديلر وفات
 ايتدكن صكره بونردنخى بر آوج چوروك كيگ درلر . انلك
 چوروك كيگاريني برى برندن كيم فرق ايدە بيلور؟ اويله
 ايسه دها حياتده ايكن بو عمر مزدن نه قدر صفا بوله بيلور
 ايسهك بولهلم . اولك اوزره ايكن وظيفه ايدنميهلم . تحمل
 ايدلم . انتقالمزى تعجيل ايدلم كه فنا و فساد درياسنه غرق
 و نابيد اولهلم . اكر بر اذم صالحانه عمر پچورورده صفادن
 محروم قالورسه صلاحندن بر فائده مى يوقدر . وفاتندن
 صكره انى مدح ايدە بيلورسين فقط بر اغاج كوتوكنندن
 ياخود بر آوج طوپراقدن زياده سنك مدحكى حس
 ايدە ميه جكدر . اكر عمريني كوتيلهكه كچوزوبده صفاياب
 اولدى ايسه وفاتندن صكره انى ذم ايدە بيلورسين . فقط سنك
 ذمك نه اكا طوقنور نه كندى عمرنده بولديغى صفايى محو
 ايدە بيلور . اعتبار ديديكمزشى محضاً بر روزگار در . صلاح
 بر خيالدر . يالگز صفا سوران بر از حاليجه اولور . “

باب ثالث از منہ متأخرہ دہ بولنان ملحدک

اشته طبیعیون فلسفہ سنک قویوسی و خالصی
شودر . بوچینلونک افادہ لری صافی و آچیقدر . اگر بو فلسفہ
کوپکار و خنزیرلر ایچون احداث اولنسه ایدی انلرک
حالرینہ یاقشور ایدی . اک غریبی بودر کہ انسان صورتندہ
اولان بر ذات فلسفہ اسمیلہ بو کبی صاچہ سوزلر میدانہ
دو کیور . بونک جرح و تزیفنہ تنزل ایتیمہ جگہز معلومدر .
کندیلکندن جرح اولنور .

فلسفہ یونانیہ نک بحثہ کچجہ تاریخ میلاددن تحمینا
در تیوزاللی سنہ مقدم دیموقریطس اسمندہ مشهور بر معلم ظهور
ایدوب بر مذهب طبیعی ایجاد ایدی و ایکی عصر صکرہ
یونانی ایقوروس و رومالی شاعر لوقریتیوس انک اصولنی
قبول و تعلیماتی توسیع و تفسیر ایدرک تا بو کونہ قدر کسب
شہرت ایتیش اولان مذاہب طبیعیونک اک زیاده مشهورینی
کمالہ ایصال ایتشدر . بو مذاہبک مبدأ و اصولی و نتیجہ لری
بو کونکی کونندہ کسب شہرت ایتیکدہ اولان طبیعیون
فلسفہ سنک مبدأ و اصولی و نتیجہ لری ایله همان بر
اولدیغندن بونی بر تفصیل بیان ایتمز لازم کلور . بالذات
دیموقریطس اخلاق ممدوحہ اصحابندن اولغله برابر تعلیمات

فصل اول فلسفه یونانیه • دیموقریطس

اخلاقیه سی دخی مذموم اولیوب بالعکس صاف و مدحه
شایان اولدیغی مسلدر • نوع انسانک و اصل اوله بیله جکی
خیر و سعادت ذوق و صفای جسمانیده و ثروت و شرفده
و نفوذ صاحبی اولمقده و سائرلر اوزرینه حکومت
سورمکده ارامدی • انجق انسانک خیری و سعادت
اصلیه سی طاهر و سالم روحه مالک اولمسنده در دیو ادما
ایدر ایدی • انک تعلیم ابتدکی فلسفه یی بویله جه بالاختصار
تعریف ایده بیلورز •

«کائنات ذرات ایله ابعاددن عبارتدر • ذرات بی
نهایه چوقدر و ابعاد نامتناهیدر • بو ذره لر ازنی اولوب
زوال بولمز و افنا ایدمز • خلقت دنیلان شیئک اصلی یوق
و بر شیئک خراب اولسی دخی یوقدر • خلقت تعبیری
قوللانورسه ق ترکیب اتمه دیمکدر و خراب و محو دخی
تفریق اتمک یاخود آیرمق دیمکدر • قوت تعبیری حرکت
ایتمکده اولان ماده یه اطلاق اولنور یاخود متحرک ماده
قوتدر و کرک ماده نک کرک قوتک مقداری دایما بردر •
تزیید و تنقیص قبول اتمز • ذره لرک اوصاف ذاتیه لرنده
فرق یوق انجق مقدارلرنده فرق واردر برده بو ذره لر

باب ثالث از منه متأخرده بولمان ملحدك

بری برندن بیوکلکده مختلف اولدقلى کبی شکل و ترتیب
و مکان خصـوصـلرندـه مختلفدر . صو تیموردن فرقلى در
چونکه انك ذرهلى بری برینه مطابق و ملاصق دکل انجق
مدور اوله رق بری بری اوزرنده یوارلنورلر . فقط تیمورك
ذرهلى مختلف شکلرده بولنه رق بری برینه چوق ملاصق
اولورلر . انساـنك جانی جسدی ایچنده دیگر بر جسد
یاخود جسم در بو دخی دها نازك ذرهلردن عبارتدر .
فکر دیدیکمز شی زیاده نازك بر حس در .

نامتناهی ذرهلر متحرك اولدقلىرنده بری برینه چارپارلر
و دنیا و اجسام سائره جسمه بی تشکیل ایدرلر . حرارت
و برودت دیدیکمز شیلر وجودی دکل انجق حسه نسبته
احوالدن معدوددر . بویلهجه اجی یا طاتلو قوه ذائقه
ایله علاقه سی اولدقجه لاشیدر . و دخی قوه باصره
مقابله سندن آیرلدقجه رنك دیدیکمز شی و قوه سامعه
مقابله سندن آیرلدقجه سس دیدیکمز شی یوقدر . “

ایقوروس دیموقریطسك فلسفه سنی قبول ایدوب
انی توسیع و تکمیل ایتدی . حقیقتی ارامسك سبی انك
موجب صفا اوله جغنه اینادیغندن ایدی . ” حقیقت

فصل اول ایقوروس و لوقرتیوس

و صلاح ارانمق کر کدر چونکه بونلر واسطه سیله ادم
المدن قورتیلوب زیاده صفایاب اوله جقدر « لوقرتیوس
بو فلسفه یی بالممنونیه قبول ایتدی زیرا انک واسطه سیله
انسانک روحی غضب الهی قورقوسندن و آخرته اینانمقدن
قورتلور . ایقوروس و لوقرتیوس دیموقریطسک ذره لر
حقنده اولان تعلیماتی قبول ایتدکلرنده بونی دخی علاوه
ایتدیلر که ذره لر حرکت ایتدکلرنده ازیجق خط مستقیمدن
صایه رق حرکت ایدرلر و بو وجهله بری برینه چارپوب
جسملر تشکیل ایدرلر . البته بوراده طبیعیونه بر سؤال
ایراد اولنور یعنی ذره لک بیوکک و شکلرنده و خصوصاً
خط مستقیمدن صایمق خاصه سنه یعنی جزئی بر ارادته
مالک اولمری نه دن اولدی ؟ بو سؤال هر حالده مناسب
و الزم و انک جوابی حقله طلب اولنه بیله جکی هر کسه
اشکاردور . فقط کک زمان قدیمده کک ازمنه متأخرده
طبیعیوندن هیچ بری بو سؤاله جواب ویره ممشدر و جواب
ویره مدیکی انک بتون فلسفه سنی باطل قیلار . حالبو که
خلقت مبدائی قبول و تصدیق ایدن ارباب علومک بو
و بو مثللو سؤالاره حاضر جوابی واردور .

باب ثالث ازمنه متأخره ده بولنان ملحدك

بزم کونلرمزده طبیعیون فلسفه سی یکی بر اسم اتخاذ
ایدوب البسه جدیده کیشدر • بویکی صورت
(Evolution) نطفه دن (Germ or protoplasm)
حصول و انتشار صورتیدر • افکار مادیهك بویکی اسم
وقیافتله برقات دهانشرو قبول اولنلرینك برسبی بودر که
Evolution اسمی غیر محدوددر • اهل کتاب بیله بو
اسمی قبول ایده پیلور و انترك استعمالنه کوره منتظم
و عضوی ذی روحلرك کندی ذات خالق طرفندن وضع
اولنش معلوم قوانین طبیعیه موجبنجه وجوده کلوب
صور متنوعه ایله تزايد ایتسی و انتشار بولسی دیمکدر •
فقط منکر ارباب علوم Evolution اسمیه دیموقریطسك
ذاهب اولوب نشر ایتدیکی ذعلری قبول ایدرلر • یالکر
بوفرقت وارددر که دیموقریطس غیر ذی روح ماده ذرهلرندن
بحث ایدر ایدی و بویکی فلسفه یی قبول ایدنلر جزئیجه
ذی روح خاصه سنه مالک اولان ماده ذرهلرندن
بحث ایدرلر • لکن نه فائده سی وار؟ ینه بو ادملرك
معرفتیله موجود اولان شیلرك اصلی و موجبی کندولکارندن
ارانور و ماده دن بسبتون فرقلی و هر صفت کامله ذاتیه ایله

فصل اول بو عصرک طبیعیونی

متصف بر موجب عاقل قبول اولنمبور • Evolution
 دنیلان فلسفه نه درجه ماده دن خارج و استون اولان
 موجب عاقل و مستقلى قبول ایدرسه اولدرجه ده بز دخی
 انی قبول ایدرز ونه درجه منکر بولنورسه انی رد و تزیف
 ایدرز • بو دخی فراموش ایدلملیدر که بویکی صورت
 فلسفه ده بر دغم یاخود تکلیف نوعندن بر فلسفه در •
 ده تصدیق اولنماش و بالعموم ارباب علوم طرفندن
 قبول اولنماش و برچوق ارباب علومک رأینه کوره
 اصلا اثبات اولنه میه جقدر • هر نه حال ایسه ادنایی
 اعلا دن و ماده یی روح دن اول وضع ایدوب فانی یی باقی یه
 ترجیح ایدن فلسفه اصلا قبوله شایان بر فلسفه اعتبار
 اولنمه جغنی و اضحاتنددر •

بو سالف الذکر طبیعیونک حکمت قدیمه سی یاخود
 کندى عصر مزده تصادف ایتدی کمز طبیعیونک اصول
 و مبدأ الرینه عمومی بر جواب اوله رق برقاق مبدائی تصدیق
 ایده جکز •

(۱) طبیعیونک مبدأ آنچه ماده فکر دن ایرمش
 اولدیغی حالده و تفکره نسبتی اولقسزین مجرد موجوددر •

باب ثالث از منه متأخره ده بولنان ملحدك

فقط ماده حقنه برشی بيلك ايچون عقل و فكر لازمدر
و عقل و فكر اولينجه مادهنك موجود اولوب اولديغي
و خاصه لری نه دن عبارت اولديغي معلوم دكل يعنى عالم
اولقسزین معلوم دیدیکمز محالدر . بنأ علیه عقل و فكره
مراجعت ایتکسزین ماده حقنه برشی اسناد ایتك محالدر
و خصوصاً مادهنك بيلنسی ايچون مستقلاً لازم اولان
عقل و فكرك اصلی ماده در ديمك محال اولديغي برچوجغه
بيله واضحدر . ماده یی فكردن آول وضع ایتك منطقه
مغایر اولديغنی دهها زیاده اثبات ایتك لازم کلیه جکدر .
(۲) طبیعیونك مبدأنجه ماده ازلی در . فقط بوکا
ذره قدر اثبات یوقدر . موجودات اراسنده ازلی اولان
وار ایدوی مسلدر فقط بو ازلی اولان ماده اولیوب انجق
عقل و فكر يعنى عقل و حکمت اصلیه صاحبی اولان الله
ایدوی براهین کافیه ایله اثبات اولنمشدر . و طبیعیونك
بونی جرح ایتکه مقتدر اولدقلری مثللو بوکا قارشو ایراد
ایده بيله جکاری قوی بر اعتراض دخی قالدیغی اثبات
اولنمشدر . بو رساله نك ایکنجی بابنده مادهنك یاخود ماده
ذره لرینك ازلدن اولديغی يعنى موجود اولدقلری کنديلکندن

فصل اول طبیعیونك مبدألرنده اولان نقصانلر

نشأت ایتدیكى محضا محال اعتبار اولنه جق دیو اثبات اولنمشدر. ماده حقنده هیچ بر شی A priori یعنی تجربه دن اول اثبات اولماز انجق ماده حقنده هر نه بیلنورسه A posteriori یعنی تجربه تصدیقیله بیلنور و بو بویه ایکن ماده حقنده از لیدر دیمك محضا سفاقتدر.

(۳) طبیعیون کندی علم و حکمت مبدألرینه تابع اولیور. " معلوماتك كافه سی حواس ختمه واسطه سیله تحصیل اولنور. حواسمذك بزه افاده ایتدکلرندن بشقه معلوماتیوق یاخود معلوماتك حدودی تجربه جسمانیه حدودیله بر در، دیرلر. لیکن بوکامغایر اوله رق بشقه مبدألرك مسلم اعتبار اولنه جغنی طلب ایدرلر. طبیعیون یا ذره لرك موجودیتنی یاخود ماده نك بلا نه یاه تقسیم اولنه بیلدیکنی ادعا ایدرلر. انسانك مالک اولدیغی حواسك قنغیسی بو ذره لرك موجودیتنی تشخیص ایده بیلدی؟ بیلورلر طبیعیون دخی بیلورلر که ذره لرحواسك تشخیص ایده مدکلری شیلردر. پك اعلا. ماده نك بلا نه یاه تقسیم اولنه بیلدیکی خصوص حمله اثبات اولنورمی؟ البته اثبات اولنه ماز. حس و حواسه بویه بر قوت اسناد ایتك محالدر. یته

باب ثالث ازمنه متأخره ده بولنان ملحدلاک

طبیعیون ماده نك ازلی اولدیغنی ادعا ایدرلر و لیکن ازلی اوله حسله اثبات اولنورمی؟ طبیعیوندن قنغیسی ازلیت یاخود ابدیتی حسله تشخیص ایتشدر. بر مخلوقك ازلی یاخود ابدی بر حسی اولدیغنی وارمی؟ بو سوؤاللرمن طبیعیونك معلومات حقنده اولار، مبدألری موجبجه مناسب اولوب جواب دخی طلب اولنه جغنی انكار اولنه من. ماده ازلی در دیان ادملر کندیلر «ازلیت و ابدیت حقنده بر فکرمن یاخود بر تصورمن اولماز چونکه کافه معلوماتمز حواس واسطه سیله تحصیل اولنور» دیرلر.

(۴) طبیعیون قوت (Force) حقنده قبوله شایان معلومات ویره منلر. طبیعیونك اکثریسی خصوصاً بزم و قتمزده بولنان طبیعیون «عن اصل قوت ماده ده بولنور. ماده طبیعتیله عاملدر. ماده و قوت آیرلر و ازلدن برو برلکده موجود در» دیرلر. فقط بو دیدکاری علوم طبیعتیه نك بر قانون اساسیسنه مغایردر. یعنی نوتونك «خارجی قوتلرله حالی تبدیل اولنجه یه دکین هر جسم بولندیغنی حالده دوام ایدر یعنی حرکتسز بولندیغنده حرکتسز لیکنده و خط مستقیم اوزره حرکت ایتکده بولندیغنده اول

فصل اول طبیعیونک مبدألرنده اولان نقصانلر

حرکتده دوام ایدر « دیو بیوردیغنه مغایر در » بو قانون هم منطقیجه لازمدر همدخی تجربه ایله اثبات اولنور . فقط بو قانون قبول و تصدیق اولندقدده ماده کندیلمکندن غیر متحرک و عامل اولیان و کندیلمکندن تبدل ایتکه مقتدر اولیان بر شیدر . بویلهجه طبیعیونک مادهیه صاحب قوت تعبیر و تصویرینی اسناد ایتدکارنده علمک مطلوباتنه مغایر و یاکلش برشی اسناد ایتدکاری اشکار در . بو بویله ایکن بر جسم کندیلمکندن بدأ حرکتده مقتدر اولمدیغی مثالوبشقه بر جسم واسطه سیله تحریک اولنمسی لازم کله جکی بدیهیدر و شول حرکتده وسیله اولان جسم مادی برشی ایسه بشقه بر موجبله تحریک اولنمسی لازم کلور و ماده دن خارج و فائق اولان بر قوته واصل اولنجیه قدر بویلهجه اثر دن موجبده و اول موجبدن کندی موجبنه یورومکه مجبور اوله جغز . نوتونک دو قوتور بنتلییه جوابا « قوه جاذبه بالطبع مادهیه عائددر دیورم . قوه جاذبه نک موجبنی دها بیلم دیه یلورم . بر جسمک دیگر بر جسم اوزرینه خلادن (Vacuum) تأثر ایده بیله جک معناسیله قوه جاذبه نک عن اصل مادهیه عائد اولمسی ذمی محالدر » دیمشدر .

باب ثالث از منه متأخره ده بولنان ملحدك

بزم عصر مزده طبيعـيون اکثريا ابيـقوروس
 و لوقرتيوسك تخيل ايتدکاريني قبول ايدرلر يعنى ماده يه
 جزئيا قوه اختياريه يا خود ارادت استناد ايدرلر . بويله جه
 صورت و اوصاف انسانيه يي ديگر بر ذات يا شـيئه
 ويرمك ذمعي (Anthropomorphism) علم الهى دائره سندن
 طرد اولنورسه ده حکمت طبيعیه ده قبول اولنور! لکن
 صاچه سوزلر بالعموم قبول اولنورسه ده ينه صاچه
 سوزلردر . «ماده نك بر ذره سي بدأ حرکت ايدر» !
 نه حقاقت ! نصل کال محال !

(۵) طبيعـيون کائناتده بولـسان نظامات و قوانـين
 و مطابقاتي اصلا تفسير و بيان ايده مزلر . ماده ذره لر نك
 حرکت ايتلري برى برينه چارچملري و بر نظام يا خود مقصد
 اولقسزین جسملره تشکل ايتلري هر طرفدن هر کسك
 مشاهده ايتديکي نظام و قانون و مرام و مقصدي ايضاح
 و تفسير ايده مز و بوندن زياده و بونك کافه سندن اهم
 اوله رق طبيعـيون حياتك وقوعه کلمسني اصلا بيان ايده مزلر .
 حيات انجق حي اولاندن ايلرو کلور .

منتظم و عضوی اولان ذی روح منتظم و عضوی

فصل اول طبیعیونك مبدأ لرنده اولان نقصانلر

ذی روحدن ایلروکلور • نبات تخمی یاخود دیری قسمی
الده اولینجه بر ادم ذی روح اولیان مادهدن نباتی اصلا
حصوله کتورممشدر • و حیوانك ذی روح اولان اصلی
یاخود نطفه سی (Germ) موجود اولینجه هیچ بر کیمسه
نباتی حیوانه تحویل ایده ممشدر • خارجی موجب
اولقسزین ذی روحك غیر ذی روحدن حاصل اولسی
(Spontaneous generation) بعض طبیعیون طرفندن
اعلان ایدلش بر ذمدر • فقط بو ذمعی تصدیق ایچون بر
ذره قدر اثبات و برهان یوقدر حالبوکه بزه معلوم اولان
اثباتلرک کافه سی بو کا مغایردر •

ذی روح دائما غیر ذی روحدن کلیا فرقلی و بشقه
جنسدر و مادهدن خارج بر موجب اولینجه شمعی به قدر
کرك عوام ناسه کرك ارباب علومه حیات صاحبی
دیدیکمز شی کورنممشدر و بو کره ارضده مشاهده
ایدلممشدر • اسباب فیزیقیه و کیمیویه حیاتك ظهورینی
کاملا ایضاح ایده مدکاری شویله طورسون حیات
مسئله سنك حلنه اصلا معاونت بیله ایده ممشدر • فقط
بعض کیمسه لر متجاسرانه دیورلرکه ” بلکه مادهدن یالکز

باب ثالث از منه متأخره ده بولنان ملحدك

اصول ماديہ اوزره حیات حاصل اولمشدر بونك ايچون بويله حاصل اولديغنه اينانملي ايز، عجبا بو ادعا ارباب علوم طرفندن مي يوقسه اصحاب جهالت طرفندن مي چيقمشدر؟ بو منوال اوزره جهالتی علم و معرفت كرسيسنده قومق اولماز .

ينه " منتظم جسملر غير منتظم بدن معرفت انسانيه ايله تشكيل اولنمشدر . بنا عليه حیات دخی بويله جه ميدانه كله ييلور ، دنيلور سه جوابمز بو دركه منتظم بر جسمك ذی روح جسمدن اولان فرقی کلی بر فرقدر و بو ذكر ايتديكمز استنتاجك غير منطقی اولديغی بدیهیدر .

(۶) طبعیونك كافه تعلیماتی بو رساله نك ايكنجی بابنك بشنجی فصلنده انسانك اوصاف اخلاقیه سی حقنده بیان و اثبات ايتديكمزه مغایر در . بونك ايچون و خصوصاً خير ايله شرك فرقنی ابطال ايتدیكى ايچون قبوله شایان اولديغی اشكار در . بو مسئله بو اوچنجی بابك ايكنجی فصلنده دها تفصیلات اوزره بیان اولنه جقدر .

(۷) طبعیون اللهك و ماده دن بسبتون فرقلو اولان روحك موجودیتنی انكار ايتمليله انسانك طبیعت روحانیه سنی

فصل اول طبیعیونك مبدألرنده اولان نقصانلر

طانیه رق انجق طبیعت تراپیده سنی طانیوب انسانی سائر حیوانلرله مساوی قیلارلر . کندیك اوصاف روحانیه ایله موصوف اولدیغنی بالتشکر بیلوب بونکله افتخار ایدن ادم طبیعیونك مبدألرینی کلیا و قطعیا رد ایتکه مجبور اولور . طبیعیون تعلیماتك بزم عصر مزده زیاده سیله ترقی ایتدکلرندن ناشی " بو یکی فلسفه یی قبول ایتیانلر خوف و دهشته کرفتار اولدیلر " دیو بزه ستم آتلشدر . فقط طبیعیون فلسفه سنك ایکی بیک سنه دن برو بر آدیم ایلرو وارمش یاخود بر وجهله ترقی ایتش ایدوکنی تسلیم ایتیوروز . حیف که طبیعیونك تعلیمات قدیمه و باطله سی بزم عصر مزده یبانی اوتك تخمنك روزکار اوزرینه کوتورلدیکی کبی نشر اولنش و اولمقده در و بو مضر تعلیماتك قبول اولماسنه براهین منطقیه ایله سد چکیمز لازم کلور .

❖ الهیون اسمیله مسمی انکلیز دینسزلر ❖

هر نه قدر انکلیز دینسزلره یعنی اون یدنجی و اون سکزنجی عصرلرده ظهور ایدن معترضلره ملحد اسمی

باب ثالث از منه متأخره ده بولنان ملحدك

اطلاق اول نماز سه ده ینه بونلرك اعتراضاتی یالکز کتب مقدسه علیهنه اولیوب انجق علم الهی طبعی علیهنه دخی وقوع بولدیغندن اول ادملرك اعتراضاتی بورایه درج ایدوب وقتیه مؤمن مؤلفر طرفندن ویریلان جوابی دخی مختصرجه بیان ایتك دردست بولنان ایشك مقتضیاتندندر .
(۱) اسقوچیاو هوم (تاریخ تولدی ۱۷۱۱ و تاریخ وفاتی ۱۷۷۶) طرفندن ایراد اولنان اعتراضات و انلره ویریلان جوابلره دائر .

مذکور مؤلفك اعتراضی کائناتده مشاهده اولنان مقصد و مرآمدن نشأت ایدن اثبات و برهانلر علیهنه در .
بو اعتراضك تفصیلابوراده ذکر مناسبت آلور چونکه بزم عصر مزده انك مبدألری طبعیون طرفندن بالعموم تصدیق اولنوب توسیع و تأکید اولنمشدر و بو مبدألری جرح ایتك ایچون الك اول منصفانه انلری ذکر و بیان ایتك لازمکلور .

❖ هوتمك اعتراضاتی ❖

« کائنات و انك اصول و قوانینی اویله امثالسن بر اثر درکه صنعت انسانیه ایله تشکیل اولنان شیلردن بحث

فصل اول هومك اعتراضاتی

ایدوب بر یایچیسی وار دیو قیاس ایده میر . بر ساعتك
 ساعتجینك معرفتیه یاپلیدیغنی بیلمز تجربه ایله اولدی فقط
 دنیالر یایمق خصوصنده تجربه من اولدیغندن او یله قیاس
 ایده میر . بر دنیانك یاپلمسنى انجق مشاهده ایتمز شرطیه
 انك اثرندن اثبات وبرهان بوله بیلورز . ایکی جنس شیلرك
 دوام اوزره موجب و اثر یاخود متقدم و متأخر اوله رق
 بری بری ارقه سی صره علاقه مخصوصه ایله وقوع
 بولدیغنی مشاهده ایتمز اولدیغمز حالده یالکز برینی
 کورورسهك اولبرینك بولندیغنی قیاس ایدرز . یعنی اثری
 کوردیکمزه انك موجبنی یاخود موجبی کوردیکمزه انك
 اثرینی قیاس ایدرز . اما بر مخصوص و معلوم جنسندن بولنمیان
 اثر اولمزه کورسه انك موجبی حقنده هیچ بر قیاس ایده میر .
 اکر تفحص ایده جکمز شیلر خصوصنده محضاً تجربه
 و مشاهده و مشابیهت دلاتیه یورویه جك اولورسه ق
 شول بحثنه کیره جکمز موجب و اثر بوندن اول تجربه ایله
 بیلدیکمز و علاقه لرینی کوردیکمز موجب و اثره مشابه
 اولمیدر . برخانه کوردیکمزه انك بر یایچیسی وار ایدوکنی
 یقیناً بیلورز چونکه همان اول مقوله اثرك اول جنس

باب ثالث از منه متأخره ده بولنان ملحدك

موجب واسطه سیله حاصل اولدیغنی مکررا کوردك . لیکن
 كافه کائنات بو خصوصه ده برخانه یه مشابه دکلدر .
 اول درجه غیر مشابه در که انک سبب یاخود موجبی حقنده
 یالکز برظن و تصور ایده یلورز . دنیانک امثالی یوق
 ایکن نصل تجربه دن ایلرو کلان برهان دنیانک وجوده
 کلمسی خصوصه ده جاری اوله یلور . بر ادم دیه یلورمی که
 منتظم کائنات تجربه یولیه مرام انسانی مثللو مرامدن
 وعقلدن نشأت ایتدی . کائنات حقنده بوکی برهان
 ودلائلی تصدیق ایتک ایچون کیلر یاخود شهرلرک یاپلدق لرینی
 کورمش اولماز کفایت ایتز . انجق دنیالرک وجوده کلری
 خصوصه ده تجربه مز اولمش اولمیدر . بر خانه نک یاپلسنده
 و بر دنیانک یاپلسنده مشابهت کافیه کوستره یلورمی سین ؟
 دنیانک عناصرینک ایلک ترتیبه مشابه برحالی موجود
 بولنان شیلرده مشاهده ایتش میسین ؟ سنک کوزک باقار ایکن
 دنیالرک هیچ یاپلدیغی وارمی . شویله که ایلک طاسلاق
 ترتیبندن هیئت مکمله یه تبدل ایدنجه یه قدر لایقیله انی تفتیش
 ایتکه مقتدر اولدک می ؟ اگر بویله تجربه ک اولدی ایسه
 اول تجربه یی حکایه ایدوب فکرکی بیان و تفهیم ایله “

فصل اول هومك اعتراضاته جواب

❀ هومك اعتراضاته اتی الذکر وجهله جواب ❀

❀ ویرلمشدر ❀

(۱) كافه کائنات امثالسن بر اثر اولوب اولمديغنی
تفتیش ایتک ضمننده بر موجبک همده بر اثرک اوصاف
اصلیه سنی اوصاف عارضه سندن تفریق ایتک لازمدر .
مثلا ساعتلری بری برندن چوق خصوصده فرقلی اولور سده
بر خصوصده بری برینه مشابیه درلر . بيوکلکده ،
شکلده ، مقدار قیمتده و سائر چوق خصوصلرده بری برینه
بکزه مزلر . لیکن بلا قصور وقتک مرورینی کوسترمک
ایچون تشکیل و ترتیب اولنملری نسبتیه یعنی همان بر
مرام نشانه لری خصوصصنده و یالکز بو وجهله بو متنوع
ساعتلر بر جنسندن اعتبار اولنه بیلور و هر بشقه خصوصده
امثالسن ساعتلر بولنه بیلور . امثالسن درجهده بر قیمتلو
ساعت بولنور و امثالسن درجهده بیوک بر ساعت بولنور
و کوچک ساعتلرده بولنور . لیکن ساعت دیدیکمز شیلرک
کافه سی ، بیوک اولسون — کوچک اولسون ، جیب
ساعتی اولسون قله ساعتی اولسون ، بر مرام و مقصد

باب ثالث از منته متأخره ده بولنان ملحدك

ايچون ياپلش اولديغى يعنى وقتك مرورينى طوغرى
 بيلدرمك ايچون ياپلش اولدقلى هر كسك معلوميدر .
 كذلك ساعتجىلر بر صنعتدن اولور ايسه ده هر خصوصه
 بر جنسدن دكلردر . علم و فراست و هنر ، ملت و مذهب
 و لسان ، بوى و ياش ، ادب و اخلاق و سائر چوق و مهم
 خصوصاته برى برينه اصلا مشابه بولناملرى ممكن در
 و حتى مسلمدر . يالكز بر خصوصه برى برينه مشابه
 اولوب بر جنسدن اعتبار اولنه بيلورلر يعنى وقتك مرورينى
 كوسترمك ايچون بر آلت ياقى اوزره بر مرام و مقصوده
 بولندقلى بابتده برى برينه مشابه درلر .

(ب) ياپلش شئك مقصدى نا معلوم اولور سده
 بر مقصدى وار ايدوكنى يقينا كورديكمز حالده ينه تجربه
 يوليله بر ياپجى و مقصد صاحبي بولنديغنى اكلارز . زيرا
 الزم اولان شئ مقصده بزه معلوم اولمى دكل انجق مقصده
 مطلقا وار ايدوكى معلوم اولسون . و كذلك موجب
 حقنده بزم تجربه مزله معلوم اولميان عامل و صاحب مرام
 وار ديو هيچ شبهه ايتيدرك قياس ايدرز . تجربه يالكز
 رأى العين طريقه دكل قياسه دخی اوله بيلور . شويله كه

فصل اول هومك اعتراضاته جواب

اثر بالكلية بزه معلوم اولسون اولسون و موجب حقنده معلومات مكممل اولسون اولسون ینه تجربه ايله مرآمدن مرام ایدیجی قیاس ایدرز. بو برهان خالق کائنات حقنده دخی جاری اولدیغی انکار اولنده ماز

(ح) تجربه ايله ایدندیکمز معلومات اوصاف

عارضیه سندن صویلوب انک اوصاف اصلیه سی محضاً بوندن عبارتدر که هر زده موجود بولنان شیلده مقصد و مرام و نتیجه مخصوصیه خدمت ایدن ترتیبات و مطابقات کور نورسه بلا تردد اوراده یعنی کوردیکمز شیئک موجبی اوله رق عقل و صاحب مقصد اولان ذات دخی بولندیغنی قیاس ایدرز. یعنی تجربه مزک حاصلاتی بودر. بو عمومی بر قیاسدر و مخصوصی شیلره مطابق کلور. مثلاً بر ادم ایلک دفعه اوله رق بر مقراض کورور. انک حقنده یاخود انک کبی شیلر حقنده اصلاً خبری یوقدر لکن اول آلت ایچنده مرام و نتیجه یه طوغری بر ایشله فعلی کورور و مقراضک بر معرفت صاحبی اولان عقل ايله یاپیش ایدوکنی قیاس ایدر و بویه قیاس ایتسی تجربه سندن در. بعینه اول شیلره دائر تجربه سی یوق فقط اول شیده مشاهده اولنان

باب ثالث از منته متاخره ده بولنان ملحدك

مرام نشانه لری واسطه سیله نه لرایما اولندیغی خصوص صنده
کندی تجربه کافیه سندن بر صاحب مرامی قیاسا تصور
ایدر .

مسلمدر که الهی کورمدك و دنیالرك یاپلیدیغی
مشاهده ایتك . فقط دنیاده مشاهده اولنان مرام و نتیجه
مخصوصه ده طوغری ایشلیان هنرلو ترتیب و مطابقات
خصوص صنده تجربه مز واردر . حاصل کلام هومه
ویريله جك جواب بودر که اوت موجب و اثرك اوصاف
اصلیه سی خصوص صنده کائناتك تشکیل اولنمسنده تجربه مز
واردر .

(د) تجربه مزله معلومات کامله ایدینه بیلدیگمز شیلرده
موجب و اثر، صاحب مرام و مرام بیننده اولان علاقه
نظاملو و بلا استثنا بولدیغمزده صنعت و معرفت انسانییه
فائق اولان اعمال و اثار خصوص صنده قانون و همان بوقانون
جاری اولدیغی انکار ایتك محالدر . چونکه بویله تصور
ایتك صنعت انسانییه بی معرفت الهیه دن افضل عد ایتك
دیمکدر . یعنی مخلوقك ایشلری خالقك ایشلرندن زیاده
نظاملودر دیمك اولور . بنا علیه هروجهله بو مرامدن

فصل اول حوبس و بولينبروق

اولان برهان قوی و اعتراضات مزبوره بی اصل اولدیغی
اشکاردر .

(۲) حوبس و بولينبروقك مسلكينه دائر .

حوبس (تاریخ وفاتی ۱۶۷۹) محضاً موجودیت
الهیہ بی اقرارله صفات الہیہ خصوصاً صندہ بر درلو
معلوماتمک ممکن اولدیغنی انکار ایتدی . انسانک ارادہ
جزئیہ سی اولیوب انک معاملات کافیہ سی ضرورتنددر
دیو ادا ایدر ایدی . روح انسانینک جسمانی و اولومه
مبتلا و آخرت دخی یالکیز بر ذعم و خیال اولدیغنی تعلیم
ایدر ایدی .

بولينبروقك ذعمنجه (تاریخ وفاتی ۱۷۵۱) (۱)
» بر ذات مستقل وار او دخی بی نہایه قدرت و معرفته
مالکدر اما صفات طبیعیہ سندن بشقه صفات اخلاقیہ سی
یوقدر یعنی عدالتی یا قدسیتی یوقدر و صفات اخلاقیہ سی
خصوصاً صندہ اکا مشابہ اولق و بوندن وظیفه ذمتمزی ایما
ایتمک عبث یره سويلکدر . (ب) الله ابتداده دنیایی
یرادوب قانونلرینی تخصیص ایتدی ایسه ده امور
انسانیه اوزرینه وظیفه ایدمز . ایسه بیله مقدری

باب ثالث از منه متأخره ده بولنان ملحدك

خصوصی دكل انجق عمومی در • یعنی شخصه دكل
انجق جماعتله و ملتله نظر ایدر • (ح) روح انسانی
جسدنن تفریق اولنماز و اولومدن صکره یشامق یوقدر •
(د) قوانین طبیعیہ ادمله کافی اولدیغندن الهامه احتیاج
یوق و الهام اصلا وقوع بولماشدر • “

معلوم و اشکاردر که بومبدألك جرح اولنمی
هومك مبدألى قدر موجب مشکلات دكلدر • بونله جواب
اوله رق بری مور اسمنده و دیکری قدوورت اسمنده ایکی
مشهور معلم شمیدییه قدر باقی قالمش و معتبر طوتیلان کتابلر
تألیف ایتیشلردر • فقط بوکی مبادی باطله نك براهین
کافیه ایله کلیا و قطعیا جرح اولندقلری حسبیه بوراده
تکرار اول اثبات وبرهانلری ذکر و بیان ایتك لزومی
قالماشدر • و بودهری دینسزلك تعلیماتنی ذکر ایتك
مناسبتی یالکز بوندن عبارتدر که بزم عصر مزده نشر
اولنان دینسزلك و ملحدك نو ایجاد اولدیغی انجق
قدیمی ضلالت و وقت وقت ظهور ایدوبده جرح اولنان
تعلیمات باطله اولدیغی اشکار اوله •

{ فصل ثانی }

❁ ملحدلکک سفاہتی ❁

شمدی یہ قدر ایراد اولمش اولان برهانلرک بر نتیجہ
قویہ و صحیحہ سی اولہرق صفات کاملہ ایلہ متصف ذات
اللہک وارلغنی مسلم اعتبار ایتک لازمدر . حال بویلہ ایکن
اللہک خلق ایتش اولدیغی ذوی العقولک جملہ سندن
عبودیت لایقہ مطلوب اولہجغی دخی مسلدر و بونک ایلہ
برابر مباحثہ مزک نتیجہ لازمہ سی اولہرق ملحدلکک سفاہتی
اعلان ایتک جائزدر . فقط ملحدلکک سفاہتی ینہ کافی
سبیلرلہ اثبات ایتک نیتندہ ایز .

(۱) ملحدلکک سفاہت در چونکہ انک اصول
و مبدألرنجہ هیچ بر شیئی یقینا بیلک ممکن دکادر . ملحدلکک
مبدائہ کورہ الہی بیلک ایچون حواسمز کافی اولمدیغندن
الہی بیلک ممکن دکادر . فقط بو رسالہ دہ دفعاتلہ ایضاح

باب ثالث ازمنه متأخره ده بولنان ملحدك

و تآ كيد ايدلشدر كه الله حقنده معلومات كامله تحصيل
اولنماز ايسده ده ينه معلومات صحیحه و مقنعه تحصيل
اولنه بيلور . ماده و قوانین طبيعیه نك اصلی و معاملاتى
ياخود حیاتك منبعی بحشه كنجه بونلرك حقنده دخى معلومات
مكمله شویله طورسون معلومات كافیه و حتى عموما قبول
اولنان و ارباب علوم اراسنده شبهه دن عارى اعتبار اولنان
معلومات صحیحه بيله يوقدر و بوندن زیاده كائنا تده بولنان
همان هیچ بر شى یا بر فرد حقنده انسانك معلومات مكمله سى
اولنديغى و بلكه اوله میه جغی و اضحاتندرد . كیمسه الهی
كورهمز دینلور . ماده یی كیم كورمشدر ؟ زیرا بالاده ذكر
اولنديغى كبی كوریلان شى ماده دكل انجق ماده نك بر
خاصه سى یعنی رنكى در . علوم طبيعیه ده كافه ارباب علوم
طرفندن بالعموم و بلا استثنا قبول و تصدیق اولنان همان
بر مهم اساس يوقدر . مثلا علم هیئت و علم طبقات الارض
حقنده تحصيل ایده بیلدیكمز معلومات نه قدر چوق اولسه
یا لكز علم هیئت یاخود علم طبقات الارضك اربابندن بر قاج
ماهر ذاتك شهادتیه بیلورز . عالم و اوقومش ادمر
اراسنده بو علملرك مبادئ اصلیه سنى یكیدن تفحص

فصل ثانی ملحدك مبدأ رنجہ یقینا بیلک ممکنسز

و تحریریه مقتدر و مستعد نه قدر ادملر بولنه بیلور؟ ماهر
دیدیکمز ذوات اراسنده صورت مکملده اتفاق رأی
حاصل اولدیغی هر کسک معلومیدر. حال بویله ایکن
واجب الوجود، از لدن وار، و ابدهدک باقی اولان خالق
و حاکم مطلقک براهین کافیہ ایله اثبات اولندیغی رد
ایتمک شویله طورسون اکا شبهہ بیلہ ایتمک سفاهت دکلیدر؟
فقط بریسی اعتراض ایدہجک درکه "علوم طبیعیہنک
کافہسی شبهہ تحتندہ ایسه بو علملرہ هیچ اعتقاد ایتمک لازم
کلور. علم هیئتک نتایجندن هیچ برینه اینانمیهلم. بو تقدیرده
اجسام سماویہ حقندہ معلومات صحیحہمز هیچ اولہماز
دیمک اولور،" خیر بویله نتیجہیہ وجود ویرمک منطقہ
موافق دکلدر. بالفرض کسوف و خسوفک ارباب علم
هیئت معرفتیلہ آولا اعلان اولندیغنه کوره عینیلہ و دائماً
وقوع بولسی علم هیئتک بعض نتایجی محقق و بالعموم مسلم
اولدیغنه جرح اولتماز بر برهاندیر. لکن ارباب هیئتک
بریسندن قوه جاذبهنک سبب و اصلنی یاخود حرارتک
اصلنی و یاخود حرکت یا قوتک منبعنی صورسہک جواب
ویرہمز. بویلهجه واجب الوجود اولان اللهک وجودینی

باب ثالث از منه متأخره ده بولنان ملحدك

و صفات عليه سنی اثبات ایدن برهانلرله کائناتی طوب
طول و کور و ورز و جسمانی کوزلر مزله انی کوره مدیکمز یا خود
مشاهده ایده مدیکمز ایشلرینک کافه سنی اکلایه مدیغمز سیدین
الله یوقدر دیه لم می؟

(۲) ملحدك سفاهتدر چونیکه روح انسانینک ال
اعلا و ممدوح ارزولرینی و اشتیاقلرینی معناسز و محال
درجه سنه کتورر و حتی روح دیدیکمزی کلیا محو و اعدام
ایدر. بالطبع ادملر و خصوصاً صاحب تفکر اولنلر امور
مادیه ایله قناعت ایتیموب و بوفانی عمره متعلق شیلره باغلا نمغه
رضا کو ستر میوب کندی جان و روحلرینه مطابق و مقتضی
اولان خیر و برکت و نعمتلره ارزو کش و مشتاق بولنورلر.
فقط ملحدك مبدائی اوزره بو ارزو و اشتیاقک کافه سی
انجق بخار و رؤیا کبی کچر و زائل اولور بر خلیادر یعنی
انسانک احتیاجات روحانیه سنه متعلق و مطابق برکات باقیه
اصلاً یوقدر. ادنی بر ذی روحک حالی کندی احتیاجنه
مطابق اولدیغی حالده هیچ اینسانیلور می که مخلوقاتک
طبقه علیاسنده بولنلرک احتیاجاتی و احوالی بری برینه
غیر مطابق اوله و حتی انک موجودیت روحانیه سنک

فصل ثانی ملحدك مخاطره ليدر

بر نتیجه سی اصلا بولمیه •

(۳) ملحدك معاشرت انسانیه ایچون موجب

مخاطره در •

تواریخ انسانیهیه مراجعتله انی دقتلیجه تفتیش
و تفحص ایدلم • هر زرده حق و وحید اولان اللهه
اعتقاد قوی بولنورسه اوراده فضیلت و اوصاف و اخلاق
مدوحه ضیاءش اولش و اولمده در • و ادملر و مللر
حیات انسانیه بی ترفیع ایدوب حیات حیوانیهیه انی فائق
قیله حق هر نه ایسه بو خصوصه لمرده ترقی ایتکده بولنمش
و بولنه جقلر در • حق اللهه اینانق تعلیمی اوزرینه بنی ادم
اراسنده اخلاق مدوحه کماله و اصل اولور و علی التوالی
ظهور ایدن اولاد و احفاده بقا بولور • بوندن ایکی یوز
سنه مقدم ایلک دفعه اوله رق آمریقاده یکی انکلترونک
عمارینه باشلانده اوروپا طرفندن اورایه هجرت و اوراده
تنظیمات جدیده سیاسیه و دینییه تشکیل ایدن ادملر
اراسنده و انلرک مرور زمانله ذریتی تکرر ایتدیکه انده
و ممالک متحده آمریقانک شمالی ایالتلرینک کافه سنده تقوی
و معرفت الله و اعتقادات دینییه قویه نک معاشرت انسانیه

باب ثالث از منہ متأخرہ بولنان ملحدک

ترقیسی اوزرینہ نہ درجہ تأثیرات خیرہ بی موجب اولدیغی
اشکارہ تصویر اولمشدر • کذلک حق اللہ اینانق
تعلیماتک تأثیرات حسنہ سی یوزلرجه سنہ دن برو انکاترہ نک
تنظیمات سیاسیہ و تعلیمیہ سنی تشکیل ایدن و خصوصاً
اسقوجیا اہالیسنک اخلاق ممدوحہ سنہ متانت و شہرت
ویرن و ہمدہ فیلمک ممالکک شرفلو توارینخنہ باعث
اولان ادملرک اخلاق و اعمال و احوالندہ کوزلجہ ترسیم
ایدلمشدر •

بالعکس ہر نرہدہ ادملر صفات کاملہ ایلہ متصف
اللہک وارلغنی انکار ایتشلر یاخود بو بابدہ اشتباہ
و وظیفہ سزلکہ طالمشلر ایسہ اورالردہ یا ایریا کج فتنہ
و فساد و اختلال میدان بولہرق مرور زمانلہ معاشرت
انسانیدنک محتل اولدیغی ارباب توارینخک معلومیدر • بونی
تصویر ایچون اسپانیانک بوندن اوچیوز الی سنہ اول
اولان حالنی شمدیکی حالیلہ تطبیق یاخود فرانسہدہ یوز
سنہ اول وقوع بولان اختلال عمومینک اسباب و احوال
و تباہی کرمی کبی تفتیش و تحری ایتک کفایت ایدر
و ملحدلکک نہ درجہ موجب مضرت اولہ جغنی کوستر •

فصل ثانی ملحدانک مخاطره لیدر

کرچکدر که اسپانیانک تدنسی غیرت دینیہ بہانہ سیلہ وقوع بولان تعلیمات باطلہ و معاملات مکروحه تأثیراتیلہ اولدی . فقط هر یرده مشاهده اولندیغی مثللو اسپانیاده دخی تعلیمات باطلہ دینیہ دینسرلکە و ملحدانکە یول آچشدر .

تواریخ عمومیه بی دقتلو جه او قومش اولنلرک تصدیق ایدہ یلہ جکری کیفیتدر کہ بو کونکی کونده اوروپا ممالکنک اکثر یسینده میدان آلمش اولان ملحدانک و مذاهب مادیہ و منکرہ ترقی ایدوب توسیع تأثیرات ایدہ جک اولورسہ معاشرت انسانیه نک مستقبلی قراکلق و موجب دهشت اولور . ملحدانک محافت اللہک بندلرینی چوزر . رابطہ دینیہ بی حل ایدر و سائر ادملرک حقوقنی طانیہ رق یاخود قصدلہ ابطال ایدرک معند و سرکش ادملری خود بینلک و منافع شخصیه یاخود شهوات نفسانیہ دریاسنہ غرق ایدر . بویله جه ملحدلر معاشرت انسانیه بی محافظہ ایتک ایچون حصولہ کاه جک ذخیرہ تخملرینی اکہ دن ایسہ خرابیت معنویہ تخملرینی بی پروا و انصافسز جه هر طرفده اکرلر . حیف کہ بزم متمکن بولندیغمز کوزل اراضیلر اوزرینہ الان بو مضر و مہلک تخم سربستانہ صاچلمقدہ در . کندی

باب ثالث از منہ متأخرہ دہ بولنان ملحدک

عصر مزک ، وطن داشلمزک ، ملتمزک منافع حقیقیہ
و باقیہ سنی ارامق ادعاسندہ ایکن تعمیم تعلیم و نشر و توسیع
علوم ایچون چالشمقده ایز . پک اعلا . فقط تعلیم و تحصیل
علوم و تزیید منافع مادیہ معرفت و مخافت اللہہ مقارن
و حتی انلرک اوزرینہ مبنی اولمازسہ ، اوت اکر افتخار
ایتدیگمز ترقیات متنوعہ حاضرہ کافہ صفات کاملہ ایلہ
متصف اولان ذات ذی الجلال خالق و حاکم مطلقک
وارلغنی و هر ادمی کندی کچوردیکی عمر ایلہ کافہ اعمال
و اخلاقی ایچون بحق مسؤل طوته جغنی قبول برلہ اکا
جان و دلدن مطیع بولنمزسہ ق بزم اختراع ایتدیگمز علوم
و فنون ما کینہ سی دها سرعتلہ سوکیلو اولادمزی
و وطنزی خرابیت معنویہ دریاسنہ ایصال ایدہ جکدر .
فقط ارباب علوم اهل ایمان دخی اولسونلر . تعلیم عمومی
تعلیم اخلاقیدن آیرلسون انجق تعلیمات باطلہ علمک نوریلہ
زوال بولسون و کنجملر تحصیل علم و عرفان ایتدجہ علم
و حکمتک مبادیسی اولان اللہ قورقوسنی اوکرنسونلر و
ملحدک زهری انکرک زهرندن زیاده مهلك در دیو یقینا
بیلوب احتراز ایتسونلر و اول حالده معاشرت انسانیه نک

فصل ثانی خلاصه کلام

قوه رابطه سی حل و فسخ اولئیه جغندن ارزولدیغمز
و بشقه یول ایله اصلا بوله مدیغمز اصلاح و ترقی و تقدم
طریق بولنش اولور.

حاصل کلام بتون بختك نتیجه سی مزامیر (یعنی
زبور کتابی) باب ۱۴ آیت ۱ ده محرر اولدیغی اوزره
« سفیه کندی قلبنده الله یوقدر دیدی » اوت الله یوقدر
دیان سفیهدر عاقل دکدر او دخی بویله سفیهانه سویلسنك
برسینی بوله میور . عقلیله سویلیور . فساد و ارمش قلبندن
سویلر . فقط حق و قدوس و قدیر و رحیم و رؤف اللهك
موجود اولسی صالح ادمه موجب شکرانیت و مسرت در
اوده مسرت باقیه و ابدیه در .

تم

❀ فهرست ❀

صفحه

مقدمه	۳
شمیدی بحث لزومی	۳
علم الهی طبعینک مناسبتی و مخصوصیتی	۴
بحث اولنه جق موادك اصول و تقسیمی	۷



باب اول . ذات واجب الوجودك وار	۹
ایدوکی بنی ادمك عمومی و اساسی اعتقاداتنددر	
فصل اول . عوام ناس اللهك وارلغنی عوما	۹
قبول ایتمش و ایتمکدهدر	
هندو و فرسیلرك اعتقاداتی	۱۰
یونانی و رومالولرك اعتقاداتی	۱۱
فرانسه لو دقاترو فازك شهادتی	۱۲
بنی ادمك لسانلرنده بولنان شهادت	۱۳
فصل ثانی . حکمای مشهوره بالاتفاق اللهك	۱۵
وار ایدوکنی تصدیق ایدرلر	

صحنه	
۱۵	حکمای قدیمه نك شهادتی
۱۶	وحدت وجود، تثنین والو هیئت ذاتیه طریقہ
۱۷	سقراطس، افلاطون و ارسطوطل
۱۹	قدیمی یونانی ملحدلرک مبدألری
۲۰	افلاطونك جرح ایتدیكى ملحدلرکه دائر
۲۲	افلاطونك علم الهیدن بحث ایتدیكى صروده
	استعمال ایتدیكى اصوله دائر
۲۳	افلاطونك سالف الذکر ملحدلک علیه واجب
	الوجودی اثبات ایتدیكى حقنده
۲۶	افلاطونك صفات الهیه ایله آخرت حقنده بیان
	و تعلیم ایتدیکنه دائر



۳۱	باب ثانی . اللهك وجودی و صفاتی كائناتدن
	اثبات اولنور
۳۱	فصل اول . كائناتك موجود بولندیغندن
	بر موجب او دخی موجب ماقول و وحید اثبات
	اولنور

صحیفه	
۳۲	ماده نك يا خود عناصرينك ازلى اولمديغى
۳۵	ماده نه اولديغى بيلك مشكدر
۳۶	موجب و اثر قانونى
۳۸	عقل كلك ازلى اولمى
۳۹	قدرت الهيه نك بى نهييه اولمى
۳۹	كائناتده بولنان قانون عمومى و قانون خصوصى
۴۰	علوم طبيعیه ايله علوم رياضیه نك ميدانه
	كتوردكارى دليللر
۴۳	علم هيئتك ميدانه كتوردىكى دليل
۴۶	فصل ثانى . حيات حيوانيه ده مشاهده اولنان
	مرام و مقصد علامتلى
۴۷	انسانك جسدینه دائر — ساعت تمثیلی
۵۱	انسانك كوزى حقنده
۵۶	انسانك قولاغى حقنده
۵۷	حيوانات و نباتاتك تولداتنه دائر
۵۸	مخلوقات متنوعیه دن آلنان برهانلرك هربرى
	كندولكنده مكمل برهان در
۵۹	تحت تفتيشه كليان اعضا و احوال

صحنه	
۶۱	کیمکار
۶۳	کیمکارک باشلرنده بولنان مفصللار
۶۴	عضلات حقنده
۶۶	جسدك اعضاسنك ترتیبی حقنده
۶۹	حیوانلرک لباسی حقنده
۷۰	درت ایاقلو حیوانلرک قوشلر و بالقلر ایله تطبیق اولملری حقنده
۷۱	حیوانلرده بولنان و خصوصاً دقته شایان بعض اعضا و مقصد علامتلری بیاننده در
۷۵	فصل ثالث • حیات نباتیه ده مشاهدده اولنان مرام و مقصد علامتلری
۷۷	نباتاتک تشکلی
۸۰	نباتاتک تعیشی
۸۵	صوو و طوپراغک بعض خاصه لری
۹۰	نباتاتک فسیله لری و اصول ابقالری
۹۰	نباتاتک بعض حیوانلر ایله اولان مناسبات مخصوصه لری
۹۸	انجیر اغاجی

صحنه	
۱۰۰	ذاتیت الهیه حقنده
۱۰۱	وحدانیت الهیه حقنده
۱۰۲	اللهك ماده دن بسبتون فرقلو و ازادن موجود هم ده واجب الوجود اولسی حقنده
۱۰۳	اللهك جمله یه قادر، عالم و هر یرده حاضر اولسی حقنده
۱۰۴	اللهك کریم اولسی علم الهی، طبیعی ایله تصدیق اولنور
۱۰۸	فصل رابع . موجب و اثر قانونی کافی اولیوب مرام و مقصد قانونی تأکید ایتک لازم اولدیغی عملیات انسانیه و عملیات طبیعی
۱۰۹	کائناتی بر ما کینه یه تشبیه ایتک تصویری
۱۱۰	ماده نك کندولکندن عاجز اولسی
۱۱۲	کائناده وقوع بولان هیئت عجیبه و خارق العاده و سقطله مبنی اولان اعتراضاتک جوابی
۱۱۵	اولوم وقوع بولسی اوزرینه مبنی اولان اعتراضاتک جوابی
۱۱۶	مرام و مقصد قانونی قبول اولنمقیزین حل

ایدیله میه جك مسئله انسان مسئله سی	
اصول عملیات انسانیه	۱۱۸
منكر ك فكر محالی	۱۱۹
اصول تفكر ك مرام و مقصد قانونی منج اولسی	۱۱۹
مقصد و مرام قانونی انكار ایتنه ك نتیجه لری	۱۲۰
مسئله نك جهت اهمیتی	۱۲۱
موجود اولانك مقصدی زرده ارانیلی	۱۲۲
موجود اولان هر شیئك مقابلی واردر	۱۲۳
ایکی مهم سؤال	۱۲۵
الله متعالك تحت حکمنده صلاحك ازدیاد بولسی	۱۲۷
فصل خامس . عقل و روح انسانیده اللهك	۱۳۱
وجودی و صفاتی حقنده ایما اولنان معلوماته دائر	
ضمیر انسانیك صلاحیت و اوصاف ذاتیه سی	۱۳۳
ضمیر انسانیك صفات الهیه و باخصوص	۱۳۶
عدالت الهیه حقنده و یردیکی معلومات بیاننده در	
اعتراضات	۱۳۸
آحاس خیرییه نك موجب مسرت و آحاس	۱۴۱
قبیحه نك موجب حزن و ندامت اوللری حقنده	

صفحه	
۱۴۴	طبیعتك قوانین عمومیه سنك صلاح ايله مطبقاتی
۱۴۸	باب ثالث . ازمنه متأخره ده بولنان ملحدك
"	فصل اول . بو ملحدكك متنوع صورتلری
"	بر اعتراض خصوصى
۱۵۰	ملحدك و دهريلك جنسلری
۱۶۱	بالعموم بونلك جهله سنك رد اولملىنك اسبابی
۱۶۹	الهیون اسميله مسمى انكایز دینسزلر
۱۷۰	هوتمك اعتراضاتى
۱۷۳	هوتمك اعتراضاتنه جواب
۱۷۷	حابس و بولینبروقك مسلكينه دائر
۱۷۹	فصل ثانى . ملحدكك سفاهتى
"	(۱) ملحدكك اصول ومبدألرنجه هیچ بر شیشی
	یقینا بيلمك ممكن دكل
۱۸۲	(۲) ملحدك امور روحانیه یی محو ایدر
۱۸۳	(۳) ملحدك معاشرت انسانیه ایچون موجب
	مخاطره در



❀ خطا صواب جدولی ❀

صواب	خطا	سطر	صحیفہ
الہیہ	الیہ	۷	۱۶
ایقوروس	ایقوروس	۱۲	۴
جسمہ	جسمہ	۱۶	۴۰
اولمشدر	اولمشدر	۱۷	۵۲
حقیقہ	حقیقتہ	۱	۵۶
کوریلور	کورنور	۳	۶۳
اصلسز	اصلسز	۷	۹۲
ابدوکنی	ابدوکنی	۱۵	۹۷
مخالد	مخالد	۱	۱۰۳
اولو	و اولو	۲	۱۲۵
صلاحیت	صلاحیب	۶	۱۳۵
	یعنی	۳	۱۵۲
اسناد	استناد	۳	۱۶۶



Journal, 1801



Natural Theology.

By Rev. Geo. F. Herrick, D.D.,
(Grad. University of Vermont, 1856),

Missionary A. B. C. F. M. at
Marsovan, Turkey.

Printed in the Turkish language,
Osmanli characters, read-
ing from left to right.

Presented to Ohio State Univ. Library
by L. C. Herrick, M. D., Columbus,
June 15, 1891.



عَلَى الْهَيْطَةِ سَبِيحِي

BL
181
H56